

NATIONAL ASSEMBLY OF SEYCHELLES

Wednesday 23rd March, 2022

The Assembly met at 9.01am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou piblik a lekout. E byenveni avek nou dan Lasanble. Bonzour osi nou staff ki pe swiv nou, ki pe asiste nou.

Avan mon al lo *Order Paper*, regilye, mon ti a kontan adres serten size ki'n leve, dan Lasanble yer. Premye, an relasyon avek kestyon, plizyer Manm in komans pran labitid prefas zot kestyon avek *statement* lo ki mannyer zot kestyon in ganny trete, ki mannyer in ganny mete lo *Order Paper*, oubyen osi lo lezot size ki napa nanryen pou fer avek zot kestyon.

Mon'n enform bann Manm Lasanble ki sa pa akseptab. Ler kestyon, i pou kestyon. Si en Manm i annan konplent, lo ki mannyer son kestyon in ganny trete, *Standing Orders* i fer kler,

ki i devret lev sa avek Speaker an prive, e pa dan lasal.

Alor mon pe demann bann Manm, pou obzerv sa lenstriksyon. E annou al lo kestyon, ler in ler pou kestyon. Byensir bann pti formalite parey, dir bonzour, met en remark dan en laliny, sa nou a kontinyen aksepte.

Me i sa bann prefas, politik, oubyen an relasyon avek biznes Lasanble, ki mon pa pou aksepte.

Dezyenm, lo size korperasyon Minis, avek Komite COGA, ki Onorab Lemiel ti leve yer.

Mon'n annan komunikasyon avek Prezidan. Annefe, se li menm ki'n kontakte mwan lo sa size. E in dir mwan, ki bann Minis pa'n refiz oubyen fer li difisil entansyonneman, pou pa korpere avek Komite COGA. Petet sa ki'n annan, i serten lenstans kot in annan kestyon lo ki dat, ki ler, kote zot sipoze rankontre. E sa in kapab anmenn serten lanpesman.

I annan osi, serten kestyon lo bann lasirans ki date depi avan setyenm Lasanble, ki petet zot pa konnen ki mannyer pou adrese. Mon pa konnen ki annan lo lalis lasirans. Me mon zis met sa pwen an refleksyon avek pozisyon bann Minis.

An tou ka, Prezidan in donn langazman ki bann Minis, i annan lentansyon korpere avek bann demann Lasanble. E la in propoze ki VP, Ahmed Afif i kapab komunik avek *Chairman COGA Onorab Lemi*, pou regarde ki bann lanpesman, e pour ki sa ki pe kapab met keksoz an retar. E pou eklersi semen devan zot.

Alor mon krwar sa i en linisyativ ki nou kapab pran. Annou met, sa bann difikilte ki'n arive deryer. Annou regarde ki mannyer nou kapab fer li marse, par sa metod ki mon'n refer lo la. Mersi.

Trwazyenm, lo size privilege leve par *LOTO*, lo dokiman pou Lasanble. Mon'n sey fer sa ki mon kapab pou eklersi sa, e mon'n pas dan Konstitisyon. Preferans dan Konstitisyon lo size dokiman pour Lasanble i dan Lartik 104. E Lartik 104, i koz lo formasyon bann Komite. *Standing Committees of the Assembly.*

E i refer prensipalman lo *Finance and Public Account Committee, and Standing Orders Committee*. E dan Lartik 3, sa dan Clause 3 sa Lartik i dir.

"For the purposes of effectively performing its functions a standing or other the committee may summon any

person the committee believes may assist the committee in the performance of its functions and the committee shall have the powers, rights and privileges of the Supreme Court for-

(a) enforcing the attendance of witnesses and examining them on oath, affirmation or otherwise;

(b) compelling the production of documents."

Sa i sa ki mon'n vvar dan Konstitisyon, si i annan lot lenstans, lot lenstans dan Konstitisyon ki refer ek sa size, mon pa'n vvar li.

E mon pe envit *Leader Lopozisyon*, pou si i annan diskisyon avek sa ki mon'n dir, i kapab adres mwan an prive. Pou met lezot referans a mon latansyon, si i bezwen, si i santi poudir sa i devret ganny revize.

Donk mon *ruling* lo matter of privilege pou *Leader Lopozisyon*, mon le dir mon pa krwar poudir dan sa lenstans ki son privilege in ganny afekte, i devret apres sa size desizyon e sa size dokiman pour Lasanble atraver *FPAC*. E la mon a fer referans avek sa fame lenstans, dokiman *FA4GR* ki ti ganny demande dan Lasanble, e ki pa ti zanmen ganny prodwir.

So i sel referans lo presedans, ki mon annan devan mwan. E ki mon tenir antet, e

mon le sit sa koman parti mon *ruling*. Mon le dir ki mon *ruling* lo sa bann size i final. Mon pa pe antre dan deba. Si i annan okenn kestyon lo sa bann *ruling*, *Leader Lopozisyon* oubyen lezot Manm i devret adres sa an prive, anver mwan. Mersi. Nou a prosede ek nou lezot *item*, lo *Order Paper*.

HON SEBASTIEN PILLAY

(Off-Mic)

MR SPEAKER

Ou anvoy ou *point of order* kot mwan an ekrir, an ekrir *Leader Lopozisyon!* An ekrir!

HON SEBASTIEN PILLAY

(Off-Mic)

MR SPEAKER

Lo sa ki mon'n dir. Ale *state* ou *point of order*.

HON SEBASTIEN PILLAY

Mersi Mr Speaker. Mon le *draw* ou latansyon, *to point of order* 8. 8(2) ok. Ki dir poudir “*the Speaker or Deputy Speaker shall preserve order and decorum of the Assembly and shall decide on points of order and practice.*”

You're deciding on a point of practice. Savedir ki mannyer bann dokiman pou vin devan Lasanble. Ou'n fer referans

avek en dokiman ki'n sipoze, vin devan Lasanble e ou'n sit ou *ruling* lo sa *order*. Ou'n dir ou vwar sel, sel presedans se sa.

Nou annan dokiman ki'n ganny donneen avek nou par ASP. Nou annan dokiman ki'n ganny donneen ek nou par Minister Lanplwa, nou annan dokiman ki ti ganny donneen ek nou par Minister Finans – ok?

Alors ki mannyer, ki Minis Derjacques koman Minis pou Transpor pe sey kasyet deryer, Speaker Lasanble Nasyonal ...

MR SPEAKER

Arete! Arete!

HON SEBASTIEN PILLAY

... pou li pa donn nou en dokiman dan Lasanble Nasyonal!

MR SPEAKER

Out of order! Onorab Pillay *out of order*. Arete si ou annan, si ou annan kestyon pou leve, adres mwan an prive lo sa silvouple.

HON JOHAN LOZE

(Off-Mic)

MR SPEAKER

Onorab! Onorab Loze mon pou demann ou pou sorti dan lasal.

(APPLAUSE)

(Interruption, Off-Mic)

(US Members left the House)

MR SPEAKER

Tre byen. Nou pou kontinyen avek nou *Order Paper*. Mon le enform bann Manm, ki akoz labsans Onorab Labonte pou rezon lasante, Nou pe gard posibilite pou nou reviz *Order Paper* pou larestan lazournen. Akoz lo *Order Paper* ti annan enn son Mosyon. En Mosyon dan son non. Me nou ava enform zot, lo la dan *le cours de la matinée*.

Nou a kontinyen avek nou *Order Paper*, e mon a demann madanm rapporter pou envit Minis, pou antre pou nou pran en *Bill* silvouple.

Bonzour Minis e byenveni dan Lasamble. Minis Naadir Hassan, Minis pour Finans Plan Nasional e Komers. E mon annan plezir osi envit lezot Manm son delegasyon, ki'n zwenn nou e swet zot labyenveni.

Mr Christophe Edmond *First Deputy Governor of The Central Bank of Seychelles*, Madam Taryn August Direkter *Legal Assistant, Legal Section* dan *Financial Services Agency*, Mrs Gulmette Leste *Legal Draftsperson AGs Office*.

E nou osi annan lo latab a kote latab ofisyel, Mrs Beggita Vital *Senior Market Conduct Analyst* dan *Central Bank of Seychelles*. Avek sa nou pare pou pran konsiderasyon *Financial Consumer Protection Bill, 2022*.

E mon demann lo kote Onorab Arissol, pou prezant Mosyon pou *Second Reading please*.

HON SANDY ARISSOL

Mersi Mr Speaker. Bonzour Mr Speaker. Bonzour Minis, avek ou lekip. Bonzour tou Manm LDS ki prezan e tou dimoun dan lakour ki pe ekoute.

Mr Speaker, anba *Order 69(2)* nou *Standing Orders* mon le move ki *Bill Financial Consumer Protection Bill, 2022* i ganny lir en Dezyenm Fwa. Mersi.

MR SPEAKER

Mersi nou a ganny segonnman lo sa Mosyon silvouple. Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker mon segonn Mosyon pou *Financial Consumer Protection Bill, 2022* ganny lir en Dezyenm Fwa. Mersi.

MR SPEAKER

Mersi, i enteresan pou note ki sa i *Bill No. 1 of 2022*. Minis mon ava envit ou pou fer ou prezantasyon lo sa *Bill*.

MINISTER NAADIR HASSAN

Mersi Mr Speaker. Mr Speaker, Onorab *Leader Zafer Gouvernman*, bann Manm Onorab, Manm piblik a lekout bonzour.

I en plezir pou mwan vin devan Lasanble ozordi, ansanm avek Labank Santral Sesel, e Lotorite Servis Finansyel, pou prezant en nouvo Prozedlwa ki annan pou bi ranforsi drwa e proteksyon konsonmater, letan zot pe akse bann prodwi e servis finansyel.

Nesesite pou annan en tel Lalwa, ti premye ganny soulinyen dan plan Lenplimantasyon Devlopman Sekter Finansyel pei ki ti ganny aprouve an 2014.

Sa plan ti anfet idantifye proteksyon konsonmater a kote ledikasyon finansyel koman de eleman kle ki bezwen ganny pran an kont pou asire ki okenn kous popilasyon pa ganny kit deryer, anmezir ki travay i ganny fer pou transform, e devlop sekter finansyel. E fer li vin trwazyenm pilye nou lekonomi.

Bokou in ganny fer o kour bann dernyen lannen, lo kote ledikasyon finansyel, anba parasol en stratezi nasyonal. Ki ti komans ganny enplimante an 2017, par Labank Santral e Lotorite Servis Finansyel.

Mr Speaker Prozedlwa ki devan Lasanble ozordi, i pou annan bi permet sa menm de lenstitisyon adres en lot konponan enportan, ki proteksyon konsonmater.

Parey nou konnen Labank Santral, i Lotorite Servis Finansyel, in met an plas bann Lalwa ek regilasyon, ki gid fonksyonnman bann diferan lenstitisyon finansyel, ki tonm anba zot sipervizyon respektif.

Sa i avek bi asire ki zot loperasyon e aktivite pe ganny fer anliny avek bann standar ki ganny etablir e pou osi bon fonksyonnman e stabilite en sistem finansyel an zeneral.

Sa nouvo Lalwa ki pe ganny propoze pou elarzi manda sa de Lotorite, pou zot osi kapab siperviz kondwit sa bann lenstitisyon vizavi konsonmater ki pe akse zot prodwir, e servis.

Pandan sa bann dernyen lannen nou vwar plizyer defi, konsernan sa size. Par egzanp nou'n vwar ki bann antite finansyel pa pe fer ase zefor pou annan en enteraksyon e

langazman pli pros avek zot kliyan.

Bann tel enteraksyon ek langazman a permet zot pli byen konpran bezwen sak endividé, e osi partaz lenformasyon, lo bann servis e prodwi finansyel, ki zot ofer.

Plis zefor i osi bezwen ganny fer pou amelyor latransparans, sirtou an term devwal bann kondisyon ki atase avek bann kontra, e kou asosye avek bann diferan servis e prodwi finansyel parmi lezot.

Mr Speaker menm avek zefor Labank Santral e Lotorite Servis Finansyel pou adres bann tel defi, e zer konplent konsernan bann servis finansyel. Baze lo en lagreman ki sa de Lotorite, i annan avek Komisyon Komers Zis, i kler ki i annan serten mankman, an vi ki napa en lankadreman apropriye.

Sa novo Lalwa, pe alors etablir en kad formel e legal ki ava donn pouvwar sa de lenstitisyon pou enplimant, e akonplir sa manda proteksyon konsonmater, dan en fason pli efektiv.

Sa novo Lalwa ki pe ganny propoze, i annan plizyer provizyon tel ki: -

Etablir standar pou bann kontra, ki bann antite ek zot kliyan i antre ladan.

Mezir ki permet konsonmater ganny rekour, menm apre ki en kontra in ganny sinyen.

E i osi promouvwar tretman zis e ekitab pou tou konsonmater e plis latransparans, pou fer ki dimoun i ganny ekse avek ase lenformasyon lo bann servis e prodwi finansyel pou zot kapab fer bann desizyon pli enformen.

Mr Speaker sa Lalwa pe osi anmenn serten novo eleman. Provizyon in ganny fer pou permet Labank Santral e Lotorite Servis Finansyel, ordonn en antite finansyel, pou donn rekour konsonmater dan bann lenstans kot sa i zistifye. E pou fer bann aksyon kolektiv dan en dele letan ki'n ganny spesifye.

Par egzanp, zot pou kapab fer en antite finansyel pa aplik, kondisyon ki ganny konsidere koman pa zis lo en Kontra finansyel. Zot pou osi kapab donn lord en antite pou ranbours okenn sarz ouswa, pey domaz direk en konsonmater dan bann lenstans kot provizyon sa Lalwa pa'n ganny respekte.

Sa bann lofans e mezir ki'n ganny pran pou kapab ganny pibliye. Labank Santral e Lotorite Servis Finansyel, pou preznan osi kapab anmas plis

lenformasyon konsernan enteraksyon, ant bann antite finansyel ek zot konsonmater.

Fer lenspeksyon pou asire ki bann antite pe swiv standar ki aplikab. Pran aksyon disipliner tel ki aplik, bann sarz administrativ kont bann antite finansyel kan i neseser.

Promouvwar korperasyon, ant Labank Santral e Lotorite Servis Finansyel, avek diferan Lotorite relevan tel ki Komisyon Komers Zis, ki annan manda prensipal pou asir proteksyon konsonmater dan pei.

La, mon ti a kontan souliny kot kolaborasyon tre pre ki sa Komisyon i annan deza avek le de lenstitisyon, pandan ki travay ti pe fer pou drafte sa novo Lalwa. E mon swete ki sa langazman i kontinyen.

Mr Speaker, a sa pwen i enportan fer resorti ki nou konsyan ki en tel Lalwa spesifik pou proteksyon konsonmater, servis e prodwi finansyel, i enn ki novo pou Sesel.

Dan sa laliny, travay pe ganny fer pou drafte bann diferan regilasyon, ki ava donn bann lenstitisyon finansyel sa gidans e sipor neseser, pou zot pli byen enplimant e reste an konformite avek sa Lalwa.

Bann konsonmater osi, i annan zot rol pou zwe. Lobzektif sa Lalwa i pou ede ranforsi zot drwa e proteksyon. Me i osi enportan ki nou pa bliy, nou responsabilite koman bann endividé. Konsonmater i bezwen vin pli konsyan e angaze dan bann langazman ki zot antre ladan, avek bann antite finansyel.

Pou donn enn de legzanp, konsonmater i bezwen asire ki zot konpran e aksepte responsabilite okenn kontra ki zot, antre ladan pou en servis ouswa prodwi.

En dimoun ki pran en facilite kredi, i annan en lobligasyon pou ranbours sa det. Ou kapab *debit*, ouswa *credit*. E ou lenformasyon personnel tel ki ou kod sekre, pa devret ganny partaze avek okenn lezot dimoun. E ou osi annan en drwa pou met azour lenformasyon ki ou lenstitisyon i garde lo ou, e pou raport okenn pratik ouswa tranzaksyon, sispe.

Mr Speaker dan tou novo demars ki nou antreprann, konprenezon e rol ki sakenn i annan pou zwe i lakle si nou anvi vvar rezulta. Dan konteks sa ki nou pe koz lo la ozordi, sa pou en laspe enportan si nou anvi ki sa Lalwa i ganny byen enplimante.

I pou enportan ki bann lenstitisyon finansyel e piblik, an zeneral i konpran zot bann drwa e responsabilite vizavi bann provizyon sa nouvo Lalwa Proteksyon Konsonmater bann prodwi e servis finansyel.

Se dan sa konteks ki Labank Santral e Lotorite Servis Finansyel in komans travay lo en plan kominikasyon, konpreansiv, ki pou gid lafason ki zot pou angaz avek bann diferan group konsernen.

E edik zot lo bann diferan laspe enportan. Diferan stratezi pou ganny adopte pou asire ki sa ledikasyon i ariv kot tou kous nou popilasyon. E sa kominikasyon avek piblik ek bann partener konsernen, i enn ki pou bezwen kontinyen.

Sa kominikasyon i osi tre enportan pou asire ki i annan ase, konprenezon lo kwa ki sa Lalwa i kouver e ki mannyer, i konplement lezot zefor ki bann Lotorite konsernen pe fer, pou adres bann diferan defi ki egziste dan sekter finansyel.

Sa Lalwa pou adres spesifikman proteksyon konsonmater, ki enn parmi sa bann defi ki'n ganny koz lo la pandan bokou lannen.

Nou reste konsyan toudmenm, ki i annan plizyer lezot size enportan, ki ankor en defi pou popilasyon. Tel ki to

lentere, e akse avek bann fasilité kredi; nesesite pou annan plis konpetisyón, prodwi ek servis pli abordab. E anmenn pli swa pou konsonmater. Travay i kontinyen pou vwar fason pou amelyor sa bann diferan konponan.

Parey nou konnen, lankadreman Polisi Moniter Labank Santral, i sa eleman kle, ki ganny servi pou gid to lentere dan marse.

Me i osi annan lezot eleman ki bezwen ganny adrese tel ki pri lavi, akoz sa osi i annan en lenpak lo to lentere e akse avek kredi an zeneral.

Lekspektasyon se, ki plan modernizasyon sistem peyman Nasional, e stratezi *FinTech* ki pe ganny enplimante. Atraver zefor Gouvernman avek bann partener konsernen, tel ki Labank Santral, Lotorite Servis Finansyel e sekter parmi lezot, ava osi ede anmenn plis, inovasyon, diversite e fer ki bann prodwi ek servis i vin pli abordab. Sa i ava an retour anmenn plis swa pou konsonmater e ede devlop plis nou sistem finansyel.

Tousala i bann travay ki'n deza komanse, e ki pou ganny ranforsi dan bann mwan e lannen ki pe vini.

Mr Speaker an konklizyon, sa Lalwa i pran kont bann prensip e standar enternasyonal. Tout an prenon kont nou konteks lokal. Son lenplimantasyon pou ede ogmant, konfyans konsonmater pou akse prodwi e servis finansyel. Enkli servis elektronik ki vreman enportan, pou anmenn sa lefikasite, stabilite e modernizasyon, ki nou anvi vvar arive dan nou lekonomi.

Lo sa not Mr Speaker, mon swete ki nou ganny sipor tou bann Manm Lasanble. E pou mon vvar osi ki i sagrinan a sa moman, ki lo kote Lopozisyon zot pa la, pou diskrit sa Lalwa ki ase enportan, ki i annan en lefe lo konsonmater, lo proteksyon konsonmater e sa pou mwan i vreman sagrinan.

Me mon ti a kontan demann Manm parti Gouvernman pou aprouv sa Lalwa. Me osi demande ki zot ede dan sa demars pou kontinyen edik e ankouraz nou popilasyon lo fason pou amelyor zot byennet finansyel. Mersi.

(APPLAUSE)

MR SPEAKER

Mersi Minis pou en lentrodiksyon. Nou a preznan

pas lo deba lo sa *Bill* e mon envit bann Manm ki le entervenir. E nou a komans avek Onorab John Hoareau.

HON JOHN HOAREAU

Mersi Mr Speaker. Bonzour tou dimoun a lekout. Mr Speaker Minis ek ou lekip e bann Manm ki la preznan.

Mr Speaker sa Prozedlwa ki devan nou la, i enn ki pou donn ledan - plis ledan bann *regulators*, parey Labank Santral e Lotorite Servis Finansyel, pou zot kapab protez plis lentere bann konsonmater, prodwi finansyel.

Par kont nou tou ki la ki annan en kont dan labank nou pe konsonm en prodwi finansyel.

Ozordi Labank Santral avek Lotorite Servis Finansyel ki *regulate* bann labank, lasirans, *bureau de change* bann CSPs, bann *Board of Trustees, head firms, managers*, bann lakonpannyen ki fer *hire purchase* e *stock exchange*. A leksepsyon *Pension Fund* e *HFC* ki annan zot prop Lalwa ki zot *operate* anba la.

Mr Speaker role *Competent Authorities* anba Clause 5(1)5(2)e 5(3), i fer kler ki en *Competent Authority* anba lospis Labank Santral e FSA ou bezwen protez konsonmater

kont bann *unfair*, e *unjust practices*, atraver ledikasyon finansyel - vreman enportan.

E atraver bann *financial* e lafason ki zot pou mannye bann *financial disputes*. E osi, pou enterfer lo kote bann konsonmater ki anmenn konplent lo kote bann kontra ki zot fer avek bann servis finansyel.

E osi pou redres bann aksyon, *frauduleut* vit avek lelikasite. Souvandfwa ler nou al rod en prodwi finansyel, i annan bann *small prints* parey nou dir sa. Ki toulstan ladan, souvandfwa i annan en *catch*.

Ozordi zour anba sa Lalwa ki pe vin devan nou la, i pou fors bann bankye pou eksplik zot bann kliyan tre kler ki sa bann, ki sa kalite kontra ki zot pe antre ladan, avek zot labank. Pou fer sir ki tou keksoz i ganny parey nou dir - i ganny *iron out*, o komansman e ki sa dimoun pa ganny *mislead* dan en kontra ki pli tar i remarke poudir i pa sa keksoz ki li i ti anvi, oubyen ki'n antre ladan.

Mr Speaker, tout an prenon kont ki labank i bezwen *mitigate* son bann risks pour li *avoid bann bad debtors*.

I kler ki labank souvandfwa i tret son konsonmater sirtou Sesel par egzanp - pa tou labank dan

lemonn ki fer li - me Sesel par egzanp, zot tret zot konsonmater avek tro bokou mefyan.

Vedir ki la mon pe vvar, ki i annan en gro travay pou sa *Competent Authority* fer pou kapab sey retir sa bann baryer. Retir sa bann konplikasyon, sa bann birokiasi osi ki egziste ler en dimoun pe pran en *loan*, oubyen pe konsonm en servis finansyel.

Mr Speaker mon'n fer li mon devwar, pou telefonn 10 dimoun, pandan sa en semenn ki sa *Bill* avan i fer *Second Reading* - telefonn 10 dimoun e demann zot de kestyion prensipal ;

Eski ou satisfe avek servis ki ou labank pe donn ou? Si wi akoz? Si non akoz? E atraver sa pti dyalog ki mon'n gannyen ek sa 10dimoun, 8 dan 10 dimoun pa ti satisfe malerezman avek servis ki zot labank pe donn zot.

E nou ganny bann kalite, keksoz parey kolizyon *insider trading*, kot dimoun i dir ou koumsa poudir be labank mon pa'n kapab pey li mon *loan*. In sezi mon propriete, e ler in vann, in vann ek en dimoun ki annan for kontak ek sa labank, oubyen en dimoun ki dan labank menm, ki travay ek sa labank menm li menm.

E sa i en keksoz ki kont *Fair Trading* ki sa Lalwa pou bezwen dil avek. I annan size *collateral*, kot ou vwar ki labank i demann tro bokou, bann *collateral* avek son kliyan. I demann ou poursantaz kontribisyon personnel. Even lo bann ptipti *loan*, serten *loan* bann ptipti sonm, kot nou apel li bann *loan* personnel ki en dimoun i vin kot ou, i napa larzan li. I vin rod en larzan avek ou, me ou pe demann li pou met ankor tel kantite larzan, kot i pou al rode pou mete?

So i pe fer en baryer, kont sa prodwi li menm ki zot pe donnen. Parey mon'n dir avan, mon byen konpran ki labank i bezwen sey *mitigate* son bann risk. I bezwen *avoid bad debtors*.

Me selman anler zot tro fer li. E ler zot tro fer li, i afekte sa konsonmater en kantite. I annan osi lentere, lo bann *loan*. Annandler ler ou get li, mon konnen ki lentere i bezwen balanse lo *loan* avek lo *savings*. Be selman annandler ou pa vwar vreman sa balansman ant *savings* avek *loan*, kot ou vwar poudir *loans*, son lentere i mont 20poursan, 18poursan, 15poursan. Whereas *savings* i reste anba laba lo 3poursan, lo 2poursan.

So la ankor i an en gro travay pou zot fer, pou zot kapab ed sa konsonmater la deor. Mr Speaker, nou get lo bann *guarantors*. Konmela dimoun pa oule vini *guarantors*.

Me labank i ensiste ki ou anmenn en *guarantor* pou serten *loan*. Ankor mon krwar poudir nou devret fer pli byen dan sa nivo, pou sey kapab rod en lot fason pou kapab donn akse kredi avek nou bann dimoun. Mon konpran ki bann labank, bann lasirans, se bann *high risk business* e *high risk* i asosye avek *high profits*.

Me selman parfwa nou vwar poudir, labank tou-le-z-an zot pe pibliy zot, profi zot fer 150milyon, zot fer 200milyon, zot fer 100milyon profi. Me selman ler ou gete, sa profi pa pe ganny redistribye enn pti pe pou konsonmater.

I pe plito ganny servi pou donn gro, gro bonous zot bann *senior officers* dan labank, ensidswit. Lo kote *dividends* ankor lo lenvestisman. Parey egzanp mon pou met en ka devan, ozordi i fer apepre 3an ki Labank Komersyal Sesel, pa pe donn okenn *dividend* lo bann dimoun, pou bann dimoun ki'n aste bann *shares* dan labank.

Mon konnen sa i en desizyon *Board*, i baze lo plizyer faktor. I ase konplike. Me

selman, 3an - en dimoun in met son larzan avek ou i pa pe ganny okenn *return* lo sou pan on larzan? Dimoun deor pe demande, be akoz nou ti mete ensidswit. Konpran mwan?

So la i annan, mon konnen poudir lo sa bann *Board* i annan reprezantan bann dimoun ki annan *stocks*. Me selman i *still*, i pa fer sans pou nou kontinyen vwar en keksoz koumsa prolonge.

En lot keksoz, avek sa bann *shares*, napa fason pou ou re konverti ou *shares*, *back to* ou larzan ki ou'n gannyen. Si sa bann lakonpannyen i pibliy zot *stock*, zot vann *shares*. Zot devret lo en *stock exchange* pou ou kapab fer sa keksoz koumsa. Ok? Be nou vwar poudir i annan serten ki vann, ki vann bann *shares*. Me selman zot pa neseserman lo *stock exchange*. E sa i pa donn en bon fason fer biznes. I pa donn konfidans dimoun pou aste *shares* dan sa bann biznes.

Nou vwar osi i annan nesesite pou kontrol osi, bann *virtual transaction* parey *Airtel money* e lezot bann kart kredi, ki annan bann *hidden cost*, ki piblik annandler pa ganny dir sa bann keksoz.

Tranzaksyon aletranze atraver *online transfer*. Sa osi i annan en gran amelyorasyon

on ki labank i bezwen fer. Akoz ? Ozordi zour, si par egzanp en etidyan i *L'Angleterre* i annan son kont personnel isi Sesel, i vreman, vreman difisil pou li fer transfer son larzan from UK pou li dir son labank isi Sesel, envoy *email*, fer transfer son larzan.

I annan en kantite papye konplike pou li pas atraver pou li ranpli. So sa bann birokrali in ler pou ganny disparet. In ler pou kapab en etidyan i a pe etidye i bezwen son larzan, i bezwen li *at a short notice*, souvandfwa i bezwen kapab fer li.

Mr Speaker en lot keksoz ankor ki mon poudir zot, se ki anba sa Lalwa *part III* i donn, i koz lo *Duties Financial Providers*. E anba *General obligation 15(1)* i dir nou “*every financial services provider shall treat all the financial consumer equitably, honestly and fairly*”.

Me i malere annandler ou pe vin labank, ki ou pe vin rod en *loan* en keksoz koumsa, ou vwar ou, ou bezwen pran en gran, met en gran laliny. Tandis ki ou vwar serten ki pe vin rod zot *loan*, zot in vin rod detrwa milyon, ou pe vin rod en 200mil, Ss ki vin rod detrwa milyon li i ganny li i ganny en tretman preferansyel. I al laba

dan en pti lofis i ganny en pti *café*, i asize.

So li i ganny sa respe neseser, tandis ki ou ki pe vin rod sa pti 200mil, bezwen tenir dan en laliny. E menm si zot demann ki ou vin fer labank oubyen ki ou soz, bann zot protokol zot bann dimoun dan labank, me zot pa tret ou dan la menm fason.

So anba sa bout Lalwa, mon krwar poudir, ankor i annan keksoz pou nou fer, pou nou fer pou nou fer nou bann *customers*, vin pli satisfe, pou fer sa *customer* ganny *valued*, pou fer sa *customer* ganny sa respe ki i merite. Akoz li ki pe anmenn larzan pou ou, *ok?*

Finalman Mr Speaker, mon pou koz enn pti pe lo sa *grace period* anba dan letan *COVID*. Nou tou nou konnen poudir *COVID* in afekte en bon pe bann biznes, sirtou biznes touris.

E bann dimoun ki'n pran *loan* pou fer bann *chalets*, bann keksoz koumsa, bann prodwi touristik, zot pe vvar zot, zot in bezwen pran en *grace period*. E pandan sa *grace period* zot pa'n travay zot. Me selman nou vvar poudir lentere lo zot *loan*, i sirmonte menm ki ou'n *extend* son letan ki i pou peye.

So mwan mon krwar poudir la i annan en lenzistis.

Akoz deor laba, bann dimoun pe travay tre, tre dir pou zot kapab pey zot *loan*. Me in ariv en fakter ki zot pa'n kapab pey zot *loan*, akoz sa problem *COVID*, touris pa'n vini. Me la mon krwar poudir sa lentere osi, ti devret ganny *halt*.

Nou pa kapab *extend*, sa *period payment repayment*. Me selman, an menm tan ou'n met en lentere pandan sa *grace period*. Sa mon krwar petet Minis avek bann Lotorite konsernen, ler zot aplik sa Lalwa zot devret get osi bann ka *emergency* koumsa, bann ka parey nou dir *force majeure*, ki fason i kapab annan lenplikasyon lo bann biznes.

Mersi bokou Mr Speaker.

MR SPEAKER

Mersi Onorab Hoareau. Onorab Georges.

HON BERNARD GEORGES

Mersi Mr Speaker. Bonzour Minis avek ou delegasyon. Bonzour tou bann dimoun ki pe ekout nou dan lakour. E bonzour tou bann *MNA US* ki pe ekout nou, dan zot biro.

Mr Speaker, napa gran keksoz poudir apre sa prezantasyon ki Minis in fer bomaten, ki'n deplim byen konteni sa *Bill* ki devan nou ozordi. E sa, sa prezantasyon

Onorab Hoareau, swivan prezantasyon Minis.

Mon pran laparol senpleman, pou fer enn de, enn de refleksyon. Sa *Bill* mon konnen i annan en bon pe letan depi ler i dan prose. *In fact*, dan dernyen Lasanble en bon nou bann Manm ti ganny envite kot Labank Santral. Kot en premye prezantasyon ti ganny fer avek nou, en premye konsep sa ki sa *Bill* i pe fer la ozordi.

Donk nou pe atann, nou ti pe atann ek bokou latansyon ki sa *Bill* i ava evantyelman trouv son plas. Personnelman mwan mon kontan sa *Bill*. Akoz mon'n tre pre avek *Fair Trading Commission* ki son, ki annan en lanpler en pe pli gran. E sa enn i *focus* zis lo bann *financial services providers*.

E i kler ki dan nou konteks, i enportan annan bann regilater, oubyen en landrwa kot *consumer* i kapab ale, ler i santi ki son drwa pa'n ganny respekte.

Me sa *Bill* i al bokou pli lwen li. Sa *Bill* i pa en *after the event bills* selman. Ki pe rod sanksyonn, bann *move* pratik. Me i en *Bill* ki anvi, osi ki bann bon pratik i ganny met an plas par bann lensritisyon finansyel. Par bann *financial service providers*. Pou ki anvi menm ki ariv en problem, in annan en

langazman ankadre dan en *rule-based system* ant sa provider avek sa *consumer*.

Donk i ava annan deza, avan ki en dimoun i antre dan en kontra, i ava annan sifizaman lenformasyon, pou li konnen kisia ki pe antre ladan.

E sa i tre, tre, tre enportan Mr Speaker e se pour sa rezon ki mon kontan, ki sa *Bill* ozordi i pa senpleman regard ki mannyer pou redres en sityasyon ki'n arive.

Me i prensipalman anvi anpese ki sa sityasyon i arive, par donn tou lenformasyon posib, sa *consumer* ki pe al antre dan, *purchase* pou li aste en servis finansye. Pran en *loan*, parey nou kontan dir isi prensipalman, oubyen met son larzan lo *deposit* pou li ganny, pou li ganny en lentere.

Mon dir ki sa i en keksoz ki personnelman mwan mon kontan ki'n arive. Akoz plizyer lannen pase, mon ti *involve* dan en- Anfen mon ti anmenn en *case* devan Lakour prensipalman pou sey redres en sityasyon ki ti'n arive.

Mon ava eksplike egzakteman kwa. De dimoun ti'n pran enn ptipti *loan* avek en labank. Enn 6000 enn R8000. E zot pa'n pey zot *loan*, sa se sete bann *loan* ki sa labank ti donnen, dan rafal eleksyon. Kot

ti annan en possibilite pou al devan labank - en labank an partikilye e ganny en *loan* ase fasilman, pou aste en *fridge* oubyen pou fer en pti reparasyon kot lakaz, or whatever.

E bokou, bokou dimoun in pran sa bann *loan*. E etandonnen ki bann *loan* ti bann ptipti sonm larzan, sel keksoz ki labank ti pran sete en *guarantor* pou sa *loan*. E *obviously* parey tou dimoun i ti kapab ekspekte *loan* pa'n ganny re-peye, *guarantor* pa'n re-pey *loan*, *guarantor* ti napa sifizaman larzan pou re-pey *loan*.

Anyway, bref sa ki ti annan dan zot *Loan Agreement* sete en kondisyon, ki si ou pa re-peye ou pou ganny sarze *penal interest* 20poursan, *on top of* lentere ki ou sipoze peye. Pa zis sa, me si en Avoka i ekrir ou, si Avoka sa labank i bezwen ekrir ou en let poudir ou ki ou *loan* i *outstanding*, ou pou bezwen pey sa Avoka ki i normal.

Me sa ki ti pli, pli enteresan, se ki ou pa pey Avoka zis en fwa. Ou pey Avoka tou le mwan, ziska ler ou re-pey sa *loan*. E *to cut a very long story short* *loan* 6000, ti'n ariv 50mil avek lentere. *Loan* 8000 ti'n ariv 60mil ekek. *Obviously*,

si en dimoun pa'n kapab pey, oubyen pa'n anvi pey 6-8000, i pa pou al pey 50-60mil.

Sa ki nou fer se nou ti, nou ti al Ankour e nou ti anmenn en *case*, poudir ki sarz sa bann kondisyon ti *usurious*, ti tro for, e i pa ti normal, i pa ti legal, e i pa ti valab. E i annanerezman en Lartik nou Kod Sivil ki dir ki "*fairness and equity*", i bezwen antre dan bann kontra.

E an fonksyon sa Ziz in redwir sa lentere. E in fer sa sonm vin bokou pli abordab. E la ozordi, se lankadreman ki nou, nou'n bezwen al rod en pti Lartik *somewhere* e fer *apply* pou en ka spesifik, i la ozordi. *Black and white* dan sa *Financial Consumer Bill* ki devan nou ozordi.

E donk, parey Onorab Hoareau in fer resorti, sa ki sa *Bill* pe sey anmennen, se sa ki dan term legal nou apel *equality of arms*.

Ou bezwen annan en *kind of equality*, ant sa dimoun ki pe aste en prodwi e sa enn ki pe vann. E i kler ki par son natir ler ou al rod en *loan* ek labank napa *equality of arms*.

Akoz ou bezwen larzan, sa labank i annan e akoz ou bezwen ou kapab, tonm dan en pyez kot ou pou siny nenport kwa, zis pou ou ganny sa *loan* akoz, ou bezwen. E pli tar ou

pou regrete ki ou'n antre dan bann kondisyon ki de-favorab. E mon kontan vwar ki sa *Bill* devan nou ozordi, i anglob tousala. E in met en striktir an plas, en *rules-based structure* an plas ki fer ki sa bann keksoz pa pou arive.

Donk Mr Speaker san al dan bann detay sa bann provizyon dan sa *Bill*, mon krwar Minis avek Onorab Hoareau in fer sa sorti ase byen. Mon ti a kontan dan en fason zeneral, *welcome* sa ki la devan nou ozordi.

I annan en regre ki mon annan, e sa napa nanryen pou fer avek sa *Bill* li menm, e sa se ki nou fek ganny ozordi, e Onorab Deputy Speaker anvoy mwan en komunikasyon ki'n gannyen, e eskiz mwan Onorab Deputy Speaker, si mon fer sa deklarasyon avan ki ou, ou ganny loportinite pou fer sorti kot *Human Rights Commission*.

En rapor 32 paz ki pe demann revwar serten bann provizyon sa Lalwa. Pa akoz zot mal. *I think generally mon'n skim* dan sa 5minit ki mon'n annan, avan ki mon pran laparol bomaten - mon'n *skim* enn pti pe, zot dapre sa ki mon vwar, zot pe dir "*great but can be improved*."

I annan serten keksoz, ki nou kapab *improve* en pe pou

anmenn li en pe pli anliny avek - sirtou bann keksoz ki annan pou fer avek *due process*.

Ler par egzanp en *financial service provider* i ganny demann en serten lenformasyon, ki i annan en serten prosedir ki ganny met an plas.

Me mon krwar ki si mon konpran byen, sa se bann keksoz ki pou vin dan bann *S.I.* Dan bann *regulations* i ava donn bann detay. Sa *Bill* li menm li i tras bann gran laliny, bann keksoz devret ganny fer, *and the detail would be en pe pli tar dan bann S.I.*

Mon pa vwar nanryen dan sa *Human Rights Commission Report*, ki anmenn nou ozordi pou nou fer, okenn amannman, *on the floor of the House*. Me i ti ava swetab si nou ti'n kapab ganny sa en pe avan - *laying blame nowhere* - pou bann Manm Lasamble zot menm, bann ki la, ensi bann ki'n pe *work from home*, ti ava kapab vwar e anmenn en pe plis latansyon e en pe plis deba lo en keksoz ki fondamantalman enportan.

Mr Speaker mon pou pran laparol taler ankor ler nou ariv dan Staz Komite. Akoz i annan serten, lamannman ki nou pe propoze avek sa *Bill*.

Pa pou al dan son fon. Me lo laform plito. Alor avek sa detrwa mo, mon ava remersye Minis pou son prezantasyon bomaten. In demann nou siport son *Bill*. Mon kapab asir li ki lo sa kote latab, ki ozordi i fer tou Lasanble an antye, i pou ganny sa ki i swete gannyen. Mon remersye ou Mr Speaker.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonzour Minis ankor enn fwa, avek ou lekip. Mr Speaker, mon ti a kontan dir de pti mo lo sa Prozedlwa ki devan nou, parske mon santi e mon krwar poudir, nou koman Manm Lasanble Nasyonal, i nou devwar e nou responsabilite pou nou fer politik.

E an menm tan i nou devwar, e nou responsabilite pou nou edik enn pti gin, nou dimoun osi laba deor ki ekout nou, avek bann Lalwa ki nou, nou pase dan Lasanble Nasyonal.

Ou konnen mon kontan letan Onorab Hoareau, in koz lo labank; parske souvandfwa ou bezwen demann ou lekor kestyon, eski tou dimoun

ozordi, dan nou pei i annan en kont labank?

Eski tou bann biznesmenn ozordi dan nou pei, zot pe *bank* tou zot larzan dan labank, oubyen zot *bank* en pe, zot gard en pe? Eski ozordi nou bann zenn letan i antre dan en plas travay, i ganny edike, i ganny dir poudir get sa ou pou bezwen ou saler pas labank. Akoz i annan serten benefis ki vin avek.

Mon krwar lanmenm la ki lenformasyon, avek ledikasyon i enportan. Be letan nou pe koz labank parey in ganny dir, i annan dimoun i servi labank pou en sel rezon. Son saler i pas la. Akoz son saler i bezwen pas la? Pour li kapab ganny en *loan*.

Si ou saler pa pas labank ou pa gannyen *loan*, parske pou saler i vin sa garanti poudir ou en dimoun serye, ou dan lanplwa tel lannen, e ou annan en *Paymaster*. Alor labank i pa pou *mind* fer en tranzaksyon avek ou. Konpare ek si zis ou vini, sorti nenport ki landrwa, e ou vini ou dir ek labank, mon ti a kontan ganny en *loan*.

Alor dimoun i santi li oblige, pou li pas son larzan labank parske i annan sa lot bout ki vin avek, sa se *loan*.

Ou konnen, letan Onorab John Hoareau in koz an

relasyon avek *loan*, bann difikilte ki bann dimoun i gannyen, mon anvi zis pas en pti revi, enn pti lenformasyon ki mwan mon annan *in regards to* par egzanp si ou pe al labank, ou bezwen en *loan* 2.2milyon pour ou konstrir en lakaz.

Nou'n ganny dir yer par, Minis pou lakaz poudir *HFC* avek labank ozordi, zot pe egzize ki pou ou annan en lakaz, confortab, byen de lasanm senp lakaz, ou bezwen annan ou environ, *loan* ki zot pou donn ou se environ R1.2milyon.

Mwan mon pouss enn pti pe plis, mon'n met R2.2milyon, pou ou kapab fer en lakaz. Sa ki labank i demann ou. Ou bezwen annan ou lasirans premyerman li i la, ou bezwen annan ou lasirans environ 145mil la pou asir sa *loan* ki ou'n pran. Ou bann *processing fees*, letan al kot Avoka ou'n siny ou bann dokiman, R21mil.

Ou bezwen al fer ou en tes medikal, parske ler ou arriv serten laz ou bezwen al fer tes medikal. E labank i annan bann landrwa kot zot anvoy ou spesifik, bann zot bann koneksyon ki zot annan parske zot *believe* poudir laba i fer en pli bon tes medikal, ki si ou al kot Onorab Gervais Henrie.

Alor tes medikal, i R1500. Ozordi pou ou fer en plan, pou al labank ou bezwen en *loan*, Labank i demann ou bezwen annan ou plan, fini fer aprouve. Ozordi pri pou plan ozordi, i almost R25mil.

Si ou pe fer rezon met li lo pilye, feray i vin en lot R25mil unless ou kit ater, i reste R25mil.

Prezan i annan sa ki labank i demann ou, i annan sa ki nou apel *Bill of Quantity*. *BOQ* i environ R8-15mil li i depan lekel ki fer pou ou. So deza, pou mwan ganny en *loan* 2.2milyon avek labank, mon'n fini fer mwan en depans R250mil lo mwan menm.

So sa i montre nou bann difikilte ki dimoun i a pas atraver, pou li kapab swa gannyen *loan* pou en biznes, swa ganny en *loan* pou li konstrir en lakour. Me sa i labank i egzize? Akoz labank i egziz sa? Labank i egzize parske an menm tan labank i osi asire, ki larzan ki i pe pret ou, ou kapab dan ou kapasite koman en dimoun ki travay, ki an bonn sante.

I pou donn ou sa dele letan ki ozordi mon krwar i 23an sepa 30an pou ou kapab repey sa *loan*. E sa i bann ledikasyon ki nou dimoun i annan.

Me selman mon santi, parey in ganny dir poudir, sa bann lenformasyon i enportan i la. Pour ki letan en dimoun i pe vin rod en *loan* labank, in deza annan en dokiman ki'n prepare la. Lo resepsyon mon pe vin rod enn pti *loan*. Ki bann kondisyon ki atase avek, olye dir ou asize mon pou fer ou vvar msye entel. Ou pran 15 minit ou asize e msye entel i annan en dimoun avek li, i annan 1erdtan i pe asize avek.

E ou, ou pe al asiz 1erdtan ek msye entel, *then* finalman ou pa pou tro *happy*. So i ti ava deza annan, bann dokiman la latab ki dir avek *loan* 1.2milyon lala ki ou bezwen. Ou kapab al avek dan lakour montre ou madanm, si ou en msye, diskit lo la, get avek zot landrwa travay, *then* ou kapab retournen, pou vin rod sa lasistans.

Mon krwar sa bann lenformasyon i la, olye mont anler dan peron al asize, esper sa enn *sanitize* lanmen, pran tanperatir espere. *Then* apre ou bezwen al kot travay dir mon ti labank eskize, e la travay pa aksepte.

Sa i mon krwar i bann lenformasyon, bann ledikasyon, ki letan nou pe pas sa *Bill*. Pou nou kapab eksplik, bann labank edik zot parske

nou konsyan poudir sa ki zot pe fer, i pe zwe avek larzan. I enportan, i en keksoz serye.

Me selman an menm tan zot osi, pou fasilit sa dimoun, sa *consumer* ki'n donn ou sa konfyans pour li kit son larzan dan ou labank, pou asire ki osi ganny sa servis.

Dezyenm pwen Mr Speaker, se lasirans. I annan en kantite lasirans Sesel. E kwa ki nou benefisyé koman en konsonmater, avek lasirans mon bann zanmi. La si ou annan en transpor, ou'n aste en transpor nef, ou'n al kot labank, ou'n ganny tou sa difikilte avek labank, tou sa prosedir, prezan Leta, enkli labank i egzize ki ou bezwen annan en lasirans avan ou al lo semen.

Labank, lasirans ou komans peye depandan ou transpor, depandan ou *loan* ki ou'n pran, R25mil sa lannen. Lannen prosen si ou pa fer aksidan, i desann R24mil oubyen R23mil. Si ou pa fer aksidan i desann enn pti git i arriv R20mil. Kestyon ki mon demande, be kwa ki nou- ?

Eski, nou, nou pa zis donn en lakonpannyen larzan? Larzan akoz Leta ki Minis Finans, avek labank zot egziz nou, ou bezwen pey sa lasirans sansan ou pa pe al lo semen.

Mon donn sa larzan mwan, toule-z-an mon peye mwan. Toule-z-an mon peye menm akoz mon anvi dray mon transpor, oubyen mon asir mon lakaz. Alor mon sa.

Prezan i annan lot bout ki vin avek Minis, atraver ou Mr Speaker, letan i ariv en danze, ou fer en aksidan, ou lakaz i brile, i ariv en domaz, i annan en *Clause* ki sorti lespas, i tonm ater prezan. Sa *Clause* ki letan mon ti pe fer mon lasirans, mon ti pe donn mon larzan avek gran ker, sa *Clause* pa ti la li, koman dife i pran, koman ou transpor i bite. Sa *Clause* i sorti laba anler i bat ater lo *floor* parey *Mr Bean, Tu!*

Prezan *Mr Bean* li ki i fer i tay dan tou direksyon e apre rod en direksyon. Ou osi ou fer egzakteman sanmenm ler ou tap laport lasirans mon bann zanmi. Nou tay dan tou direksyon, e nou ganny tou sord difikilte.

Me letan ou pe anmenn ou larzan kot lasirans, zot met ou asize, zot koz ek ou ek sourir, zot ankouraz ou. Zot tipe, zot donn ou en pti bac tou! Enn pti draze i annan la latab. Be selman letan ou vini Minis, pour ou vini poudir zot mon'n pey mon lasirans.

I annan 25an mon peye, la in ariv en pti maler.

Nou ti a kontan ki sa *process* osi, i pas byen, avek sa *Bill* ki nou pe vote ! Pour ki bann lakonpannyen lasirans laba deor, zot pa pe zis pran larzan dimoun. Be i annan sa lot bout ki vin avek, sa rann prezan.

Ed sa konsonmater, donn li sa servis ki i pe rode. Me pa fer li tourn an ron finalman i ganny tansyon, i pa ganny son benefis ki i merite apre ki in kontribye an relasyon avek lasirans.

Mon krwar tousala i bann ledikasyon, ki nou fer. Mon kontan letan mon vvar bann lakonpannyen lasirans pe fer bann promosyon. Vin pey ou serkey, la boner pangar demen ou zanfan i ganny difikilte. Si ou vin pey ek mwan ou pou ganny tan. I annan bann promosyon ki zot pe fer, i byen.

Me selman i bezwen annan bann bout edikativ osi, lo si i ariv ou ensidan kote ou ale. Ki *claim* ou gannyen. Akoz ou ganny sa, akoz ou pa ganny sa lot bout. Konpare avek 'rekolt', parske mon santi e dimoun i konplent.

E parfwa dimoun prezan ki zot pe fer, tou napa personn dimoun ki byen, byen i annan, ki pey en lasirans *full comprehensive* ozordi. Tou dimoun i dir ou i al lo *third party*, parske apre ler sa boug

in bat lo li, oubyen li in bat lo en dimoun, tou sa bann konplikasyon, i vin avek sa bann zafer lasirans.

Mon dernyen pwen Mr Speaker ki mon ti a kontan koz lo la, se an relasyon avek sa *guarantor*, ki mon'n tann Onorab Georges koz lo la. Eski ozordi, dan letan ki nou pe viv 2022, eski *guarantor* ozordi i ankor valab dan nou pei?

Eski i ankor valab? Ozordi ou fanmir, i sorti *Canada* i pran en avyon, i transit pou li vin anter ou, isi Sesel. Mon pe al lanterman mon frer. Selman napa en frer, ou en ser ki koup semen, pou li al ed son ser laba lot kote laba ki dan en maler. Be eski ozordi i annan *guarantor* dan nou pei ozordi?

Lekel sa dimoun ki pou al *guarantor* ozordi? Pa egziste sa. Napa. Eski alor atraver sa Lalwa, eski i pa'n ler pou nou revwar, moderniz li. Anmenn li dan bann kondisyon ki fasil pou sa dimoun Beau Vallon kot Onorab John Hoareau, I a kapab ganny son pti *loan*, depandan kantite ki i pe rode, depandan sa pti bout ki labank in donn li.

San al fors en dimoun, vin garanti mwan, mon bezwen sa pti *loan*. Apre finalman ou, ou zwe manboulouk, sa i mor lo sa

dimoun. Li osi i deside kit pei i ale. Sa i fer ki demen, ler en lot dimoun i vin rod *loan* labank i dir ek li, non mon frer. Pou lemoman mon pa pe donn personn. Prezan ou pri dan laliny, akoz bann ki'n pas devan ou, pa'n *fulfill* zot komitman.

Mr Speaker mon ti a kontan aret la, kekfwa dan *Committee Stage* i ava annan serten keksoz, mon ti a kontan partaze mon osi. Me selman mon santi, poudir lenformasyon, ledikasyon, ek bann lanpayaz ki'n egziste, mon krwar i enportan Minis atraver sa *Bill* ki nou pe fer. Pou nou ed nou bann dimoun, laba deor, pour ki i fasilit zot an relasyon avek *loan* bann depans ki zot fer.

E osi servis ki nou donn zot, pou larzan ki zot depanse avek sa bann lenstitisyon. Mersi bokou Mr Speaker.

MR SPEAKER

Mersi Onorab Arissol. Prezan Onorab Wavel Woodcock.

HON WAVEL WOODCOCK

Mersi Mr Speaker. Bonzour Minis ou delegasyon, tou Manm e tou dimoun a lekout. Mr Speaker, lanfaz sa *Bill* se pou protez drwa konsonmater pou ganny akse ek bann servis finansyel.

E sa Lalwa pe met, pe donn plis ledan bann *regulators* ki neseser, ki enportan. Mon lentervansyon Mr Speaker, pou *focus* enn pti pe parey ki Onorab Hoareau in fer. Mon pou *focus* enn pti pe lo konsern piblik la deor. Sirtou kot i konsern labank, *loan* avek kredi.

Ozordi aktyel Mr Speaker, menm si pei ekonomikman nou pe refer, sirtou nou en pei ki depan bokou lo Lendistri *Tourism*. La ki touris pe antre dan pei, labank mon mazinen pou anmas plis reveni, biznes pe roule, me *still* bokou dimoun la deor pe ganny difikilte, pou ganny *loan*.

Wi nou konpran *COVID* ti'n tape, nou konpran ki labank pa ti pe anmas larzan parey avan. Bann biznes pa ti pe *bank* larzan parey avan. Me la vi ki nou lekonomi in relanse, ou konnen i annan sa konsern la deor, ki *still* menm si zot al labank, pe tap laport pe rod *loan*. I annan bokou, difikilte.

Sirtou bann dimoun ozordi ki dan *tourism sector*. I annan bokou dimoun pe ganny difikilte, petet zot pe rod en *loan*, zot annan en proze. Zot annan renovasyon pou zot fer, lo zot letablisman, ouswa pou zot ganny sa *cash flow*, pou reenvestir dan zot biznes.

E sa bann dimoun pe ganny difikilte, sirtou ler ou al labank, ou dir koumsa. Zot gete poudir ou en dimoun ki pe travay dan sekter *tourism*. Ou en restorater, ou annan en restoran, ou annan *guest house*, ou lotel zot pe ganny bokou, bokou difikilte pou ganny akse avek finans.

En lot konsern ki'n ganny mete la deor, ki ganny souleve deor - e mwan mon koz avek plizyer dimoun, menm dan mon distrik. E sa i en konsern nasyonalman, Ss kontribisyon ki plizyer bann labank i demande.

Sa kontribisyon ki zot pe demande, i annan labank ki ozordi ou pou demann en *loan* i pe demann ou pou met 40poursan kontribisyon. Ki vreman o, e bokou fwa dimoun i vwar li difisil pou ganny sa *loan*. Bokou fwa, en dimoun i al pran en *loan*, akoz i napa pa sa finans. I napa kekfwa sa 40poursan pou li mete.

Me selman, i pou annan sa mwayen pou li re-pey son *loan*. Me selman sa kontribisyon ki zot pe demande ki bann labank pe demande, i vreman tro o. Ki fer li difisil pou plizyer dimoun, sirtou bann pti biznes.

Sirtou bann dimoun, nou pe dir *ok ankouraz* pti biznes,

annou ed nou lekonomi relanse, annou ed bann zenn antreprenier. Mon konnen ki Gouvernman in met serten provizyon. Atraver Bidze, atraver *DBS* pou donn *loan* bann pti biznes.

Me sekter komersyal. Labank Komersyal osi i bezwen zwen en rol pou ede, relans nou lekonomi nou pei. E pou fer sa, nou bezwen fasilit keksoz. Donn loportinite bann zenn lantreprenarya pou zot kapab ganny akse avek finans ek kredi pou zot kapab, komans en biznes.

Swa envestir dan zot biznes ki'n petet in *start-up* ouswa ki bezwen sa kapital, sa *cashflow* pou li agrandi son biznes pou li *expend* son biznes. Mr Speaker mon bezwen dir os, ki en lot konsern deor la se pri lentere, i egzazeran.

Lentere lo *loan*, plizyer labank i tro o. Kliyan li ler i met sirtou bokou bann Seselwa ki'n met *deposit* pou ganny, lentere ki zot gannyen si ou gete i pa ankourazan i pa, neseserman o. Me selman ou ler ou pran en *loan*, sa lentere ki ou bezwen peye apre enn ler, i le pet plafon.

I annan fwa enn ler, ler ou'n fini pey lentere, ou'n pey de fwa plis lentere ki ou sipoze peye. Konmsi en ler ou

demande ki kalite kalkil ki bann labank i servi, akoz ler ou kalkil larzan ki ou'n peye, enn le preski, i 15percent, 20,30 percent, plis ki orizinalman ou sipoze peye. I annan sa konsern deor.

I annan sa konsern deor, ki bann kalite kalkilasyon ki ganny kalkile, lo repeyman sa bann lentere. Akoz enn ler ou vwar ou pe pey bokou plis ki orizinalman, ou sipoze peye. E i annan menm bann ki'n pey de fwa plis.

En lot konsern la deor Mr Speaker, ki mon bezwen souleve, se kot i konsern bann *guarantor*. En ler, *ok* mon konpran enn ler konsern se ki, dan lepase bann *debtors*, bann dimoun ki'n pran *loan* avek labank zot pa'n, in ganny difikilte re-pey zot *loan* ki prezan labank in apros sa bann *guarantor* pou re-pey sa bann *loan*.

Me selman i annan bann dimoun deor ki *genuine*, ki kapab pey zot *loan*, zot annan larzan ki pe antre. E ou pe get zot ou vwar, ou koman labank ou vwar larzan ki pe antre tou le mwan, larzan pe antre, biznes pe fer byen.

Me selman *still* ou pe demann sa dimoun, pou annan en *guarantor*. Mon kapab konpran en *guarantor*. Me i

annan labank ozordi ki'n fer sa bokou pli difisil. Ki mon krwar sa i en fason pou dekouraz dimoun pou pran *loan*. I demann ou de *guarantor*. Konmela pou ou ganny en *guarantor*, pa fasil i vreman difisil.

E mwan mon konn plizyer dimoun ki'n vin kot mwan i dir mwan *ok*. Onorab mon'n al labank, mon'n nobou ganny mwan en *guarantor*, be selman labank pe demann mwan 2 *guarantor*. Ki en ler i difisil, ozordi dimoun pa le, pa le garanti zot prosen akoz nou konpran.

Sirkonstans lepase enn ler inosan, i pey pou koupab. Konmsi i annan plizyer bann keksoz, ki egziste konmela ki fer li difisil pou plizyer nou bann frer, ek nou ser ganny en *loan* la deor.

En lot konsern ki mon pou met dan ou latansyon, Minis. Annefe sa en konsern ki detrwa dimoun, sirtou bann biznesmenn ki en pe pli eze ki annan plis kapital in met devan mwan.

Sa i konsern, *treasury bond*. Ler CBS e sa en konsern dan lepase, mon priye ki anba sa novo Gouvernman sa bann keksoz pa pou arive.

Ler CBS i issue *treasury bonds*, lo behalf Gouvernman,

most of the time i bann menm dimoun ki ganny sa bann *bonds*. E i annan konsern dan lepase ki, avan *treasury bonds* i ganny *issue*, i annan serten dimoun, ki'n ganny enformen byen davans, ki sa bann *bonds* pe al ganny *issue*.

Ki donn zot en lavantaz, en *unfair advantage*. E ler lezot dimoun, zot, zot partisip dan *issuance* sa bann *bonds* zot ganny dir ki i *fully subscribed*. Sa i en konsern ki'n sorti, ki deor ki petet Minis i kapab donn enn pti kontrandi lo la.

Me avek sa de mo Mr Speaker, mwan mon santi poudir sa *Bill* i vreman enportan, sirtou kot i konsern protez drwa bann konsonmater pou ganny akse avek servis finansye, finansman e, pou don plis ledan, nou bann *regulators*. Avek sa de mo, mon dir ou mersi Mr Speaker.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker bokou in ganny dir, avan mwan. Me an *grosso modo* pou bann piblik ki pe ekoute, se i en *Bill* ki pou afekte tou dimoun.

E rezon i senp akoz nou tou nou en konsonmater finansyel. Ki swa depi ler nou met en larzan de kote, pou nou vye zour, nou pran en *loan* pou envestir dan nou lekor, ki swa en transpor, lakaz, biznes, nou transfer larzan pou fanmir, pou zanmi. Nou en konsonmater finansyel. E dan en fason nou ganny enpakte, lo bann desizyon ki bann *service providers* i donnent.

Alor i en long prose, pou konsilte e asire ki annan en kad legal ki asire, ki dezormen Sesel, koman en pei bann servis finansyel i lo en standar enternasyonal. Kot i annan latransparans, konsonmater i ganny trete dan en fason ki zis.

Zot bann lenformasyon, bann data personnel i ganny proteze. E ki si annan konplent sa i ganny fer dan en fason ki ekitab e ki annan solisyon.

Alor i ti enportan, e in en prose ki *as far back* ki mon kapab mazinen depi apepre 2014 in komans annan konsiltasyon, lo la letan ti annan sa *Financial Sector Development Implementation Plan* an 2014.

E apre an 2017, ansyen administrasyon ti aprouve *Cabinet* ti aprouve, ki i annan en Lalwa ki, ki zer bann keksoz, *Financial Consumer Protection*.

E apre in annan konsiltasyon. Donk pou dimoun ki pe ekoute, kekfwa zot a santi poudir be - si zot pe dir pe afekte nou, mon pa'n tann nanryen, i pou en pe malonnet, lo lapar piblik poudir sa.

Akoz in annan bann konsiltasyon piblik lo Mahé, lo Praslin, dan medya in pase. Mon menm, rapel Lasanble, sizyem Lasanble ansyen Speaker Pillay, ti ankor la. Nou ti annan en konversasyon, avek Gouverner Labank Santral ek son *management team*.

Labank Santral, pour nou konnen poudir sa pe vini. So in la, in la. E lo Gazet Ofisyel depi letan, en pe letan sa *Bill* in ganny pibliye. Donk i vre ki dimoun in annan sifizaman letan, sa ki'n enterese pou regarde.

E alors sa Lalwa i pa pe non selman zis anmenn bon keksoz, pou konsonmater, be mon santi poudir *bann service providers*, par egzanp bann labank, *bureau de change*, bann lorganizasyon, ki *provide mobile money*. Dan Sesel mon krwar i annan zis *Airtel* konmela, ki pe fer sa.

Bann lenstitisyon *gambling*, lakonpannyen lasirans, i ganny kouver. E alors si i annan konsonmater avek sa bann *service providers*,

i annan en keksoz ki nou bezwen koz lo la ozordi bomaten.

Menm si pa tro lontan, se responsabilite. I responsabilite sa bann *service providers*, pou asire poudir zot servis i transparan.

Onorab a kote mwan, Onorab Arissol in koz byen, lo letan zot pe. Nou bezwen nou servis ki swa labank, ki swa lakonpannyen lasirans zot in eksplik nou byen. So i bezwen transparan. I bezwen fer sir dimoun i konpran. Ki bann Lagreman ki zot pe antre ladan.

So sa i responsabilite sa bann *service providers*. Me i osi responsabilite konsonmater, pou edik zot lekor lo bann servis e prodwi ki nou pe pran. Pou fer sir poudir ki zot oblize, tonm agree ek zot bann kontra e lobligasyon ki zot sinyen.

The fine prints. Si nou pa konpran, rod en led ek en fanmir, ek en zanmi, si ou kapab *afford* en *lawyer*. Solman asire poudir ou konpran, kwa ki ou pe antre ladan. E ki koumsa demen, nou pa blanm personn.

E i annan nesesite Mr Speaker, pour ki sa *Bill* i vini, parske enn lakantite konplent ki'n annan, *from piblik*, dan servis ki zot pe gannyen, bann servis finansyel. Ant 2017-

2019, i annan plizyer konplent. Par egzanp zis 2017, mon pe get so sit *web* Labank Santral la, dan zot rapor anyel, zot annan en latab ki koz lo *complaints lodged at Commercial Banks* ant 2017-2019.

2017-1298, an 2019 1588, e an 2019- 2260. Sa kot bann Labank Komersyal ki'n anrezistre, diferan ki annan. Sa ki'n ariv kot Labank Santral akoz normalman letan i annan en konplent, ou bezwen al direk kot ou labank, ou sey rezourd, e si prezan i pa marse, la i ariv kot Labank Santral.

E Labank Santral li, in anrezistre 37 konplent an 2017, an 2018 - 8, an 2019 - 35. E sa bann konplent, i varye. Depi problem konsernan *cheques*, problem konsernan *loan*, problem konsernan *ATM*, larzan ki ganny tire lo kont dimoun san lotorizasyon.

Zis zot vwar zot kont i redwir. Bann fo sinyatir ki ganny fer, bann konplent konsernan *internet banking*, propriete ki abandonnen dan labank, bann kont ki *dormant*. So i annan diferan, lalis i long. Enkli menm *foreign exchange* bann keksoz koumsa.

Donk i pe afekte diferan dimoun, e sirtou pandan letan *COVID*, ki'n en move keksoz pou lemonn. Me en bon keksoz

ki'n annan ek COVID se ki nou vwar volim tranzaksyon nimerik, bann tranzaksyon *online*, ki swa peyman, ki swa aste in monte.

Ler sa i monte ki i fer? I ekspoz dimoun fas a bann risk. Swa zot fer fot zot menm, swa i annan dimoun ki pran lavantaz avek zot. E an Novanm lannen pase, mon rapel mon'n vwar, en reportaz dan medya kot, Lasosyasyon Banker, in koze lo sa size, poudir bokou dimoun in vin kot zot avek bann diferan konplent, fas a bann tranzaksyon ki zot ti pe fer *online*.

Alor mon krwar poudir, enn fwa ki sa Lalwa, i vin anmars, i pou annan en *level playing field*, pou konsonmater trouv en rekour. E pou osi bann *service provider*, kapab mye zer bann konplent ki annan. E alor, i ava permet ki nou pei, i ava annan bann, bann keksoz en pe pli modern dan benefis tou dimoun.

Mr Speaker parey *Leader of Government Business* in dir nou bomaten, dezormen, ti annan en lantant ant Lasanble Nasyonal avek *Human Rights Commission*, ki dezormen bann Lalwa ki vin kot nou, zot pas ladan, zot regarde. Pou asire ki i *rights-based*.

Akoz nou bezwen fer sir poudir letan i afekte konsonmater, i afekte sitwayen, se ki sitwayen i ganny *the best deal possible*. So personn pa pou ganny blanmen, nou ankor pe sey travay lo bann modalite.

Donk zot in fer zot rapor 32 paz, vini bomaten ki nou'n gannyen. Nou ti a voudre annan en pe plis letan, parey *LGB* in dir pou nou pas ladan. Solman an zeneral, zot in rekonnet, zot in rekonnet poudir sa *Bill* i al dan bon direksyon.

Par egzanp, zot in fer referans pozitiv lo *Clause 15 (7)* ki dir, ki tou bann group vilnerab, i bezwen ganny trete byen. Zot in apresye sa. Zot in osi koz lo *Clause 16(3)* avek (4) ki'n koz lo kestyon lenformasyon. E asire poudir, bann lenformasyon i dan fason ki dimoun i kapab ganny akse avek.

Zot osi vwar poudir sa *Bill* i reflekte en pe sa ki langaz nou Konstitisyon Lartik 28(1) i koz lo la. Avek akse avek lenformasyon ofisyel. Donk i ale dan bon direksyon. Solman zot eksprim serten konsern.

E sa bann konsern i prensipalman pou fer avek, eski sa *Bill* i pa enpakte lo drwa bann konsonmater. Par egzanp sirtou, pou fer avek *fair*

hearing? E mon zis pas vitman Mr Chair.

Dan bann Seksyon *Bill* ki *Human Rights Commission* i santi i kapab annan en pe, difikilte avek. Par egzanp Seksyon 4(2) Seksyon 5(3) Seksyon 6 e Seksyon 7, zot santi poudir i kapab, an kontrayete avek Preanbil Konstitisyon. Seksyon 8(3) i kapab an kontrayete avek Lartik 19(7).

Seksyon 9(1) e 10(2) i kapab an kontrayete avek Lartik 20(1) e 20(2) i osi annan size lo kestyon Lartik 19(7) ki zot in fer referans avek. E Seksyon 12(1), 12(2), 12(3) e Seksyon 13, ki zot le port nou latansyon lo la.

Lartik 34 Konstitisyon, zot oule nou regard li, anliny avek Seksyon 25(6) sa Lalwa. E i annan zis de Lartik ankor, ankor Lartik 20(1), e 20(2) ki zot fer referans avek Seksyon 29(2) e Seksyon 30(1).

Preanbil i ganny renonmen ankor, pou Seksyon 35(d) e 36(1). E finalman Mr Speaker Lartik 19(7) an relasyon avek Seksyon 38.

Sa i bann i komanter ki *Humans Rights Commission* in anmenn kot nou.

Me an zeneral Mr Speaker, zot santi poudir i al dan bon direksyon. E mon pe *look*

forward, ki nou kontinyen annan sa enteraksyon avek zot, pou asire ki bann *Bills*, ki vini i *rights-based* parey nou pe dir.

E alor avek sa de mo, mon ava remersi tou dimoun pou zot latansyon. Mersi.

MR SPEAKER

Mersi Onorab Henrie. Napa lot entervenan dan sa deba. Donk mon a apel Minis Hassan pou fer son Repons lo deba lo sa *Bill*. Minis.

MINISTER NAADIR HASSAN

Mersi Mr Speaker e mersi tou bann Onorab pou zot bann kestyon komanter e sipor lo sa *Bill*.

Mon a konmanse avek adres bann *issue* zeneral ki'n leve apre mon ava bouz lo bann ki pli spesifik.

Sa Lalwa li menm li ler ou regarde, i pe met fondasyon pou proteksyon konsonmater dan servis finansyel.

Avan sa ti annan en Lalwa zeneral *Consumer Protection Act*. Me vi ki servis finansyel i annan bann *specificities* asosye avek, sa akoz nou ti bezwen Lalwa spesifik pou adres bann *specific issues* ki pou rankontre dan ler ou servi bann servis finansyel. So sa Lalwa li i vin sa fondasyon.

Me lo li menm li sa Lalwa i pa pou adres tou bann *issue* ki'n leve ozordi e ki nou konnen bann *issue* ki manm piblik i annan.

Me i form sa fondasyon. I sa Lalwa ki pou asire ki tou bann lenformasyon i ganny donnen avek kliyan ki ed kliyan fer en swa enformen, i asire ki i annan bann standar ki bann lenstitisyon i bezwen swiv e si zot pa swiv i annan provizyon ki bann regilater i kapab pran aksyon pou sanksyonn zot. Sa i labaz sa Lalwa.

Me parey mon'n dir 1 oli menm i pa pou adres tou *issue*. Enn bann pli gro *issue* ki leve se pri, pri nou koz li lentere.

Ozordi nou dan en marse lib, so regilater pa pou zanmen preskri pri. Me konpetisyon ki desid pri, marse ki deside.

Me ki nou vwar pou konpetisyon marse i bezwen *frictionless*. I bezwen ki bann lobstak i ganny tire. E sa i en keksoz ki mon ti mansyonnen dan *speech* Bidze 2022, ki mon ti'n manda Labank Santral e sa i en legzersis ki zot pe fer, pou get tou sa bann lobstak ki anpes dimoun bouz lo en lenstitisyon - ok?

Akoz ozordi pou konpetisyon marse, fodre si en dimoun i vwar poudir laba i pe ganny en pli bon pri i kapab

bouze. Me i pa fasil pou fer li ozordi. Ozordi si mon ava donn en legzanp, si ou annan en *loan* ki ou pe pey 10poursan avek ABSA, me en lot labank *let's say MCB* i ofer ou 7poursan.

So *ideally* ou sipoze kapab bouze. Fasilmán e avek pa bokou kou. Me ozordi ou pa pou kapab bouze. Ou pa pou kapab bouze akoz i pou kout ou pli ser ek tou sa bann lezot keksoz ki vini pou ou bouze.

Me nou bezwen tir sa bann lobstak. E sa Labank Santral in ganny mandate pou fer sa louvraz, idantifye tou sa bann lobstak e donn bann provizyon legal pou nou fer li pli fasil pou sa bann keksoz bouze.

So sa ki mannyer ou pou ganny konpetisyon pou arive kot enn i *compete against* lot, e a lafen defen pri i desann e lezot i e kliyan i benefisyé.

Nou bezwen osi kontinyen sa linisyativ ledikasyon *awareness*, e sa mon konnen Labank Santral ek *FSA* pe fer en kantite e i bezwen kontinyen, se avek en piblik ki pli byen formen lo so drwa e ki mannyer bann diferan prodwir i marse, ki zot pou kapab fer bann desizyon enformen e met sa presyon lo zot labank - ok?

En lot pwen se bann *financial services provider* zot bezwen modernize. Ozordi mon

sorry pou dir sa, me ki bon evolisyon i arive dan *financial services* bokou nou bann lenstitisyon pa ankor bouze. Zot an retar.

E bokou bann prosedir ki an plas, se bann prosedir ki ti dan lannen '80 '90 me keksoz in evolye. Me sa *mindset* dan bann lenstitisyon pa ankor evolye, pou zot vin pli modern, servi teknolozi *modern processes*. So mwan mon fer en *call* pou bann *service provider* pou zot modernize ki ler ou pe *apply* en servis, en prodwir en *loan* ki zot kapab fer li *with less demokrasi*.

En katriyem *issue* pou ede dan sa lager pou fer nou sistenm finansyel vin pli modern, e *at the end of the day* protez konsonmater, se *training* e kapasite *building* dan bann labank.

Mwan mon'n eksperyans sa. Ou al dan en labank. Sa dimoun ki ou pe koz avek pa konpran sa prodwir, ou sa servis ki i pe koz lo la avek ou. e mwan mon annan en 15an mon'n en regilater labank e mon konn byen sa bann keksoz e ou vwar i pa konnen.

Savedir mon pa blanm sa dimoun mwan. Mon blanm sa lenstitisyon ki pa'n donn *training*. Mwan mon'n vwar plizyer *profit and loss* labank.

Training i zero. Savedir zot pa pe envestir dan kapasite ki mannyer kliyan pou ganny en bon servis. Nou pe koz *customer service experiences* si labank pa pe envestir pou *train* zot staff. So sa i en keksoz ki bezwen ganny adrese.

Me si mon bouze pe lo bann komanter spesifik, e i annan komanter vreman pertinan ki'n Onorab Hoareau in fer, se bann labank i mefye zot kliyan. Mwan osi mon'n vwar sa.

E dan langaz teknik nou dir bann labank *are risk averse*, zot pa oule pran risk. E ler mwan mon analiz sa zot pa oule pran risk, akoz zot napa en sistenm efikas e modern pou *manage* risk.

Akoz risk *either avoid* ouswa ou *manage* ou *mitigate*. E mwan mon santi poudir bokou labank zot pa'n *build* kapasite *it goes back to institute of training*. Zot pa'n moderniz zot lensritisyon. Prezan ler zot pran en risk poudir mon pou donn en *loan*, zot pa konfortab ler ou pa konfortab zot dir ou be mon pa pou donnen. Zot rod tou leskiz pou pa donnen. Akoz zot pa kapab *manage* sa risk.

So mwan mon fer en *call* avek bann labank pou modernize e *upgrade* zot *risk management*.

Lo kote kou lateral *guarantee*, kou lateral i enportan pou tou labank, akoz sa i en mezir pou zot *mitigate* risk pou en dimoun pa peye.

E sa *issue of guarantee* mon antyerman dakor avek bann komanter ki'n ganny pase. Ozordi kot nou ete sa *issue of guarantor* i *irrelevant*. E labank i bezwen realize poudir pa akoz dan lannen '80 '90 nou ti rod *guarantor* ozordi nou kontinyen fer parey. Personne mwan mon pa pou *advise* personn pou *guarantor* en dimoun. Akoz ou pe pran en risk lo ou.

Selman labank pe pran *guarantor*. So sa i bann keksoz ki bezwen sanze dan labank i bezwen moderniz zot. Les en pe parey en Onorab in dir i pa demann ou enn, i demann de.

Sa i bann keksoz ki en Lalwa ouswa en regilater pa pou kapab fors ou fer sa. Fodre ou lespri menm i dir ou poudir nepli fer sans.

Lo sa *issue dividends*, sa ler pandemik *COVID* ti arive, Labank Santral ti met en restriksyon lo *dividends*. E rezon akoz i ti fer sa se ki si ti annan en kriz banker, bann profi labank ti pou reste dan labank, pou zot kapab abzorb *any loss* ki zot gannyen ok?

E sa ti en bon *move* akoz prensipalman se ou bezwen *protect the depositors*. So ou bezwen kit sa profi e si i annan loss sa profi i abzorb bann *future losses*.

Me mon *aware* mon'n ganny enformen ki Labank Santral in retire sa restriksyon. E bann labank la prosedir se zot *apply* avek Labank Santral poudir be baze lo mon kondisyon finansyer mon kapab pey sa *dividend* e Labank Santral i fer son analiz e i donn permisyon.

Mon'n ganny enformen ki poudir dan *AGM Commercial Bank*, pou annan en *proposal* lo kote *dividends payable* me sa i a ganny anonse dan *AGM*.

En lot komanter ki sa enn Onorab Arissol in mansyonnen se lenportans problem kou larzan. Mon'n ganny en kantite dimoun en kantite biznes dan mon *previous louvraz* ki *call* ou, ki vin vwar ou zot pa kapab ganny en *loan*.

Me zot pa'n zanmen *bank* zot *income*. I annan i dir ou pou li pa pey *tax*, pou isi pou laba. Me si labank pa konnen ki kantite larzan ki pe rante dan ou kont, ki mannyer i pou konnen poudir be ou kapab repay sa *loan*. So lenportans pou *manage* ou finans e fer sir ki ou *income* pe antre dan ou kont.

Akoz demen i sa menm lenformasyon ki labank pou servi pou evalye ou *loan*. So sa i sa ledikasyon ki nou bezwen anmennen.

Sanmenm sa mon dir. Sa pou nou ganny en sistenm konpetitiv e efikas dan sistenm finansyer, tou dimoun i bezwen zwen son rol. Regilater i bezwen zwen son rol, kliyan i bezwen zwe son rol, bann lenstitisyon i bezwen zwe zot rol, pou li marse.

Lo kote lasirans, mon krwar la i annan pe louvraz pou fer. I annan en pe louvraz pou *FSA* fer, akoz i ankor en sekter ki ankor annan sa mister ki mannyer i marse.

Ou konnen tou dimoun in bezwen pran en lasirans lakaz, en lasirans loto, me nou zis pran nou peye zour i ariv en *claim* nou ganny tou sord kalite problemm. E mon pa'n zanmen mwan fer en *claim* ki lasirans pa'n sey rod en fason pou pa peye. Mon krwar i dan zot *play book* poudir avan nou peye, annou get tou sa fason pou nou *avoid* peye. Sa mon krwar tou dimoun i sa - i konnen.

E menm ti annan bann *Clause* dan lepase ki dir ou si *an act of God* i pa kouver. Me mazorite lensidan dezas pou arive is *an act of God*. Be savedir sa ki ou'n peye - *ok?*

So sa i bann keksoz ki ou bezwen gete sa i bann *unfair Clause* ki pou bezwen ganny regarde. E i pou bezwen an *full disclosure* lo bann *exemption*. Ou pa kapab pa'n en lasirans selman dan *fine print* i ganny *exempted* ladan *ok?* So sa i en keksoz ki *FSA* i pou bezwen gete.

Mon ava adres en lot *issue mortgage protection*. Sa lasirans ki nou pey ler nou pran en *loan* lakaz. *On average* mon'n fer sa louvraz dan lepase i tonm apepre 5poursan kantite *loan* ou pe pran.

Dan mon pwennvi *this is the biggest rip-off* ki annan Sesel. Mon a eksplike akoz. Ou pey 5poursan ou valer *loan* pou protez ou. Si ou *pass away* ouswa ou ganny *permanent disability* ki zot kouver ou *loan repayment*.

Mon ti *go back* en peryod 10an. Ki kantite *claim* i ganny fer? E i pou sirprann zot. Mon krwar i ti 0.0 *something* poursan.

Savedir i preski napa *claim* ki ganny fer, vreman rar i annan en *claim* ki ganny fer lo la. Me ou koz lasirans ou *premium* i baze lo *probability of claim*. Me si ou *probability of claim* i *low* selman ou *premium* i *high*. Sa i en keksoz.

E dezyenm lo la, si mwan mon en labank, mon'n fer mon evalyasyon mon konnen poudir *probability of claim* i 0.0 savedir *the probity* pou dir en dimoun pou mor, ouswa pou ganny *permanent disability so low*. Akoz mon bezwen ensiste ek en kliyan? Mon'n deza annan son lakaz *as collateral*. Mon ti ava fer li opsyonnal si ou oule protez ou fanmir si ou'n *pass away*, zot ganny proteze ki labank pa vin sezi zot lakaz, sa i opsyon. Be akfer fer li mandatwar?

Mwan si mon ti en *manager* en labank mon ti pou fer li opsyonnal. Me selman ki arive? Annou pa blye poudir ler ou *mortgage protection assurance* i ariv R150,000 sa R150,000 la ou pe al pran *loan* ek labank menm, ki pe sarz ou lentere li. Savedir li i gannyen labank, lasirans i gannyen. sa i bann *practices* ki regilater pa pou kapab *clam down* lo la.

Me nou bezwen met presyon lo sa bann lenstitisyon pou modernize pou aret *rip-off* dimoun.

Lo dernyen pwen *Treasury bond* prosedir Labank Santral se ki i pa sipoze annan okenn lenformasyon sorti avan en *treasury Bond* i ganny issue.

E si i ganny issue on tap i *first come first serve*. Me i posib ki i annan serten dimoun Sesel

i ptipti, ki li akoz i pe travay lo sa dosye i konnen i dir dimoun X - dimoun Y. Me sa i pa ganny drwa fer. i *against the Code of Conduct* Labank Santral.

E si i ganny prouve poudir i pe donn en *insider info* aksyon disipliner pou ganny pran. Me i bezwen ganny prouve. Me anba *Code of Conduct* Labank Santral pou Minister Finans osi pa pe kapab donn *insider info* akoz sa i baze lo en *first come first serves* si ou lentere i *fix*. Si i lo en opsyon sa i en lot prosedir, ou bezwen bid e *the one with the best bid* i gannyen.

Avek sa Mr Speaker mon krwar mon'n adres mazorite pwen. Mon ti ava'n swete osi ki mon ti'n kapab adres bann pwen ki *raise by Lopozisyon*, me zot pa dan lasal e mon swete ki apre zot pa vini poudir mon'n kasyet lenformasyon. Mon'n fer *state secret*.

Ozordi mon'n vin dan Lasanble bann teknisyen in pran zot letan in vini pou reponn tou kestyion. E *unfortunately* zot pa la e mon zis swete ki demen mon pa ganny akize ki mon'n kasyet lenformasyon - *anything*. Ozordi mon'n vini pou reponn tou kestyion.

Avek sa Mr Speaker mon ti ava kontan remersi bann Manm

LDS pou zot sipor e ki zot ava aprouv sa *Bill*. Mersi.

(APPLAUSE)

MR SPEAKER

Mersi Minis. Bon nou ava aprezan pas lo vot lo sa *Bill* lo *general merit*. Manm ki a faver lev lanmen silvouple? *Thank you.*

Lo *general merit Financial Consumer Protection Bill, 2022* 18 Manm in vot pour, 0 kont e 0 abstansyon. Donk sa *Bill* in aprouve lo *general merit Second Reading*. E pou konplet sa staz Madanm Clerk i ava fer *Second Reading*.

MADAM CLERK

Mersi Mr Speaker. A *Bill for an Act to protect the interest of the financial consumers to fairly reasonably and effectively handle financial consumer disputes and to promote the development of financial sector for the matters connected therewith or incidental thereto*. Mersi Mr Speaker.

MR SPEAKER

Mersi Madanm Clerk. Nou ava pran poz la e nou ava retournen 11er en kar. Mersi.

(BREAK)

MR SPEAKER

Bon *welcome back* Minis e ou *panel*. Nou ava pas dan Staz Komite pou nou kontinyen avek *Bill* avek *amendment* ek klarifikasyon *Sergeant please*.

E lo kote *Bills Committee* lekel ki pou diriz propozisyon? Onorab Andre.

HON CLIFFORD ANDRE

Mersi Mr Chair. Bonzour tou Manm Onorab, absante prezan. Bonzour Minis avek ou delegasyon e tou dimoun ki a lekout.

Nou ti zwenn semenn pase, avek serten manm *panel* pou nou pas lo sa *Bill* e parey nou rapor i dir ki i nou pa vwar nanryen ki konmsi i pa *Anti-Constitutional*. Alors nou pou zis pas lo bann lamannman ki nou'n tonm dakor.

Dan son tit li menm, i pou lir koumsa "*an Act to protect the interest of financial consumer*" so nou pou delete 'the' la, pou fer li "*reasonably end effectively handle financial consumer disputes and to promote the development of the financial sector*."

Apre i annan bann *removal* ek *insertion* ki nou'n dan sekssyon 2 (2). Mr Speaker mon pou al pou sa enn paz apre nou ava get *panel* ki zot dir lo la.

Mon lo paz 7 la, nou osi annan koreksyon pou fer dan 3 dan *advertisement*, i annan koreksyon ladan. E osi dan son laliny avan dernyen, i osi serten koreksyon ki'n ganny fer dan 'bundled' ki mannyer ti ekrir avan, 'bundling' sorry, in ganny sanze e ladan osi i annan bann *insertion* avek bann *removal* ki'n ganny fer.

MR SPEAKER

En *instant* Onorab Andre. Si ou permet. *Panel* mon sipoze i familye avek prosedir Onorab Andre kontinyen *unless* zot lev lanmen pou entervenir oubyen en lot Manm i lev lanmen pou entervenir.

An vi ki bann koreksyon, bann sanzman ki pe dir in fini dakor avek zot. Donk mon ava donn laparol Onorab Georges la.

HON BERNARD GEORGES

Mersi Mr Chair. Mr Chair mon pe *focus* lo *bundling of services* e mon vwar ki i annan en provizyon pou sanz li pou vin *bundle services or product*. *Panel* i ava dir nou lekel ki zot prefere.

Me si nou pou al lo bann *bundle services or products* nou pou bezwen fer plizyer lamannman to the meaning itself.

Akoz 'bundling of services means selling two or more.' Me si 'bundle services' it will have to read means 'two or more services or products in a package' offered for sale for an instance ok although each, alor nou pou bezwen sanz son konteks. *Panel* i ava diriz nou if they prefer to remain with 'bundling' and the current definition oubyen si zot anvi al lo 'bundle with the amendment to the definition. 'Mersi.

MR SPEAKER

Panel. Minis ou ava diriz nou lekel ki kapab? Yes Mrs August.

DIRECTOR LEGAL SECTION FSA TARYN AUGUST

Mersi Mr Chairman. Mersi Onorab. So nou *ok' with bundle services of products*. '

MR SPEAKER

So the reading ki ou pe propoze Onorab Georges.

HON BERNARD GEORGES

Mersi Mr Chair. Si nou pou sanz li pou vin 'bundle services or products' nou pou bezwen dir means cross out 'selling - 'means two or more services or products in a package' - or 'two or more products offered for sale in a

package although each subservice or product is also available for sale separately in the market.’ I pou bezwen lir koumsa to make sense. Mersi.

MR SPEAKER

*Panel Manm yes panel.
Yes madanm.*

**DIRECTOR LEGAL SECTION
FSA TARYN AUGUST**

Dakor

MR SPEAKER

*Dakor. Yes Onorab Andre
please.*

HON CLIFFORD ANDRE

*Mersi M Chair. Mr Chair apre nou annan osi propozisyon pou nou amann *Competent Authority - definition of Competent Authority*. Mon pou lir sa enn akoz pou nou ganny en konpran, akoz subsequently avan ki nou ti'n fer nou ti'n *panel* ek nou dan *meeting*, nou ti'n dakor pou nou sanz partou kot i annan ‘authorities’ pou met ‘authority.’*

Prezan sa definisyon ki nou pou fer la i pou gard partou kot i annan ‘authorities’ ek kot i annan ‘authority’, so nou pa pou bezwen fer sa sanzman pou nou kapab gard sa lafason constituency ki i ladan.

So mon pou lir ‘Competent Authority (b)’ i pou lir koumsa ‘in respect of entities specified in part (b) of the schedule shall be the financial services authority.’

Epi nou pou annan ‘and Competent Authorities shall be construed accordingly.’

MR SPEAKER

Yes sir? Madam.

**DIRECTOR LEGAL SECTION
FSA TARYN AUGUST**

*Nou dakor ek sanzman.
Mersi.*

MR SPEAKER

Good. Onorab Georges.

HON BERNARD GEORGES

Mersi Mr Chair. Mon kontan ki sa in arive. E mon pe zis alert tou bann Manm ki anmezir ki nou pou ale in certain places nou pou gard ‘Competent Authority’ akoz i pe refer to one of the two. E dan serten landrwa zot in met ‘Competent Authorities’ akoz it’s a joint venture. Mersi.

MR SPEAKER

Thank you. Onorab Andre .

HON CLIFFORD ANDRE

Yes mersi. Ki nou pou fer Mr Chair, bann landrwa kot

bann ki pe get zot *track version*, zot pou vwar ki nou ti'n sanze from 'authorities' to 'authority'. So nou pou zis revert li back to 'authorities' kot i annan e 'authority' kot i ete. So mon ava sey gid zot ofir nou ale anmezir.

Nou annan en definisyon lo *financial services provider*. Nou annan sa komanter ki ti ganny dir pou fer li vin *interchangeable*, so sanmenm sa in annan serten koreksyon ki nou'n fer lo la.

Mr Chair letan nou al lo *part 11* ki lo paz 9 so sa lamannman ki nou ti'n fer dan 'authorities' to 'authority' i retourn 'authorities' menm zafer ek 'regulation by Competent Authorities.'

E dan 4 (1) nou retourn li 'authorities.' Dan 4 (2) nou osi gard li 'authorities.' Menm zafer dan 4 (3) e osi kot i met *role of Competent Authorities.*'

Lo paz 10 menm zafer pou 5 (1). Dan 5 (2) Mr Chair *proposal* se pou met 'a Competent Authority' instead of 'the Competent Authority.'

E osi i annan koreksyon ki'n ganny propoze dan *sub 3 removal of 'that of'* dan dezyenm laliny.

Nou bouze Mr Chair nou al lo 6, 'a Competent Authority' menm zafer dan 7.

MR SPEAKER

Un instant Onorab Andre. I annan en lanmen ki'n ganny leve. Onorab Henrie.

HON GERVAIS HENRIE

Sorry Mr Chair, zis pou nou ou'n arriv 6, so i annan en zafer dan 4 (2) ki mon ti pe en klarifikasyon silvouple pou nou netway en ptigin an aryer. Dan 4 (2) i dir i annan bann ka ki kapab leve kot Fair Trading avek Competent Authority ki mon mazinen swa CBS ouswa FSA, i kapab kolabore.

So mon ti pe rod en lenstans spesifik ki zot antisipe i ava en pe pli kler dan nou latet dan ki konteks ki sa de antite i kolabore ? Mersi.

MR SPEAKER

Mersi panel i ava kapab komant lo la. yes madanm.

DIRECTOR LEGAL SECTION FSA TARYN AUGUST

Mersi Mr Chair. So mon ava donn ou de legzanp Onorab ki nou'n gannyen dan lepase.

Fer par lenstans nou annan en labank ki pou facilitate servis ki annan ek son kliyan, in donn en lakonpannyen lasirans en pti plas dan son labank pou konplimant son servis. So si mon pe vin rod en servis ek

labank, ou dir mwan koumsa ou deza annan en lakonpannyen lasirans ki ou rekomande.

So i annan lenstans ki nou lyez avek *FTC* e osi *FSA as well* pou gete si sa pratik ki en pratik ki byen *ok?*

Dezyenm lenstans i kapab ariv en lenstans kot ou pou vwar i annan dimoun ki pe *advertise zot prodwir or zot rates in foreign exchange ok?* So, sa osi i lenstans ki nou lyez avek *FTC* pou gete *whether or not* si i annan opsyon pou sa kliyan or so pay an Roupi or in compliance ek the *Foreign Exchange Act*. So sa i de lenstans ki nou annan langazman avek *FTC* lo sa kote. Mersi.

MR SPEAKER

Thank you. Onorab Andre ou ava *take up* kot ou ti ete.

HON CLIFFORD ANDRE

Mersi Mr Chair.

MR SPEAKER

Sorry Onorab Henrie ou ok ek sa ou *ok. thank you.*

HON CLIFFORD ANDRE

Wi Mr Chair nou'n ariv lo 7 kot nou dir *a financial service*, nou annan lamannman ki nou'n fer dan 8(1) dezyenm

laliny, 8(1)(a) lamannman *removal of the*. Menm zafer dan 1(b) - 1(c) e i annan *insertion* ki nou'n fer dan dezyenm laliny dan 8 (2) ki lo paz 11 Mr Chair.

Nou osi annan en lamannman ki'n ganny fer lo paz 12 dan 9(1) - 10(1) ek osi 10 (3). Lo paz 13 i annan mon pou lir 11(1) akoz i paret sibstansyel "*every financial services provider shall maintain physical records of all transaction and correspondences*" nou tir sa 's' "*between the financial services provider and the financial consumer for a period of not less than 7 years from the date of the last transaction between them.*"

MR SPEAKER

One second. Mon annan en lanmen ki'n leve - Onorab Arissol.

HON SANDY ARISSOL

Mersi Mr Chair. Mon ti anvi zis en pti klarifikasyon *in regards to records maintained by financial service provider.*

Minis letan nou pe koz *maintain bann physical record, between the two partner*, eski nou pe koz an relasyon avek labank par egzanp? Si letan par egzanp i annan de fwa nou vwar dan Nasyon kot labank i pibliy non bann dimoun ki zot kont par egzanp i dormi, pa pe

fonksyonnen. Eski i an relasyon avek sa ki nou pe koze? En legzanp.

Letan i pe pibliy bann *financial services to maintain physical record*, eski sa ki pe dir sa pwen? Mon ti ava kontan zis en pti klarifikasyon. Mersi Mr Chair.

MR SPEAKER

Thank you. Panel ou ava klarifye.

DIRECTOR LEGAL SECTION FSA TARYN AUGUST

Mersi Mr Chair. So ki nou pe *mean* la ki sa *requirement* i deza la lo tou antite ki Labank Santral ek Lotorite ek servis finansyel i *supervise*.

So la ki nou pe dir tou bann dokiman ki bann labank i annan an relasyon avek bann kliyan. *Abandon property* li i swiv en *frame work* ki separe according to a *guideline* ki Labank Santral in *issue* to bann *Financial services*.

So la nou pe koz lo zis bann lenformasyon ki labank i devret anmase. Sa i enkli ou bann Kontra ki ou'n sinyen ek zot. Si ou annan rikord enteraksyon ki ou'n annan ki zot annan avek kliyan osi zot bezwen kite.

Ou bann keksoz ki pase lo ou kont ou bann tranzaksyon

tou bann papye ki ou'n sinyen pou otoriz bann peyman sa zot bezwen kite pou 7an. Mersi.

MR SPEAKER

Yes Onorab Arissol.

HON SANDY ARISSOL

Mersi Miss pou ou lenformasyon ki ou'n donn avek nou. Be mon ti ava kontan zisteman demann en pti klarifikasyon ankor *in regards to* letan ou'n koz an relasyon avek bann kont ki ganny abandonnen ki Labank Santral ou dir i annan en kad spesifik pou sa.

Me mon ti ava kontan konnen pou ou lenformasyon piblik ki pe ekout nou menm avek nou menm nou, ki arive avek bann kont ki ganny abandonnen ki zis la labank personn pa vini pou vin *claim* poudir sa larzan mon papa, sa larzan mon frer i la? Silvouple. Mersi.

MR SPEAKER

Minis.

MINISTER NAADIR HASSAN

Mersi Mr Chair. Onorab mersi pou ou kestyon. Sa provizyon ki *regulate abandoned property the Financial Institutions Act* en

Lalwa separe, ki gid bann labank.

So ki Lalwa i dir se ki son peryod apre 10an en kont i ganny *deem as abandoned property*. E dan son 11enm lannen sa larzan i ganny transfer dan Labank Santral. So i dan en kont Labank Santral.

E sa rikord i ganny mentenir par Labank Santral. Prezan ler en kliyan i vini pou *claim* sa larzan, i fer li *through* son labank, sa labank i anvoy sa *request* kot Labank Santral, e Labank Santral i rekonsilye sa *request* avek rikord ki i annan. E sa kliyan i ganny peye.

Me si i annan provizyon osi dan Lalwa ki Labank Santral ek Minister Finans apre en peryod letan, si i bezwen fer li i kapab *turn over* sa *funds to the state*.

Me to my knowledge mon'n dan sa louvraz apepre 15an, mon pa krwar in deza ganny fer. Savedir tou sa larzan ki'n ganny *handover to* Labank Santral i ankor ek Labank Santral. E si en dimoun i annan son bann dokimantasyon i fer sa prosedir *claim* e i ganny son larzan. Mersi.

MR SPEAKER

Thank you. Onorab Roucou.

HON MICHEL ROUCOU

Mersi Mr Chair. Minis mon osi tou mon pe rod en pti klarifikasyon parey Onorab Arissol.

I annan en pti pe ou kapab dir, en pti pe *misperception* parmi lepep Seselwa li menm li. Mon swete ki zot pe ekout nou byen la. Sirtou ler dizon parey mwan mon annan mon vye manman mwan, toultan in donn mon permision pou mon al tir son larzan ler i ganny son pti pansyon. Be zis konman li i *pass away* Labank i tant pou close sa. Ni mwan mon napa akse ek sa.

Aprezan i tant pou vin en pti pe problem akoz an menm tan ki sa dimoun li i pe fer demars lanterman ki sa i en pake presyon. Osi i vvar li bezwen al lager ek labank, akoz petet li sa madanm li, i pa ti pe mazinen si i pou mor demen, pou li al fer bann laranzman. La osi tou i annan en pti pe sa ou kapab dir sa presyon li menm li. Mersi.

MR SPEAKER

Yes Minister.

MINISTER NAADIR HASSAN

Mersi Mr Chair. Mersi Onorab. *to my knowledge once ki en dimoun i pass away, pou ou kapab akse son bann propriete asset,* Lakour i bezwen apwent ou as en egzekiter pou ou kapab akse sa.

Sa i rezon ki mon mazinen ki labank pa pou les nenport ki akse en kont, san ki sa dimoun i ganny deklare konman Egzekiter *to the estate.*

Sa is ki mon'n eksperyanse dan lepase. Mon pa konnen kekfa Onorab Georges i kapab donn en pe plis lesplikasyon. Mersi.

MR SPEAKER

Onorab Georges.

HON BERNARD GEORGES

Efektivman Mr Chair mon ti anvi en pwen lenformasyon. Premye pwen se sa bann zafer larzan ki bann *unclaimed deposit* ki arive avek?

Minis i annan parfetman rezon, me i pa zis dan sekter labank ki sa i arive. I en vye prensip Lalwa depi letan Romen *old Roman principle* ki apel *Bona Vacantia*. Ler i annan en byen ki nepli - ou napa kapab dir ki pou okenn dimoun, akoz sa dimoun in abandonnen, *whether i larzan labank or en morso later oubyen en loto*

whatever, sa i retourne pou leta anba en prensip Bona Vacantia.

Dezyenm pwen Onorab Roucou, i soulev ler ou vye manman i donn ou pouvwar lo ou kont i pe donn ou en *power of attorney basically* pou operate son kont. E en *power of attorney* ki i donn sa *power of attorney*.

Alor se pou rezon ki konman i mor ou nepli kapab access sa kont labank.

E Minis ou annan rezon ou bezwen pas atraver en egzekiter. Sa ki nou nou'n fer dan Lasanble dernyen Lasanble ler nou'n pas revizyon Kod Sivil, nou'n fer preznan ki oule al Ankour pou apwent en egzekiter si tou bann zeritye i dakor zot kapab fer li *by agreement.*

Alor i kapab vin en senp *agreement*, tou dimoun i tonm dakor en *text as egzekiter, X* preznan i al labank e i kapab tous sa larzan pou ede avek bann feneray eksatera. Mersi Mr Chair.

MR SPEAKER

Thank you. Back to you
Onorab Andre.

HON CLIFFORD ANDRE

Yes Mr Chair bann lesplikasyon ki in donnen, i ekselan, me selman letan nou

pe get seksyon 11 i pe dir bann avek labank avek sa bann *service provider*. So nou ava kontinyen i annan koreksyon ki'n ganny fer dan 11(3). I annan 12 (1).

Lo paz 14 Mr Chair i tonm dan 12 (1) (c,) 12(1)(2) i annan 12(2). 13 nou al lo paz 15 dan 15(1), 15(2), 15(3), 15(4), 15(5), 15(6) e 16(1). Mersi.

MR SPEAKER

Poz Onorab Andre. Wi Onorab Arissol.

HON SANDY ARISSOL

Mr Speaker lo 15(7) "*the financial services providers shall gives special consideration to the needs of vulnerable group.*"

Mon ti ava kontan ganny en pti lesplikasyon ki sa *special consideration* ki annan pou bann *vulnerable groups?* Mersi.

MR SPEAKER

Panel.

DIRECTOR LEGAL SECTION FSA TARYN AUGUST

Mersi Mr Chair. Mersi Onorab pou ou kestyon. So letan nou pe dir bann group vilnerab, i annan diferan kategori. I annan bann dimoun ki kapab dezabilite ouswa osi bann dimoun ki bann labank

pou pli konnen an vi ki zot ki lyez direkteman ek zot kliyan.

Bann kliyan ki pa neseserman annan sa nivo konesans lo bann servis e prodwir, ki pli ba ki lezot dimoun *ok?*

So letan nou pe dir *special konsiderasyon* zot bezwen annan enplimant bann mezir an plas dan labank, pou zot kapab *accommodate* sa bann group dimoun. *Whether it be* bezwen bann dimoun spesifik pou zot lyez avek, pou zot kapab ganny en lenformasyon plis dan lafason ki zot pou konpran, pou zot kapab fer en desizyon enformen. *Be it or so in terms of* si zot bezwen plis lesplikasyon osi ouswa plis gidans *as well*. So sa i bann *special consideration* ki nou pe mazinen.

MR SPEAKER

Yes Onorab Arissol.

HON SANDY ARISSOL

Ok lo menm laliny Mr Chair, parey Minis in dir ek nou taler poudir i annan sa bout *training* ki bann labank mazorite pa pe fer. Me mon *happy* avek lenformasyon ki ou pe donnen.

Me mon pe zis mazinen si dan laliny ki Minis in dir taler, i annan *training* pou bann

service provider pou zot kapab zisteman *cater* pou sa 15 (7) ki nou pe koz lo la, *in regards to special consideration* pou bann dimoun *vulnerable*. Mersi Mr Chair.

MR SPEAKER

Mersi. *Panel* in not komanter Onorab mon asire. Onorab Georges.

HON BERNARD GEORGES

Sorry Mr Chair mersi bokou. Mon'n regard en pti kou 15(5) e mon ti anvi propoz en pti lamannman ki nou'n manke dan dezyenm laliny – “ *shall put in place internal monitoring mechanism*’ mon krwar nou devret azout en ‘s’ avek silvouple. Mersi.

MR SPEAKER

Ok panel Manm i ok. mon krwar i fer sans. Onorab Andre *back to you*.

HON CLIFFORD ANDRE

Nou pou kontinyen lo paz 16 Mr Chair, koreksyon ki'n ganny fer dan seksyon 16(3)(b) 16(4), 16(5), 17(2), lo paz 17 nou pou annan koreksyon ki'n ganny fer dan 18(1)(b), 18(1)(c), 18(1)(d), 18(2) e 18(2)(a).

Lo paz 18(2) lo paz 18 i pou fer ki nou tonm dan seksyon 18(2)(d) akoz letan mon

pou dir 2 (d) petet (d) i pou tonm 18 (2) (f).

Apre nou pou annan 18 (3), 18(4), i *ok Minister?*

MR SPEAKER

Yes mon pa ankor vwar okenn lanmen leve. Alor yes Minis i anvi laparol.

MINISTER NAADIR HASSAN

Onorab mon ti pe zis get 18(2)(d) kot nou'n ranplas *the ‘security for the claim’* e nou'n ranplas li avek *loan*.

Mon pe mazinen si *claim* i en *wording* i pli *broad* ki en *loan*, e rezon ki ‘*claim*’ i ganny servi se ki ler nou pe koz lo *financial services provider* ou *engages* ek *lending* ‘*business shall carefully consider*’, i pa neseserman nou pe koz zis lo en *loan*, but it could be any *claim other than just a loan*. Thank you.

MR SPEAKER

Onorab Georges.

HON BERNARD GEORGES

Mersi Mr Chair. Mr Chair annefe sa set en lamannman ki mwan mon ti'n propoze akoz mon ti'n vwar dan (e) nou pe koz *the loan*. Alor se pou sa rezon ki mon ti vwar ki i ti pe *refer to the loan*.

Me Minis i annan rezon.
The claim is broader e pa tou financial instruments ki en loan, pa tou keksoz ki en consumer i pran ek en loan. So si panel i prefer the claim to the loan, personnelman as LGB mwan mon napa okenn problemm ek sa.

MR SPEAKER

Yes mon krwar panel i eksprim son lentansyon. Lo lezot Manm i ok? Byen. So sa amendment ki'n ganny propoze in aksepte.

HON CLIFFORD ANDRE

Non i pa en amendment kontrer Mr Chair i pou sa original wording i pou reste.

MR SPEAKER

Wi original wording.
Thank you.

HON CLIFFORD ANDRE

Ok so nou lo paz 19 nou annan dan 5, sorry dan 18 (5) Roman VIII. Nou osi annan dan 19, lo paz 20 nou annan koreksyon dan 19(3), osi dan 20 (1), 20(2), 21(3), 21(3)(e).

Lo paz 21 nou annan 22 (1), 22 (2), 22(3) ...

MR SPEAKER

Pause Onorab Andre.
 Onorab Georges.

HON BERNARD GEORGES

Mersi Mr Chair. Mr Chair 22 (1) mon'n vwar en pti fot ki nou pa'n korize dan dernyen laliny. "Such contract relating to any financial service or product" mon krwar non? Instead 'of'?

MR SPEAKER

Acceptable panel? That make sense? Service or product. Minis wi.

MINISTER NAADIR HASSAN

Mersi Mr Chair. Mon ok avek sa proposal. Mon ti anvizis go back to 18 (2) (e) zis apre kot nou'n met claim - (e) i pe dir the respective risk and benefits of the loan, again specific to a loan.

Mon ti pe mazinen or appropriate wording would be 'the facility.' Sa osi i ava kouver en pe pli broad sa.

MR SPEAKER

So annefe i en lamannman la, the original wording. Ok LGB thank you. Onorab Andre yes, take up.

HON CLIFFORD ANDRE

Mersi Mr Chair. Nou kontinyen lo paz 21, 22(2). Sorry 22(2) pou napa koreksyon akoz i plito 'authority' so partou kot i annan sa pou nou zis gard

li parey nou ti'n dir. I plito annan 22(3). Nou pou annan koreksyon dan 22(3)(c). Lo paz 22 Mr Chair nou pou ankor annan koreksyon lo 22(5).

Pou osi annan lo dan *title* dan *part V*. Nou pou osi annan koreksyon dan 23(1), 2 (2) pou napa koreksyon akoz i pou reste parey. Dan 23(2)(a) pou annan koreksyon. 23(2)(d) i pou annan koreksyon, 23 (3)24.

Lo paz 23 Mr Chair sa *flag* ki nou ti'n *flag* dan 25 (b) i poureste parey. Nou pou annan koreksyon dan 25(2) (b) nou pou annan koreksyon dan 25(3).

MR SPEAKER

*Un instant Onorab Henrie.
Non i ok, alright. Carry on.*

HON CLIFFORD ANDRE

Sa *flag* ki nou ti'n fer lo 25 (5) i poureste parey, akoz sa *wording* ki nou'n gannyen *initially* dan *authority* ek *authorities*.

Nou pou osi annan koreksyon dan 25(5) (b). Lo paz 24 Mr Chair nou pou annan koreksyon dan 25(6) - 25(6)(a).

MR SPEAKER

Eskiz mwan. Onorab Henrie.

HON GERVAIS HENRIE

Lo 25 (6) Mr Chair ki mon annan en klarifikasiyon. Kot sa *financial service provider* i pou ekri sa *financial consumer* li, avan i konmans bann prosedir pou *foreclose*.

Eski nou satisfe ki an ekrir i sifi? Parske nou kapab pe koz propriete en dimoun. E swa sa dimoun avek sa bann problemm ladres Sessel, i annan posibilite ki sa dimoun pa ganny byen enformen avan. E zour i leve i napa en lakaz.

So are we satisfied only in writing? Mersi.

MR SPEAKER

Yes Ms August.

DIRECTOR LEGAL SECTION FSA TARYN AUGUST

Mersi Mr Chair. Mersi Onorab pou ou kestyon. So parey ou'n dir letan ou get nivo konplent ki nou annan lo marse, i annan de prodwir ki annan plis konplent.

I annan *debit card* bann tranzaksyon ki pa'n ganny otorize lo ou kont; *ya debit card*. Apre en lot laspe i *loan*. e letan nou gete i annan en ta defi parey bann Onorab in koze ozordi lo lafason ki sa prosedir pe marse *ok*.

So even to the extent lo garanter e lafason ki bann labank i pran zot debt recovery

process - ok? So en keksoz ki nou pe travay lo la konman en priyорite, akoz sa nou'n war en area ki nou bezwen tackle as a priority. I annan en ta issues ladan. E nou'n fini konmans travay lo la internally. I en regilasyon spesifik pou kredi.

E sa i pou kouver ki mannyer sa prosedir i sipoze marse *from the start* ler en kliyan i vin kot ou pou demann ou lenformasyon, ziska ler sa loan i fini e pou tous lo garanter e osi lo *dept recovery* ki mannyer i sipoze ganny fer dan en fason zis e pratik *ok?*

So nou pou detay plis sa bann keksoz dan regilasyon lafason ki bann labank i sipoze konport zot dan sa prosedir. Mersi Onorab. Mersi Mr Chair.

MR SPEAKER

Thank you. Onorab Georges.

HON BERNARD GEORGES

Mersi Mr Chair. Mr Chair mon kontan sa lesplikasyon ki panel in donnen, akoz annefe sa ki pe arive la sa lobligasyon la se enn ki par egziste ozordi kot i pa ganny forse pou en financial institution dir avek son kliyan, mon pe al *foreclose, obviously* dan 99 ka lo sans zot fer.

Annefe zot ekrir plizer let poudir *please pay otherwise* nou pou *foreclose* lo sa kestyon ki ou'n met an garanti. Akoz la i met i kapab en *collateral account*. I kapab ki ou'n donn en garanti lo en lot kont dan sa labank, ki fasil pou zot zis zot ava pran sa larzan e re-pey *loan*.

Oubyen i kapab en *pledge* lo en veikil ki en pe pli difisil, akoz li i annan en prosedir pourswiv. Oubyen i kapab en *mortgage* lo en later ki ankor pe difisil, akoz son prosedir i ekstrememan long e konplike avek bokou sans ki ganny donneen avek sa *debtor* pou li peye.

Sa ki mon kontan avek sa se ki prezan i obliz tou bann lenstitisyon finansyer, avan ki zot angaz okenn sa bann keksoz espesyalman sa enn premye ki ou'n siny en garanti lo en lot, lo en larzan ki ou annan dan labank, *at least* i ava donn ou en *warning* avan ki zot fer li. mersi.

MR SPEAKER

Thank you. Nou ava kontinyen Onorab Andre *pick up*.

HON CLIFFORD ANDRE

Mr Chair zis pou possibleman mon konpran mon

konsern Onorab Henrie, akoz in deza arive ki bann *case* in arriv Ankour kot labank pa'n donn lenformasyon letan in vann en propriete. I pa'n dir konbyen in gannyen.

Me selman sa dimoun i krwar in fini pey son *loan* e i pa re-pey nanryen i pa ganny okenn let, epi pli tar i al rod en lot *loan* i vwar li dan en sityasyon kot i ganny dir poudir be ou ankor drwa lo en *loan* ki ou ti annan. So i enportan.

Me selman Lakour in donneen sa bann gidans lo ou bezwen enform. Mon kontan la preznan i pe vin dan Lalwa, me selman parey Onorab Henrie pe dir, eski i neseserman zi an ekrir akoz i annan dimoun osi ki'n pran *loan* ki pa neseserman tro ofe avek lir.

Menm si i annan in ganny en let i dir ou in ganny en let, me selman ki mannyer nou fer sa, so nou swiv li par en *phone call*, oubyen dan regilasyon zot pou etabli sa bann mekanizm? Sa nou ava kit avek zot.

Prezan letan nou pou kontinyen lo 25 (5) (b) nou'n fini nou'n arriv lo paz 24 Mr Chair, dan 25 (6) ki lo la, 25, 26 (1), 26 (2) nou pou annan en koreksyon, me selman nou pou annan sa zafer '*authority*' ki nou pou gard li parey i ti ete.

Dan 27 nou annan koreksyon. Dan 28 i annan sa konsern ki ti koz lo bann *bundle services* i pou reflekte sa.

Nou annan 28(2), lo paz 25 nou annan dan 29.

MR SPEAKER

Pause please. Minis.

MINISTER NAADIR HASSAN

Mersi Mr Chair. Mon ti pe get kot ler nou'n sanz '*bundling to bundle*' i annan en *title* osi ki mon krwar ki nou pou bezwen sanze. Mersi.

HON CLIFFORD ANDRE

Nou pou fer li vin '*bundle and tying*'.

MR SPEAKER

Eskiz mwan. Si ou dir *bundle* eski ou pa bezwen *bundles services*? Onorab Georges oule fer komanter lo la?

HON BERNARD GEORGES

Mersi Mr Chair. Mr Chair mwan mon pa krwar ki nou, mon krwar pa ki i neseser pou sanz son *headnote*. Akoz i 2 laspe sa.

Enn se' *bundling of several products together*', enn se '*tying of several product, or tying Clauses*' ansanm.

E lefe ki nou pe '*define bundling and tying*', e apre nou

retourn lo en *bundle product* ki pa pou fer, mon krwar pa ki i pou annan problemm. *In fact* mon war ki *Legal Draftsperson* pe *nod*. Alor mon ganny en pe konfor.

MR SPEAKER

E Minis osi mon krwar in aksepte.

HON BERNARD GEORGES

E Mini osi pe *nod*. Mersi.

MR SPEAKER

Thank you. Yes onorab Andre.

HON CLIFFORD ANDRE

Ok, after the nodding nou a kontinyen. Nou lo paz 25. 29(1) nou annan koreksyon ki nou' tonm dakor. 29(3), 30(1), 30(1)(a). Lo paz 26, nou pou annan 30(2).

Nou pou osi annan dan 31(a). 31(b)(c)(d). Lo paz 27, 33(1), 33(2). Nou pou annan dan 33(3). Me selman '*authority*' nou pou kit li parey i ti ete.

33(4), 33(5), 33(6), 34(1), 34(2), 34(3), sa i lo paz 28. 35(2), '*authority*' nou pou kit li parey so i pa pou sa, sa pa pou aret dan 35(2), menm zafer ek 35(3).

MR SPEAKER

Thank you Onorab. Yes Onorab Georges.

HON BERNARD GEORGES

Mersi Mr Chair. Mr Chair annefe, sa bann sanzman la, ler nou met '*Competent Authorities*' i pou '*authorities*', i pa pou retourn parey avan.

Parey mon'n eksplike taler, i annan serten landrwa kot '*Competent Authorities*' as a generic i pli byen ki '*Competent Authority*' ki zis enn.

Par egzanzp la, tou lede Lotorite pou *prescribe regulations*. Pa neseserman zis enn. Alors se pou sa rezon ki dan serten landrwa nou'n gard '*Competent Authorities*' in the plural. Mersi.

MR SPEAKER

Thank you Onorab. Ou kapab kontinyen Andre.

HON CLIFFORD ANDRE

(off-mic)

HON CLIFFORD ANDRE

Mon a repran Mr Chair. Savedir si nou pe dir dan 35(2) ek dan 35(3), nou ava pran sa bann komanter ki'n ganny fer par Onorab Georges. Nou annan koreksyon dan 35(4), 35(5), 35(7), nou annan dan *heading* ...

MR SPEAKER

Pause please. Onorab Georges.

HON BERNARD GEORGES

Presizeman Mr Chair. Kot nou pe target en *Competent Authority* nou'n bezwen azout sa mo *appropriate, the appropriate Competent Authority* pou fer kler ki se sa Lotorite apropriye ki pou annan lotorite pou fer sa keksoz, e non pa tou lede neseserman.

Akoz en bann i kapab anvi, en bann i kapab pa neseserman fer li. Mersi.

MR SPEAKER

Thank you. Onorab Andre.

HON CLIFFORD ANDRE

Mersi Mr Chair. Nou pou annan koreksyon parey mon'n dir dan *heading, complaint handling, mechanism.* Nou osi pou annan koreksyon ki'n ganny mete dan 37, osi dan 37(b), sa i lo paz 29. Ti annan en komanter ki'n ganny diskite avek *panel* Mr Chair, lo paz 30, an referans avek 38.

So mon ava, vi ki mon konnen ki zot pe al dir. Mon ava donn *panel the floor* pou zot kapab eksplike ki zot, zot pe dir.

Akoz sa propozisyon ki'n ganny mete, ki'n ganny propoze par *LGB*, zot, zot pe santi ki i

annan sertern konsern. So mon ava les zot, mersi.

MR SPEAKER

Yes, panel i a kapab adrese.

**LEGAL DRAFTSPERSON
GULMETTE LESTE**

Mersi Mr Chair. So mon pou *refer to 38(a)*, spesifikman. Kot i dir, “*make an order or declare the whole of part of a contract made between the financial consumer who suffered or is likely to suffer loss or damage and the financial services provider.*”

So nou pe propoz, akoz en kontra *is between* en kliyan ek son lenstitisyon finansyel, *rather than* en kliyan ek sa servis.

So nou pe propoze ki ‘*financial services provider*’ i ganny kite la dan plas ‘*financial services provided.*’ Mersi Mr Chair.

MR SPEAKER

Yes Onorab Georges.

HON BERNARD GEORGES

Annefe sa i korek Mr Chair. Mon ti'n *query* li, me leksplikasyon i korek. Se pa *the service provider* ki *void ab initio.* Me se *the part of the contract between the consumer and the service provider* ki pou *void ab*

initio. So leksplikasyon i korek, mersi.

MR SPEAKER

Thank you. Onorab Andre.

HON CLIFFORD ANDRE

Yes. Mersi Mr Chair. Nou pou annan koreksyon dan 38(b), 38(2) lo paz 30. Lo paz 31, 40(2), 41(1). Lo paz 32 i pou fer ki nou annan lo 41(4), 42(2)(b), 42(1)(c).

MR SPEAKER

Sorry (1)(c) oubyen (2)(c)?

HON CLIFFORD ANDRE

Sorry, 42(2)(c), sorry Mr Chair.

MR SPEAKER

Yes, thank you.

HON CLIFFORD ANDRE

Nou pou annan lo 42(3) lo paz 33. Nou pou annan nou lo 43(1), 43(2), 43(4), 43(4)(c), 43(4)(d), 43(4)(e). Lo paz 34 nou pou annan nou lo 43(7).

Nou pou osi annan lo 44, sa i lo paz 34. Lo paz 35 Mr Chair, nou pou annan nou lo 45(3), 46, 47(1). E sa, epi 47(2). Selman li i avek sa ‘authorities’, so i pou retourn parey.

Avek sa Mr Chair, se sa bann travay ki nou’n fer koman *Bills Committee* avek *panel* ki ti

prezan. Mon ti a kontan remersye ou.

MR SPEAKER

Thank you Onorab Andre. Okenn lot demann pou lesplikasyon? Onorab Arissol.

HON SANDY ARISSOL

Mr Speaker mon ti anvi zis fer en pti propozisyon kekfwa avek *Bills Committee*. Sirtou letan zot pe propoz bann lamannman, konmsi osi pou bann dimoun ki pe ekoute deor.

Parske par egzanp letan zot dir 45(1), prezan ti ava byen si nou lir sa fraz pou ki sa dimoun deor i konpran ki sa lamannman nou’n fer dan sa fraz.

45(1), “*the Competent Authorities may make regulations to carry out the proposed and objectives and objectives of the Act.*”

Konmsi nou letan nou pe dir 45(1), 43(2), 72(1), i zis parey nou pe lir *bingo*. So nou pe al ganny en *jackpot* apre. Konmsi pou lenformasyon piblik dan sa travay ki nou pe fer, zis en pti propozisyon.

MR SPEAKER

Wi, mon konpran.

HON SANDY ARISSOL

Mersi.

MR SPEAKER

Petet Bills Committee ti a kontan adres sa.

HON CLIFFORD ANDRE

Mr Chair mon konpran i pa *bingo* ki nou pe lir, selman nou menm nou ki ti dir pa lir *bingo* - nou menm nou ki ti dir lir *bingo*.

MR SPEAKER

Wi.

HON CLIFFORD ANDRE

Akoz letan mon ti dir *comma* apre sa enn, i ale koumsa, nou ti ensidswit, ensidswit, nou menm ki ti dir dan Lasamble.

Prezan ki nou'n fer nou, nou'n plito al avek *panel*, sanmenm sa nou fer zot vini, nou tonm dakor lo tou sa bann, konmsi ki limero *bingo* nou pou lir.

(laughter)

HON CLIFFORD ANDRE

Prezan mon vin dir sa limero *bingo* dan Lasamble.

MR SPEAKER

Ok.

HON CLIFFORD ANDRE

Si nou pou retourne parey, annou, napa problem, me selman nou bezwen tonm dakor lo ki mannyer nou pou fer, metodolozi ki nou pou servi. Mersi.

MR SPEAKER

Ok. Permet mon promot en keksoz, propoz en keksoz avan mon retourne kot Onorab Arissol.

Enn bann problem avek mannyer nou ti pe fer avan, se ki ler ou ti dir 45(2), tir *comma* apre mo soz, koumsa - E apre *panel* ti bezwen dir wi *ok* mon dakor.

So sa ki mon pe, nou pe propoze, se ki ler ou dir sa soz, ou fer en referans avek ki kalite amannman in fer. Par egzanp dan 42(1) nou'n tir en *comma* apre sa mo.

E ou kontinyen. *Panel* i an fini dakor li, so sa prosedir dakor avek *panel* avan i esansyel pou nou limit sa sonus.

Me selman mon dakor avek Onorab Arissol, dimoun ki pe ekoute, pe demande ki nou pe fer. Selman eski mon kapab asir piblik ki mannyer nou'n fer ozordi, bann koreksyon ki Onorab Andre in mete i pa bann *substantial amendments to the content of the Bill*.

I zis lo ponktyasyon, lo en s' ki'n azoute *and so on*. So piblik i devret ganny sa lasirans ki i pa'n mank nanryen lo *content of the Bill*. Onorab Andre eski ou dakor avek sa leksplikasyon?

HON CLIFFORD ANDRE

Mon pa pou fer en, prolong en deba lo la Mr Chair. Me selman letan nou dir pou piblik konnen, sa manm piblik ki pe ekout nou, i dan son loto li, i napa sa *Bill* ek li, li. Konmsi nou pa pe dir ki zot pa devret konnen.

MR SPEAKER

Wi.

HON CLIFFORD ANDRE

Me selman zot a konnen dan seksyon 5 definitivman panel avek *Bills Committee* in fer en travay ki zot in *entrust* nou pou fer, e nou pa pe vin donn zot *boogie*.

Nou pe donn zot en *jackpot* menm annefe nou. En Lalwa ki bon, ki Gouvernman in vin avek, ki nou, nou war, *unfortunately* lot kote i pa la pou partisipe.

Me selman letan zot la, zot enterakte avek nou e manm piblik i konnen ki bor nou ete. Selman si nou pou al, pou mon dir en *comma after 's'* dan laliny

3, napa problem, nou pou ale. Kekfwa la nou ti ava ankor dan, lo paz 5.

MR SPEAKER

Non.

HON CLIFFORD ANDRE

Nou ti ava annan sa 36 pou nou fer.

MR SPEAKER

Ok. San ki mon antre dan deba, eski mon kapab permet Onorab Arissol repran son pwen.

HON SANDY ARISSOL

Mr Speaker, tou sa ki nou pe dir i byen. Nou ti tonm dakor koman Lasanble Nasyonal, letan nou zwenn avek bann sponsor bann *Bills*.

Nou tonm dakor lo serthen lamannman avek *Bills Committee* laba anler dan *room* kot zot fer sa travay. Zis pou nou pa repas lo bann *commas*, lo bann *full stop* parey nou pe koz lo la.

Mwan mon sel pwen ki mon pe dir, letan nou'n tonm dakor laba anler, i ok. Prezan selman letan nou pe lir, nou pe dir *Clause 1.1* lala lamannman ki nou fer.

Nou bezwen dir, eksplik dimoun, lir sa lamannman ki nou'n fer. Pou sa dimoun konpran poudir *ok*, sa ki *Bills*

Committee avek bann sponsor swa sa Bill zot in tonm dakor.

Be letan nou dir zis 1(a), 2(a), i pa konnen. Zis sa pti bout lenformasyon mon ti pe dir. I pa vedir nou bezwen relir *Bill* antye, parske pou nou fini 2er, non.

Zis lir sa pti bout kot nou pe koz lo sa pti lamannman, zis pou bann dimoun deor azour. Se tou ki mon pe demande mwan. Mersi.

MR SPEAKER

Onorab Andre.

HON CLIFFORD ANDRE

Mersi Mr Chair. Mon pa pou al dan en deba parey mon dir. Selman normalman letan i annan en *substantial amendment* ki dan sa paragraf oubyen dan sa seksyon, egzakteman se sa ki mon fer.

Mon lir, pou ki *at this panel* osi, e lezot Manm kekfwa ki pa'n ganny sans *have sight of* sa *Bill*, i konnen ki nou pe mete.

So letan i annan en lamannman sibstansyel, letan i annan bann pti 's', nou'n tir en '*the*', nou'n tir en soz, nou zis dir poudir nou'n fer li koumsa. Me selman si, nou bezwen fer li, nou a fer li.

Me selman egzakteman se sa ki nou pe fer letan i annan en lamannman ki'n tir detrwa mo

oubyen paragraf kot in annan serten, in annan bokou koreksyon, in tir en serten mo, in met en lot mo, se sa ki nou sey fer. Me selman nou ganny gide par Lasanble Nasyonal. E si i neseser nou fer sa ki nou'n bezwen fer.

Nou'n bezwen fer, akoz sa se nou travay, nou bezwen travay pou nou fer sir ki okenn benefis ki nou gannyen dan lefitir i ganny zistifye avek sa travay ki nou fer. Mersi Mr Chair.

MR SPEAKER

Ok, annou settle lo sa pwen. Eski nou kapab dakor ki the format will be dan Clause 42(1), nou'n tir en comma apre tel mo, e i move on. Eski Manm i dakor avek sa?

Byensir parey Onorab Andre in dir, si i annan lamannman pli *substantial*, la i eksplike.

HON SANDY ARISSOL

Mr Speaker, *anyway* annou, nou'n dir nou pa pou antre dan en deba la. Nou pa pe dir nou bezwen al kont tou bann *commas*, bann keksoz ki nou'n tire, zis annou lir sa pti paragraf.

Letan nou'n fer sa bann lamannman ki tou lede kote in dakor, lala, lafason ki i lir. Se

tou ki mon pe demande. Ou pa bezwen al dan kantite in tire, konbyen in tire.

Zis pou lenformasyon piblik ki pe ekout nou, *at least* i konpran sa fraz, sa lamannman ki'n arive ladan. Si i difisil mon napa problemm avek sa, akoz mwan mon pe swiv la.

MR SPEAKER

Bills Committee, lezot Manm nou dakor avek sa propozisyon? *No objection, thank you. We'll accept that.* Tre byen pou'n arriv a lafen bann amannman, napa lot demann pou klarifikasyon. Alor nou a kapab retourne dan Staz Lasanble pou terminen avek Bill.

E mon ava apel Mosyon pou *Third Reading* silvouple. Onorab Arissol.

HON SANDY ARISSOL

Mersi Mr Speaker. Mr Speaker anba *order 76(1)* nou *Standing Orders*, mon move ki Bill *Financial Consumer Protection Bill, 2022 as amended* i ganny lir en Trwazyenm Fwa. Mersi Mr Speaker.

MR SPEAKER

Mosyon a ganny segonde silvouple. Onorab Esparon.

HON REGINA ESPARON

Mersi Mr Speaker. Mon segonn Mosyon pou *Financial Consumer Protection Bill, 2022* ganny lir en Trwazyenm Fwa. Mersi.

MR SPEAKER

Mersi. Manm a vot lo Mosyon pou *Third Reading*. Tou Manm ki an faver lev lanmen silvouple? Mersi.

Lo *Formal Third Reading Financial Consumer Protection Bill, 2022 as amended* 19 Manm in vot pour, 0 kont e 0 abstansyon.

Alor sa *Bill* in aprouve lo *Third Reading* e Madanm Clerk nou a demann ou pou fer *Formal Third Reading*.

MADAM CLERK

Mersi Mr Speaker. *This Act may be cited as a Financial Consumer Protection Act, 2022, and shall come into operation on such date as the Minister may, by notice in the Gazette, appointed.* Mersi Mr Speaker.

MR SPEAKER

Thank you. Bill in aprouve par Lasanble. Mersi bann Manm pou zot entervansyon. Mersi Minis avek ou *panel* pou ou travay avek nou.

Nou pou swet ou orevwar e bonn kontinyen. Lasanble

pou repren apre midi avek Mosyon. Mersi. Nou a repren 2er.

(BREAK)

MR DEPUTY SPEAKER

Bonn apre midi. Onorab Esparon.

HON REGINA ESPARON

Bonn apre midi. Mr Speaker i paret ki nou napa en *quorum*.

MR DEPUTY SPEAKER

Wi nou napa en *quorum*. I annan 13 manm, 14, 15, nou still napa en *quorum*, i mank ankor 2 Manm, nou ganny en lot. I mank 1 aprezan. *Ok*, aprezan nou annan 17 Manm, nou annan en *quorum*, so nou kapab komans nou sesyon pou apre midi.

Byenveni a lekout tou manm e nou prosen *item* lo nou *Order Paper*, i en Mosyon ki pe *move* par Manm Elekte distrik Ile perseverance Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi sa tou Manm *MNA* e en bonn apre midi spesyal a tou bann dimoun ki pe ekout nou lo radyo e osi zabitant Perseverance.

Mr Speaker mon Mosyon ozordi apre midi i lir koumsa;

Lasanble i aprouve pou demann Gouvernman pou komans demars pou etabli en *Juvenile Center* rezidansyel avek bi reabilit bann zenn anba laz ki viktим labi e fleo sosyal.

Mr Speaker, sa mosyon pe demande ki Gouvernman i akseler travay pou etablir en *Juvenile Center* pou kapab reabilit bann zenn anba laz ki viktим labi e fleo sosyal dan nou pei Sesel.

Mr Speaker, ozordi i malere ki sa pti pei avek en pti popilasyon serten group zanfan pe krwar ki zot ki pe *rule*, akoz zot in adopte sa latitud ki zot annan zot drwa e ki zot osi zot lib pou fer sa ki zot anvi fer.

Mr Speaker, wi, i vre ki en zanfan ki'n vin en viktим, swa kot lakour, lo semen piblik, ouswa kot lekol, li menm li ki atraver sa bann move leksperyans i devid son soufrans ek fristrasyon lo lezot son kanmarad.

Par ler nou dir i pa pe fer sa bann aksyon par ekspre. Me enn fwa ki ou komans servi leskiz, sa bann aksyon i kontinyen e i agrave.

E ler nou pran konesans in fini depas limit e in fini tro danzere.

Mr Speaker dan lepase ti annan en sant koni koman YRTC, kot zanfan anba laz avek problemm latitud, move konportman e kot paran ti nepli konnen ki mannyer pou dil avek sa bann zanfan ti ganny met dan sa sant.

Annan zanfan ki'n apre en serten letan dan sa Sant in sorti avek bon konportman. Me i annan ki *still* sorti avek zot move konportman.

E la zot in kontinyen senm sa bann move lagrenn dan lasosyete e fer ki bokou zanfan i tonm dan zot lanmen e i vin zot viktim an retour.

Mr Speaker sa Mosyon pe demande ki aksyon imedya i ganny pran e ki en *Juvenile Center* i devret ganny konsidere koman priyorite.

Pou ede pran kontrol total lo bann aksyon, lo sa bann sityasyon deplorab ki pe arive parmi nou bann zanfan. kot a ed zot reganny bann led profesyonnel.

Mr Speaker i vreman sagrinan letan nou tande ki dan lekol e partou dan bann lezot distrik dan Sesel antye, pe sibir tro bokou vandaliz, vol ek latak par zanfan anba laz.

Paran in perdi kontrol lo zot bann zanfan, paran pa ni konnen par ler kote zot zanfan i ete. Direktris ek Direkter e osi

bann ansenyan pe sibir latak dan tou sort laform. Lensilt e osi labi fizik. Zanfan pe vin lekol avek kouto dan pos, pe menas sa ki pli pti ki zot. Seve bann ansenyan pe vin blan avan ler.

Sa ki devlop tansyon e sa i fer ki a lafen rezulta pou senpleman dekourazan. E bann zenn pa pou pran sa profesyon koman ansenyan byento.

Mr Speaker, ozordi mon osi kapab dir, ki pa zis ansenyan ek paran ki pe pas atraver latak avek zanfan, ek zenn zanfan.

Piblik an zeneral osi pe pas dan menm problemm. Ler ou vini, ou vwar ou vit loto in kraze, en zanfan anba laz pe vol loto en lot dimoun e al kraze.

En proprieter bato i vin vwar zanfan pe sorti an tayan lo son bato. E ler i koste pre, vandaliz ion pase terib. *Sliding door* i ganny kraze avek boul foutbol, e pou zot sa i normal, zot riye, pa nanryen pou zot.

Zot vin vol serten pyes e al vann avek lezot proprieter bato. Koup fil lo bann propriete pou zot ganny akse pase.

Antre lo *playground* e kas tou bann zouzou, lo ki lezot zot bann pti kanmarad pou zwe. Mr Speaker, ozordi dan mon

distrik Perseverance, sa ki pe arrive i terib.

Dan lespas 1 mwan, Lapolis i ganny plis ki 20 rapor lo zanfan ki pe fer vandaliz ek dezord.

Travayer sosyal dan lespas 1 mwan pe rikord 10 a 15 bann diferan ka koze par zanfan anba laz. E menm i annan an se moman zot pe aparet Ankour.

Mr Speaker zanfan ki sipoze dan lekol pe debout Ankour a kote adilt pe al ziz-e. Nou demande kote e kwa ki'n al mal?

Ozordi tou lede *playground* dan Ile Perseverance pe bezwen reste frenmen. Dan *playground* Perseverance 1 pa borde.

Tou zouzou in kraze, fil in ganny koupe e rezulta se frenm sa playground akoz i danzere pou lezot zanfan, akoz zot kapab ganny blese.

Mr Speaker ozordi zanfan 5an an montan ankor pe marse lo semen piblik dan Perseverance. 9er, 10er, 11 er diswar zot lo semen.

Ler ou koz avek paran, i dir ou nepli kapab. "I pa oule ekout mwan, i pa ekout personn, i pa per ni Lapolis." Me dan sa ka si ou paran ou nepli kapab, ki pou arive avek sa zanfan?

Mr Speaker, se la kot zenn zanfan i vin osi propriyeter bann dealer drog e zot osi tonm dan prostitisyon byen zenn, menm anba laz 15an.

Mr Speaker, tou sa problem pli tar i pou tonm lo zepol Gouvernman. Se Gouvernman ki pou bezwen rode ki i pou fer avek sa bann zanfan apre ki zot in fini perdi direksyon.

Fini tou sans moralite, napa okenn kontribisyon pou fer dan lasosyete. Me o kontrer, nou war zot pe vin tap laport *Welfare* avek en pti baba dan lebra avan menm ki zot, zot komans kontribye dan lasosyete.

La Mr Speaker, mon pou osi rekomande ki paran osi i ganny ankadre dan serten programm, pou zot ganny ase bagaz neseser. Ki zot a kapab resevwar pou zot zanfan e kontinyen sa travay *parenting* letan zot zanfan i retourn dan lakour, sorti dan sa sant.

Mr Speaker mon pou fer kler ki sa sant pa pou vin en landrwa parey prizon. Kot zot pe al ganny pini ouswa bate, ouswa abize. Me i pou plito en landrwa kot nou bann zenn zanfan a ganny led profesyonnel, pou zot kapab reganny met lo bon semen e vin

sa bon sitwayen ki nou pei i bezwen pou demen.

Dan sa sant nou a demande ki tou lazans enportan dan lasosyete ava on board. Tel ki Lapolis, travayer Sosyal, Ledikasyon, NGOs ek lafanmir.

Nou ava ini ansanm pou kapab ed sa bann zanfan reetabli zot dan lasosyete. Resers in dir ki pli ou atak en sityasyon boner, plis ou sans reisi ek bon rezulta i garanti.

Mr Speaker, mon pou konklir par demann mon bann koleg *MNA*, pou siport sa mosyon, pou nou kapab arive sov nou bann zenn zanfan koman i ankor boner.

Par met bann ki nou santi pe komans pran en semen tord e danzere, e kot zot pe al andomaz zot prop lekor ek zot lavenir.

Ki Lotorite i pa tarde pou met en tel fasilite an plas, ki pou kapab ed zot redrese, konpran lavi, vin responsab e pare pou retourn dan zot fanmir e dan lasosyete normal e respektab. Mersi.

MR DEPUTY SPEAKER

Mersi Onorab. Prezan annakor avek *Standing Orders* 43(2), nou ava demann en Manm pou segonde. Mon'n

remark Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon segonn sa Mosyon e mon demann ou permision pou mon entervenir lo sa Mosyon. Mersi.

MR DEPUTY SPEAKER

Please proceed.

HON WAVEL WOODCOCK

Mr Speaker, sa Mosyon ki devan nou pe demann Gouvernman pou komans demars pou etablir en *Juvenile Center* rezidansyel, avek bi pou reabilit bann zenn anba laz ki viktim labi e fleo sosyal.

Pou komanse Mr Speaker, mon pou bezwen koz en pti pe lo mon parkour. Annefe pandan ki mon ti pe fer mon letid dan lekol Politeknik, mon ti pe etidye *Committee Studies* sa letan, mon premye *attachment* ki mon ti fer, mon ti ganny atase YRTC Praslin. E YRTC Praslin, ki akronim pou *Youth Residential Training Center*, ti en sant ki ti ankadre bann zenn.

Me i pa ti en sant ki ti senpleman zis ankadre bann zenn ki annan problem konportman ouswa bann zenn ki'n fer lofans.

Sa sant ti pran bann zanfan avek, non-selman avek problemm konportman, parey bann zenn ki petet zot konportman kot lakour pa ti bon, ouswa zot konportman kot lekol, zot ti pe fer bann aksyon anti-sosyal.

E i ti menm ankadre bann manrmay ki ti petet bann manrmay ki ti pe angaz dan aksyon seksyel anba laz.

Me i ti osi pe pran diferan kategori, parey mon'n dir, i ti pe pran en pe sa bann manrmay ki dan sa bann *issue* sosyal, konportman sosyal.

Me an menm tan i ti osi pran bann zenn ki'n fer serten bann lofans, bann krim, parey physical assault, ouswa vol, ouswa menm bann ki'n enplike dan bann aksyon, in servi drog e lezot konportman anti sosyal.

E an menm tan sa sant osi, malerezman akoz ti napa lezot landrwa pou ankadre sa bann zenn, ti annan bann manrmay osi dan sa sant ki ti'n osi bann manrmay ki'n viktим bann problemm sosyal.

E problem se ki in napa vreman sa distenksyon ant sa de, kot enn ler tou sa bann group manrmay in ganny met ansanm.

Annefe apre pli tar zot tri ouver en lot sant North East Pointe, ki pli tar, bokou lannen

pli tar mon'n al travay avek sa sant ki ti baze North East Point, YRTC North East Pint.

E mon ti en *Social Worker* laba. Me zot ti pe plizoumwen ankadre bann manrmay, bann zenn anba laz ki'n fer bann lofans.

Parey ki'n vole, ki'n kas lakaz, vole, lezot lofans. Ouswa bann, e nou ti pou osi annan bann manrmay, mon rapel, ki ti'n fer bann aksyon, bann zenn fiy ki ti annan relasyon seksyel anba laz avek bann lezot konportman anti-sosyal.

Me ti napa sa *distinction* ant manrmay ki pe ganny, ki pe fer fas avek bann labi, ouswa ki pe fer fas avek fleo sosyal, bann *issue* labi dan zot lakour, dan zot lanvironnman, avek bann manrmay, bann zenn, bann anba laz ki'n fer bann lofans kriminel.

Me annefe parfwa i annan sa, kot konportman en zanfan i relye osi avek bann labi, bann fleo sosyal ki zot fer fas avek. E en ler sa i fason ki zot reazir, zot rebel ler zot in pas dan bann differan kalite labi.

Mr Speaker i enportan note ki fodre i annan en distenksyon ant manrmay ki fer lofans kriminel e zanfan ki'n viktим labi e fleo sosyal.

E mon santi ki i annan en nesesite pouse par sa 2

kategori, i annan en sant pou zanfan ki viktim bann fleo sosyal.

E en lot sant pou bann zenn delenkan, sa ki nou apel bann *juvenile delinquent* ki'n fer bann lofans, sirtou bann lofans kriminel, Mr Speaker.

Depi ki sa sant North East Point in frenmen, e sa i plizyer lannen pase, in napa en lot sant. I pa zanmen annan en sant;-enn i napa en sant pou ancadre e anmas, e reabilitiz sa bann manrmay ki'n fer bann lofans kriminel, ouswa avek bann konportman anti sosyal.

Or en lot sant ki osi ancadre reabilitet e anmas bann zenn ki'n fer fas avek bann diferan labi, bann diferan fleo sosyal Mr Speaker.

E mon bezwen dir Mr Speaker, ki mwan mon 100 poursan dakor avek Onorab Bastienne, pou nou anmas sa bann zenn ki'n viktim labi ek bann fleo sosyal.

Nou tou konnen Sesel dan nou sosyete, i annan bann ka ki'n arive, kot zanfan in ganny abize. E fodre nou protez sa bann zanfan.

Nou pa kapab kit sa bann zanfan ansanm avek zot abizer, dan menm lanvironnman avek zot abizer.

Akoz parfwa i annan bann case ki al en pe lontan, ouswa

ki i annan bann *investigation* ki ganny fer. E parfwa bokou fwa sa bann zanfan i *end-up* dan sa menm lakour avek sa abizer.

Swa i kapab labi seksyel, i kapab labi fizik, i kapab osi bann ka *neglect* to bann zanfan, zot paran i negliz zot. E napa en landrwa pou met sa bann zanfan.

E nou bezwen en landrwa koumsa. Nou bezwen ganny sa bann zanfan lwen avek sa bann abizer pou protez zot. E osi pou donn zot sa sipor pou ancadre sa bann zenn.

Me an menm tan mon osi santi parey mon'n dir, ki nou bezwen ancadre, annan en landrwa spesyal pou bann zenn delenkan.

Sirtou parey mon'n dir, bann zenn ki'n fer bann krim, bann aksyon kriminel, vol, *physical assault*, *drug trafficking* e lezot aksyon kriminel.

E parey mon'n dir bann lezot konportman an delenkan anti sosyal. E ozordi, akoz nou napa en tel sant, i annan zanfan ki'n ganny met dan kasou pou plizyer semenn.

Mon rapel ti annan en ka, mon pa pe mazinen, mon pa pou mansyonn non sa bann zanfan - ti annan en ka ki ti arive dan lepase kot sa zanfan ti ganny met mon krwar si mon

pa tronpe, Perseverance menm dan kaso. In fer plizyer semenn dan kaso.

I annan zenn anba laz ki'n ganny rimann Montagne Posée, ki pa ideal, ki annefe i al kont *Convention of a Right of a Child*.

Ki dir ki zanfan a merit dan prizon ansanm avek adilt. E i bezwen annan en landrwa avek tou fasilite neseser pou ankadre sa bann zenn.

E dan lepase nou'n tann plizyer propozisyon, menm ki Gouvernman presedan in fer. Mon rapel zot ti dir zot pou fer en landrwa Cap Ternay pou anmas sa bann zenn, ki'n pa materyalize.

E ti annan propozisyon en *annex Montagne Posée* menm kot o bor kot Prizon. Apre ase resaman ti annan en propozisyon pou fer sa sant Praslin, Amitié kot *APDAR* ti ete.

Me apre desizyon in sanze e la sa, kot *Dove Center, Dove Rehabilitation Center* i ete, i la sa sant i prezan i pou vin en Lakademi Lapolis pou bann zenn zil pros.

Fodre note Mr Speaker, ki Sesel nou'n rektifye *Convention of a rights of the child*. E zisteman pa bokou letan, mon apel dan *IAC*, nou ti diskit lo *over option of protocol to the Convention of a rights of the*

child on a Communication Procedures.

Ti vin devan Lasanble e nou'n ratifye. Me Mr Speaker, ler nou ratifye sa bann gran Konvansyon, nou annan nou en lobligasyon anver sa Konvansyon.

E enn sa lobligasyon, se pou annan en tel landrwa pou ankadre sa bann zenn. Annefe pa zis pou ankadre, parey mon dir, pa zis bann zenn ki'n fer lofans, me osi en landrwa pou ankadre bann zenn ki'n ganny abize, pou zot proteksyon.

Akoz zot *safe*, kot zot ganny ankadre dan en fason ki byen, zot ganny sa sipor, sa *counselling*. E nou napa sa. E sa i e n keksoz primordyal e enportan ki nou annan sa bann tel sant pou tou lede kategori, pou nou kapab pran ka avek nou bann zanfan e proteksyon nou bann zanfan.

Zot bezwen en landrwa Mr Speaker, kot zot pou ganny *fair treatment* e pou bann zenn ki'n fer bann o lofans, ki'n fer lofans, bann aksyon kriminel. Zot bezwen osi en landrwa kot zot pou ganny sa led legal si fodre. Kot zot pou ganny sa *counselling*, sa *training*. E ki osi pou prepar zot pou reentegre dan lasosyete.

En landrwa kot zot osi kapab ganny akse avek zot

paran, ki enportan pou paran osi kapab zwe en rol pou ede dan reabilitasyon sa zanfan.

Osi enportan Mr Speaker, se *follow-up*, apre ki sa zanfan in sorti dan sa sant. E nou tou nou'n war dan lepase, menm sa, prizon en legzanp Montagne Posée, kot bokou bann prizonnyen, ler zot in sorti Prizon, in napa sa *follow-up*. Kekfwa in mank en pe sipor, ki apre ou war sa prizon, bokou zot i retourn dan bann aksyon ilegal ouswa kriminel ankor.

E i enportan ki osi apre sa sant ki nou annan bann programm pou dan sa sant, pou zot reabilitasyon, pou reentegre zot ...

Me an menm tan pou annan sa *follow-up* osi pou sa zanfan ler i sorti dan sa sant pou li pa repet sa bann aksyon delenkan ankor.

Alor Mr Speaker, mon santi ki sa Mosyon ki Onorab Bastienne in anmennen, i enn ki vreman bon. Me mon pe sizer, mon annan en propozisyon ki mon anvi fer Mr Speaker.

Annefe Mr Speaker mon anvi move anba order 44(1), nou *Standing Order* pou en *simple amendment* lo Mosyon Onorab Bastienne.

Akoz mon santi nou bezwen fer en distenksyon ant

bann manrmay, bann zenn ki'n fer fas avek bann labi, fleo sosyal, avek bann zenn ki'n fer bann aksyon, bann lofans ouswa aksyon kriminel.

Alor anba *Order 44(1)* nou *Standing Order*, mon pe move ki, mon pe move en *simple amendment* Mr Speaker, ki pou lir koumsa;-

‘Lasanble i aprouve pou demann Gouvernman, pou komans demars pou etablir en *Juvenile Detention Center*, pou zanfan ki fer lofans ek en Sant Reabilitasyon Rezidansyel separe avek bi reabilit bann zenn anba laz ki viktim labi e fleo sosyal.’

Vwala mon *amendment* Mr Speaker, ki mon *move*. Mersi.

MR DEPUTY SPEAKER

Ou pa ti pou *mind* zis repet, repet sa lamannman ki ou pe propoze silvouple.

HON WAVEL WOODCOCK

Ok Mr Speaker. Mon ava relir sa lamannman ki mon pe fer. Annefe Lasanble i aprouve pou demann Gouvernman pou komans demars pou etablir en *Juvenile*-

La an moman ki mon pe fer, mon pe azout ‘detention’, en *Juvenile Detention Center* pou

zanfan ki'n fer lofans, 'lofans' osi in ganny azoute-

"ek en Sant Reabilitasyon Rezidansyel separe," ki'n ganny azoute 'separe', avek bi reabilit bann zenn anba laz ki viktim labi e fleo sosyal.

MR DEPUTY SPEAKER

Ok, mersi. Ok. Mon pe get Order 44, normalman i dir ou en amannman ou bezwen fer li an ekrir e ou delivre li avek Clerk 48erdtan avan.

Be solman, si Speaker i santi poudir i ase senp, mon pa santi poudir i pe tro *distort* Mosyon Onorab Bastienne.

Akoz dan son prezantasyon in fer, in eksplike byen poudir i annan en distenksyon ant zanfan ki komet lofans apre bann zanfan ki viktim. E zot pa devret ganny mete ansanm. Alor ti ava byen.

So, mon krwar i en, mon war bann Manm *LGB*, *Chief Whip* i agree. Donk nou ava aksepte sa lamannman. Mon a zis relir li, pou ki bann lezot, lezot entervenan i sezi.

" Lasanble i aprouve pou demann Gouvernman pou komans demars pou etablir en *Juvenile Detention Center* pou zanfan ki fer lofans e en 'Sant Rezidansyel' separe avek bi reabilit bann zenn anba laz ki viktim labi e fleo sosyal."

Vwala, koumsa i lir aprezan. Onorab.

HON WAVEL WOODCOCK

Mr Speaker en pti, zis en pti mo ki, pti omisyon. Ek en 'Sant Reabilitasyon Rezidansyel', pa en 'Sant Rezidansyel', en 'Sant Reabilitasyon Rezidansyel' separe.

MR DEPUTY SPEAKER

Ok. Ok mersi. Onorab Bastienne ou ok avek sa lamannman.

HON DESHEILA BASTIENNE

Mersi Mr Speaker, wi mon aksepte Mr Speaker. Mersi.

MR DEPUTY SPEAKER

Ok, mersi bokou. Donk aprezan nou ava envit prosen entervenan ki lo lalis, nou, okenn dimoun ki segon sa lamannman? *Chief Whip* mon rekonné ou lanmen anler.

HON SANDY ARISSOL

Mr Speaker mon ti a kontan lo Mosyon Onorab Desheila Bastienne, e lamannman propoze par Onorab Wavel woodcock.

E ou, ou'n anmenn *Standing Orders 44(1)*, mon ti a kontan segonn Mosyon. Mersi bokou.

MR DEPUTY SPEAKER

Mersi. Nou *in agreement*, pa bezwen vot lo la. Donk nou ava *proceed* avek deba. Nou *ok*, lot entervenan se Onorab Regina Esparon.

HON REGINA ESPARON

Mersi Mr Speaker. Bonn apre midi tou Manm Onorab e tou dimoun a lekout.

Mr Speaker mon pou dir detrwa mo pou donn sipor sa Mosyon anmennen par Onorab Bastienne e ki'n ganny amande, ki pe demann Lasanble pou aprouve, pou fer en demann ek Gouvernman pou komans demars pou etablir en *Juvenile* Sant Rezidansyel, avek bi reabilit bann zanfan anba laz ki'n viktим labi e fleo sosyal.

Mr Speaker, akoz en tel demann? Parey loter Mosyon in fer resorti, ozordi i annan en kantite zanfan ki'n viktим bann fleo sosyal.

Ki ou war zot parfwa san en labri. Akoz napa sa landrwa ideal oubyen sa sant pou kapab met sa bann zanfan ladan.

Kot zot kapab ganny reabilite e ganny bann swen e led neseser pou kapab ed zot refer zot lavi. E i pa en sekre Mr Speaker.

Ozordi i annan paran ki'n perdi kontrol lo zot zanfan. E

sa i pou diferan rezon. Swa atraver mank swivi apropiye e paran pa kapab, pa konnen ki zanfan pe fer.

Zanfan ki pe fer move frekantasyon, frekant grannwanr, ki'n al lo sibstans, swa drog ou lalkol a en tre zenn az.

Zanfan ki sov lekol, oubyen in sove kot lakour, e ki bokou fwa paran i pe travay e i pa konnen kote zanfan i ete.

Zanfan ki ganny antrennen dan bann aksyon prostitye pou larzan a en tre zenn az, bann ki'n mansipe kan zot ankor anba laz. E sa i menm garson e fiy.

Zanfan ki ganny neglize akoz zot paran i lo sibstans e bann zanfan ki sove akoz zot paran pe abiz zot kot lakour. Mr Speaker sa pou nonm enn de.

Dan Konferans ki Komite Madanm Lasanble fek organize 2 semenn pase, bann Lazans konsernen in fer resorti fortman ki enn bann pli gran difikilte e ki zot rankontre dan zot travay, sirtou lo kote Lapolis, se ler en zanfan i ganny ranmase dan lari, oubyen ganny anmennen kot Kordgard, sirtou aswar, zot napa sa landrwa apropiye pou met sa zanfan.

E dan bokou fwa zot bezwen met sa zanfan asize dan

Kordgard tou lannwit, ziska lizour ler Servis Sosyal i kapab rod rekour, swa kot Leser Lasarite Anse Etoile, oubyen kot en lot fanmir, dan ka sa zanfan in sove kot lakour, akoz in sibir, swa labi fizik, seksyel dan bokou ka.

Mr Speaker dan lepase ti annan sa YRTC Praslin, kot bann zanfan delenkan ti ganny mete.

Me la mon bezwen fer sa distenkson ant sa *Juvenile Detention Center* ki nou osi napa, ek en *Juvenile Residential Center*, parey Mosyon ti pe demande e la in ganny amande.

E sa i anmenn mwan lo mon lot pwen Mr speaker. Ki dan sa menm laliny, nou bezwen en *one-stop shop* pou dil ek bann zanfan, ek bann zafer zanfan.

Kot tou san bann servis pou fer ek zanfan dan sa ka a ganny ofer anba menm twa, olye fer sa zanfan dan ka kot in ganny abize monte desann, al *interview* Kordgard, fini, kot Probasyon, al war *Social Worker* en lot bor, par la dan bann biro distrik.

Al en kou Lopital Victoria pou war dokter, eksetera, dan ka kot in ganny abize seksyelman. Me dan ka kot i annan en *Juvenile Center*, tou sa bann servis a ganny donnent.

anba menm twa e bann lazans ki pe dil ek sa bann ka, ava dan menm landrwa e en landrwa ki byen kordinen.

Mr Speaker ler mon ti pe mansyonn YRTC, sa landrwa ti ganny transformen an *Dove Center* pou fer ki sa landrwa ki ti ganny servi pou *rehabilitate* bann *drug addict* an 2015, anba en programm ki pa'n byen marse laba.

Kot ti annan bokou defi ki ti ganny fer resorti atraver en vizit ki Komite madanm, sizyem, Lasanble ti fer laba. Pourtan son lobzektif set en pou reabilit zot, donn zot sa skill pou ganny en travay pli tar.

E an 2020 ti annan en propozisyon pou transform li pou fer li vin en *Juvenile Detention Center*. E la mon pe get en lartik Nasyon, e sa pa'n zanmen arive.

Lartik Nasyon ki dir, "*Dove Drug Reduction Program Center to be transformed into Juvenile Detention Center*", en lartik le 23 Zilyet 2020 dan Nasyon.

E la nou pe antann pretann pli tar pou zot sipoze fer Lakademi Lapolis laba. Mr Speaker dan lepase, in annan lesey pou fer sa sant rezidansyel pou sa bann zanfan.

Mon rapel la o bor *Coast Guard*, ti annan en landrwa ki ti abrit bann zanfan delenkan ki ti komanse an 2018.

Sa apre ki zot ti'n komans enn 2015 La Pointe Larue pa ti marse. Kot ti annan 9 zanfan avek bann move konportman ki ti reste laba.

La osi nou ti vwar kot sa programm pa ti dire e Servis Sosyal ti rankontre bokou difikilte, zanfan ti sove, e pariske dan vakans ler Minister Ledikasyon ti komans en programm *alternative education* pou lezot zanfan an deor vin laba, zot ti savoy drog, lalkol.

E ler bann zanfan ti anba lenfliyans, bann travayer pa ti kapab *handle* zot. E sa ti apre ki zot ti sorti laba Pointe Larue kot Lakademi Lapolis.

Laba, menm keksoz, nen nou ti pe ganny *call* ek bann *staff* ki zot nepli kapab. Ti menm annan lensidan kot zanfan ti travers *one-way* dan lannwit dan transpor ki zot ti'n vole.

SCAA ti kriy lasasen. Parski sa bann konportman ti pe port en menas pou zot aktivite lavyasyon.

E la ti bezwen arete, lanmenm ler ti transfer la kot Lakademi, ti transfer la kot *Coast Guard*.

Mr Speaker, mon pe fer sorti sa bann pwen pou fer war ki sa bann landrwa pa ti ideal pou sa bann programm reabilitasyon. Malgre ki lentansyon ti bon.

Nou bezwen en lenstitisyon ki ideal, ki son lanvironnman i byen ganny kalkile e mendev kalifye, avek mendev kalifye ki pare pou pran sa gro responsabilite, ki ganny sa *training* apropriye pou *handle* sa bann zanfan.

In deza annan en proze dan *pipeline* ki nou bezwen ranforsi e fer demann pou ki Gouvernman i bouz pli vit avek. E atraver sa Mosyon, mon swete ki kantmenm Mosyon pa *binding*, ki Gouvernman i tann sa demann e pran keksoz o serye.

Letan mon pe konklir, letan mon pe ariv lo mon konklizyon, mon pe dir ki ozordi dan tou distrik, i annan enn de zenn ki tonm dan sa bann kategori, e ler ou met ansanm, menm si 2 par distrik, i en pe bokou Mr Speaker.

E mon rapel ki letan ti annan en kestyon anmennen par sa lepok Onorab Ramkalawan pou Minis Ledikasyon, mon ti war ki, mon pe get lo *verbatim* la, ki letan zot ti komans avek sa *day program*,

ti annan 21 garson aze ant 13 a 15an.

E sa bann zanfan ti sorti dan 9 lekol Segonder lo Mahe. Ti annan dan tou distrik, dan preski tou distrik.

Anse Boileau, Anse Royale, enn Anse Boileau, 4 sorti Anse Royale, 3 Anse, non, 4 Anse Boileau, 3 Anse Royale, 2 Pointe Larue, 2 Plaisance, 2 Mont Fleuri, La Rivière Anglaise, Belonie, Beau Vallon, 2 Ile Perseverance.

I montre ou poudir sa trend i en pe partou lo Mahe. Alor nou bezwen en pe pli vizilan.

Mr Speaker letan mon pe terminen, mon pou osi demande ki paran zot pran zot responsabilite o serye.

E ler zot vwar ki zot zanfan pe depas zot limit, pa ezite rod led ek bann lenstitisyon apropiye, parey NCC, Probasyon, Servis Sosyal, Counsellor kot bann lekol ki touzour a zot dispozisyon.

Pa les zot zanfan vin en delenkan. Nou kapab anpes sa arive si nou azir boner. E en Sant Reabilitasyon pou sa landrwa apropiye ki pou ed sa paran.

Parske Zofisyen Lapolis ti fer resorti ki ler zot met sa bann zanfan dan kaso Perseverance, zot aprann tou sort vis ek lezot

zanfan ki laba. E i pa en bon direksyon.

Akoz zot sorti ek lezot vis ki zot ti napa letan zot antre. Mr Speaker avek sa 2 mo, mon remersye e mon pou donn siper sa Mosyon. Mersi.

MR DEPUTY SPEAKER

Mersi Onorab Esparon. Prosen entervenan lo nou lalis se Onorab Naddy Zialor.

HON NADDY ZIALOR

Mersi Mr Speaker. Bonn apre midi tou dimoun. Premyerman mon ti a kontan remersi Onorab Bastienne pou anmenn en tel Mosyon devan nou Lasanble ozordi apre midi.

Mr Speaker mon lentervansyon pa pou long. Me par kont mon santi i neseser ki nou annan sa konversasyon ki nou pe annan ozordi, tout an gardan dan nou latet ki nou tou nou annan en frer.

Petet i annan nou ki paran, e tou sa bann zenn ki nou pe koz lo la, i sorti dan en kominate.

E mon mesaz koman en *community leader*, pou sa bann zenn ki nou pe koz lo la, se ki nou pa la pou nou vin kondann zot ouswa pas zizman lo zot.

Me sa ki enportan se ki nou la pou nou koman bann Dirizan, atrap zot lanmen e

regarde ki mannyer nou donn zot en lot direksyon ver lavenir.

Sa Mosyon i annan 2 konponan, swivan lamannman ki mon koleg Onorab Woodcock in anmennen, Premye konponan se pou port en latansyon ver en *Juvenile Center*, sa i pou bann zenn ki'n komet lofans, e dezyenm konponan se, petet zot ava koriz mwan si mon mal - se annan en Sant Reabilitasyon pou okenn zenn ki'n viktim labi ouswa ki annan problem, ouswa ki'n pas atraver fleo sosyal.

Be la mon anvi dir en keksoz, tre souvan dan lepase, ankor mon retourn lo mon pwen, nou'n tant pou ini nou bann zenn.

Nou'n tant pou kondann zot, ouswa menm dan nou kominate, nou'n zet en lizye, kot nou'n dir "a, be sa en fouter dezord, en nanryen fer, delenkan, napa nanryen, napa lavenir."

Mon ti a kontan koman en Setyenm Lasanble, e koman en nouvo Gouvernman, nou vir en paz e nou regarde ki bor problem fondamantal i ete. Pou ki nou kapab ed nou zenn.

Mr Speaker swivan, Onorab Esparon in tous lo la, swivan *forum* ki nou, nou'n ale koman bann MNAs resaman

konsernan *gender base violence*, in annan plizyer rekomandasyon.

E wi, enn parmi sete pou annan en *Juvenile Correction Center* e osi en *Rehabilitation Center*. E mon krwar i enportan. I enportan parske wi, mon pa kapab nye, ozordi i bles ou leker, letan ou lir en kominke Lapolis ki dir ou en zenn 14an in enplike dan vyolans ouswa dan vol, ouswa dan kas en loto.

Ouswa ou aprann ki en zanfan in ganny abize avek en adilt. E mon krwar sa bann konversasyon parey mon dir, i enportan pou nou annan koman bann Dirizan.

Parske fodre pa ki nou blyie, ki'n toulstan ganny dir ki lazene se lavenir nou pei.

Me si nou pa komans ozordi, pou nou regard nou lavenir, e diriz gid sa lavenir ozordi pou demen la ozordi la, di-si 10an nou pou annan ankor en menm Mosyon ki pou pe demann Gouvernman pou kree en *Juvenile Center* avek en *Rehabilitation Center*.

E ankor lo sa Mosyon, mon pe donn mon lopinyon personnel koman en zenn ki fodre pa nou blyie, ki nou tou ki la otour sa latab, nou ti en zenn.

E sa lepok ki zot, zot ti viv, kot zot ti ganny bate ek roten, bann ki dan 40 an montan. Oubyen ki ler 6er, laport i frenmen zot dormi deor, petet sa lepok in fini.

Me mwan mon toulstan mazin parol mon defen granmanman, ki dir, ki ti toulstan dir ek mon manman koumsa, "ler ou elve ou zanfan, elve li pou dimoun, pa bezwen elve li pou ou lekor."

E mon koleg Onorab Esparon in koz lo responsabilite paran, i vre. Paran i annan en responsabilite.

Me mon osi konpran sa paran mwan. Ki parfwa li in fer tou, tou, me i nepli konnen, i nepli kapab, i nepli, i sey regarde kote i pou ale, napa.

So mon krwar avek bann tel facilite i pou ed, nou selman sa zenn, me i osi i pou ed sa paran.

E parfwa sa paran osi i bezwen form parti dan sa reabilitasyon. Parske ou kapab reform en zanfan ouswa redonn li *the purpose of living*. Me si i pe retour dan sa menm lakaz, dan sa menm kominote, i pa neseserman ou pou pe fer travay ki pou lonterm.

Sa ki pli enportan, mon'n tann koz lo Sant YRTC Praslin. Mon'n tann koz lo North East Point, mon'n tann koz bann

plan ki ti annan, ki ti lo papye, ki ti'n materyalize, ki ti'n pare pou materyalize me pa'n zanmen arive.

Mon krwar en keksoz ki mwan mon ti a kontan fer resorti, se ki si nou pou fer en keksoz, annou fer li byen. Annou fer li ki nou pa ava komanse, me apre nou abandonn dan semen.

Ouswa parey mon'n tann dir, 10 i antre, zis 9 ki sorti, apre ou pa tann ankor. Pandan sa letan i annan leukri deor. Alors mwan mon pou aport mon sipor san ki mon dir bokou.

Mon pou aport mon sipor total pou sa Mosyon. Me apard sa mosyon, mon pou repet ankor mon mesaz ki mon'n dir o komansman. Se ki nou la pou atrap lanmen nou bann zenn e donn zot sa gidans.

E fodre ki letan nou fer sa bann tel sans, sa zenn pa santi li dan en *Juvenile Center* koman en prizonnyen, me vwar li en lopertinite pou donn son lavi en dezyenm sans.

Sa enn ki li i pou dan en reabilitasyon, i pou konpran poudir ou annan en lot *purpose* lavi irespektiv ki tromatiz-asyon ki ou'n pas ladan dan lepase, e ler ou sorti la ou pou annan en nouveau *purpose*.

Alors Onorab Bastienne ansanm avek lamannman

Onorab Woodcock, ou kapab, zot kapab kont lo mon sipor.

Me pli enportan, mesaz ki nou merit pe anvoy deor, se ki nou swete ki dan bann plan, bann gran plan lavenir Egzekitiv i pran sa enn Mosyon an konsiderasyon. Mersi Mr Speaker.

MR DEPUTY SPEAKER

Mersi Onorab Zialor. Prosen entervenan mon ava envit Onorab Doyace Porice pou son prezantasyon.

HON DOYACE PORICE

Mersi Mr Speaker, bonn apre midi tou mon bann koleg MNAs, bonn apre midi Mr Speaker e tou dimoun ki a lekout.

Mr Speaker mon pou siport sa Mosyon anmennen par Onorab Desheila Bastienne, akoz mon santi ki dan tou distrik nou annan sa bann zanfan ki viktim sa bann fleo sosyal.

E distrik Baie Sainte Anne Praslin e Zil Pros pa pe ganny eparnye. Ki mwan mon'n war, se serten bann zanfan in vreman gate e lesefer par son paran ouswa son gardyen.

Mon santi ki si ozordi nou zanfan in vin parey zot ete la, set akoz zot annan zot drwa, me

zot pa realiz lo zot responsabilite.

E sa pe kout nou sosyete byen ser. Si nou pa fer nanryen ek sa bann zanfan, en *Juvenile Center*, e osi en Sant Reabilitasyon Rezidansyel pou ed nou bann zanfan zot responsabilite, me ed zot refer zot lavi.

Sorti dan sa bann fleo sosyal. Kot in anmenn zot vin, voler, kas lakaz, lager ek mis, osi lezot zanfan. Lager pou vann drog eksatera. Kot zot les zot ganny servi.

Sa sant pou ed zot osi retourn dan lasosyete, rod en travay ouswa retourn lekol, ed zot fanmir e osi kontribye pou ed nou fanmir avanse.

Mr Speaker lontan mannyer nou paran ti aranz nou koman en zanfan, zanmen nou ti annan letan pou fer vagabonnen.

Paran ti vreman serye avek zot zanfan, montre nou koman pou viv. Me ozordi nou annan serten bann paran ki pa pe ed zot zanfan pou ariv kot zot merit arrive.

Zot pran tou keksoz fasil. Menm i annan zot bann, menm i annan zot bann zanfan ki pe demann madanm, pa zenn fiy, demande si zot reste tousel, si zot pa bezwen en partner.

E zanfan i vin sa zenn delenkan. Kot zot fer sa ki zot pa devret fer. Alors Mr Speaker, nou pou osi rod en fason pou edik paran lo zot rol e responsabilite.

Akoz zot osi zot responsab pou sa bann zenn ariv parey zot ete ozordi. Atraver sa group travayer ki pou travay avek sa sant, avek sa 2 sant, zot pou annan letan pou travay osi avek paran. E la kot Servis Sosyal li antre. Avek sa 2 mo, mon pou siport sa Mosyon. Mersi.

MR DEPUTY SPEAKER

Mersi onorab Porice. Mon ava aprezan apel Onorab Michel Roucou.

HON MICHEL ROUCOU

Mersi Mr Deputy. Bonn apre midi a tous ki pe ekout nou la ozordi.

Mr Deputy mon war poudir sa Mosyon ki Onorab Bastienne in anmennen i vreman enportan dan sa letan ki nou pe viv la. Ou konnen koman en zenn mwan osi mon'n grandi avek mon gran manman, defen gran manman kot la nou ti annan bann Lalwa ki vreman *strict*.

Kot ler nou ti sorti lekol mwan ek mon bann kouzin, mon frer, nou ti annan en ler pou nou antre kot lakour apre

ler lekol, kot souvandfwa nou ti napa menm letan ennler pou nou al zwe ek dalon. Akoz nou ti sitan bizi pe fer bann louvraz lakour, pe okipe. Be mon santi ki ozordi bann paran zot menm zot, zot pe perdi sa pouvwar kot lakour.

Akoz nou dan sa letan nou ti annan en gran respe pou nou paran e pou menm nou bann vwazen ki ti reste dan kominote kot nou menm ti reste, kot la bann vwazen menm ti donn lanmen pou zot met en lizye lo lakour nou paran si zanmen nou paran pa ti la, e sa ti ede pou li disiplin nou. E nou dan bon semen, e bann vwazen dan kominote ti annan sa bon lantant.

Mr Chair ki mon war ozordi se ki nou kominote Mr Deputy pe perdi sa regar lo nou bann zenn. I pran en kominote pou fer en zanfan grandi, e si nou tou nou asize nou kraz lebra e les keksoz al parey ki i ete ozordi e demen apre nou pou napa en zenerasyon.

Mr Deputy Speaker ozordi ler ou asize ou fer en pti letour partou dan bann distrik, i rann ou vreman enkyet akoz nou war poudir nou bann zenn pe tonm dan diferan fleo. Dan mon louvraz oparavan dan *PMC* mon'n ganny sans pou mwan angaze avek diferan kominote.

Espesyalman

Perseverance akoz i ti en nouveau vilaz sa letan, kot la nou ti war nou kot nou kre en komite ki lo la ti vin, bann travayer *PMC* li menm li Sosyal, Lapolis e menm ennler nou ti envit bann zabitant pou zot zwenn nou dan bann vizit ki nou ti fer espesyalman aswar.

Kot la nou ti kapab dil avek bokou bann laspe sosyal dan sa kominote ki la ti donn sa loportinite sa zofisyé sa letan ki ti la avek nou pou li war kote bann lakour ki krwar poudir i bezwen antre pou li sey edik sa paran.

E souvandfwa Mr Deputy Speaker ek nou tou vvar, parey Onorab Bastienne i dir ou pli gran parol ki ti sorti dan labous bann paran, se ki zot dir ou be nou'n fatige koz avek, i pa pe ekoute, i antre tar.

Be mon krwar poudir se ki bann paran ozordi nou bezwen pran sa responsabilite. Annou pran li serye, si ou pa ankor pare pou vin en paran ou pa angaz ou dan okenn aktivite, ki demen ou pou vvar ou kot ou annan sa gro responsabilite lo ou.

Mr Deputy e ansanm dan sa bann vizit Mr Chair i ti enkrwayab kwa ki ou ti kapab war bann zenn pe fer. Angaz zot dan bann aktivite e bann ler ki

nou ti pase souvandfwa ti en ler ki ti menm dan 10er diswar, ou ti bezwen al tir bann zenn lo lans partou. Be paran li menm li i lakaz li, i pa pe enteres li ki pe arive ek sa zenn kot i ete. Akoz in perdi sa, in perdi sa pouvwar lo sa zanfan.

E souvandfwa devan nou la ler sa Zofisyé Sosyal ek Lapolis ti anmas sa zanfan pou pran pou anmenn kot lakour pou sey koz ek li, e sa ton ki sa zanfan ti koz ek sa paran avek ou ti war ki nou annan en gran problem. Nou annan en gran problem ki mon mazinen ek lasosyete ozordi nou bezwen komans asize realiz lo la.

Akoz sansan ankor dan detrwa lannen mon pa konnen ki pou kapab arive e nou, nou bezwen sov nou bann zenn. Dan en konversasyon ki mon'n kapab gannyen apre midi mon'n ganny sans pou mon koz avek responsab Kordgard Mont Fleuri, in fer mwan ganny en konpran *ASP Sophola* in fer mon ganny en konpran se ki souvandfwa zot war zot kot zot pe dil ek bann zenn par anba 16an.

Sa i kas lakaz e vole, Mr Deputy Speaker, drog li menm li, posesyon drog ouswa lalkol swa dan transpor, ouswa dan semen e osi lager antre bann zenn. Bann zenn ki pe mars

avek kouto dan semen sa osi tou.

E mwan mon krwar poudir se ki nou bezwen pran li vreman serye, akoz nou bezwen en *Juvenile Centre* ki nou kapab demen, sa paran i kapab ale pou li rod rekour e tap laport kot la ansanm avek bann Lotorite i a kapab redres en pti pe nou bann zenn. Mon konnen poudir i pa pou fasil, i pa pou fasil me selman nou bezwen seye.

Akoz parey Onorab Zialor in dir se ki tanzantan nou pe ganny bann nouvel sokan, kot en zwenn in tant pou perdi son lavi swa aksidan swa dan en bagar.

Mr Speaker osi nou ti ganny sans pou nou al *attend* en konferans ki ti ganny fer par Komite Madanm kot ti annan plizyer diskisyon ki ti ganny leve espesyalman lo bann zenn, bann labi, ki mannyer pou ede pou nou kapab redres ou kapab dir sa group dimoun pou met zot li en bon semen.

E mwan mon panse poudir bann Lotorite konsernen nou bezwen pran sa serye. Nou bezwen pran li serye. Nou bezwen met bann paran *to task* akoz pli ale ennler dan aswar ouswa dan nouvel, ou tann lo medya kot i annan en zanfan ki'n absant son lakour. Ou

koman en paran ou konsernen avek sa ou, ou pe mazinen be la ou a dir kote sa fiy ouswa sa garson i ete?

Me selman apre sa ki dezapwent ou Mr Deputy Speaker, se ki ler sa zanfan i ganny revwar ou pa ganny dir - ou pa ganny dir poudir sa zanfan in ganny revwar. E ki'n arrive ava ek sa dimoun ki ti pe, kot sa zanfan ti ete?

Sa osi tou i pe zwe en rol. Mon panse poudir si aksyon i ganny pran ek sa bann dimoun ki pe *harbor* sa bann zanfan, la osi i pou dekouraze osi kot ler ou leve ou war piti madanm entel ouswa ou war madanm entel ou dir;

"Eh! Tel ler in arrive in ariv ler pou ou antre kot ou."

E sa i pou ede pou nou kapab ed bann paran osi tou. E osi i an sa bout kot bann paran ki ler zot larg zot zanfan zot, zot pa ni get kote i ale, konmsi i dir ek sa zanfan ale al *disturb* entel laba. Zanfan ou war pe taye si entel in plant son pti fler ou war pe kase, ouswa pe fer okenn nwizans e sa paran li i bezwen pran son responsabilite, kot ou bezwen fer sir ou konnen kote ou zanfan i ete.

Mr Chair, annefe en lot keksoz ankor ki mon anvi abord lo la, e ler ou war en zanfan 6an

pe koup semen pou li al laboutik kot i annan en ta transpor pe pase. Sa osi tou demen i kapab met li dan en danze, ou war? I annan bokou paran zot pa pe pran sa responsabilite ki zot ti devret.

E ler sa zanfan 6an li pou son laz ki i annan en nenport ki dimoun i kapab enfliyans li avek nenport ki keksoz ki i annan. Ou war? E bann paran ki anmenn zanfan lo bann *ghetto*, mon war souvandfwa mwan dan mon distrik ler mon al vizit sirtou Corgate Estate.

Ou war bokou paran espesyalman sa ki zot pa reste dan distrik Mont Fleuri zot, selman zot in pran sa pti zanfan zot in desann avek pou zot vin asize.

Sa mon krwar poudir Sosyal i devret antre, dil a avek sa bann paran anmenn zot Ankour, e fer zot pran zot responsabilite akoz si toultan nou *rely* lo Gouvernman pou pran responsabilite bann paran. Ou'n fer sa zanfan, ou ti fer sa zanfan 2 zot e nou bezwen met zot, la parey la konmela i pe dir ou li kot ASP laba.

Ou bezwen ou koman en paran al rod sa papa fer li sonny son zanfan. Akoz ki arive Mr Deputy Speaker, mwan mon en zanfan, mon en msye, ki'n grandi mon ti napa en papa

mon'n grandi ek en Manman selman mon'n grandi dan lakour mon gran manman.

Be ozordi avek bann Lalwa ki zot ti mete pou fer sir poudir ozordi nou vin byen dimoun dan lasosyete ou war, mon pa tro krwar ennler poudir zis en paran tous, en manman ouswa en papa tousel ki fer en zanfan tonm zis dan bann move lenfliyans.

Mwan mon krwar poudir se ki sa zanfan osi tou an gran disan, i osi tou i bezwen war kote i bezwen deside ki semen i pou pran.

Sa Mosyon ki Onorab Deshiela in anmennen, Onorab Deshiela Bastienne in anmennen i vreman enportan pou pei. Akoz in ariv en letan la kot nou bezwen *Juvenile Center*, *be it* kot i pou ete *as long* ki demen bann Lotorite, bann paran i konnen poudir zot kapab annan en laport pou zot tape.

E mwan mon pe dir se ki Gouvernman nou bezwen pran sa pli vit posib, rod en landrwa kot bann zanfan i kapab ganny anmase mete *counselling* ganny fer avek zot, ki demen zot kapab retourn dan lasosyete.

Mr Deputy Speaker dan mon letan ti annan bokou bann zanfan ki ti annan bokou bann problemm sosyal. Ozordi sa

bann zanfan in antre dan lemonn travay, zot pe travay, zot pe kontribye dan lekonomi e ou war kot i annan sa sanzman dan zot. Zanmen ou ti ekspekte en zour ou ti pou war sa bann zanfan in grandi pou zot vini, zot annan zot zanfan zot osi pou zot kapab antre dan lasosyete.

Akoz zot in pas dan tro bokou zot osi swa zot paran ti en dimoun ki ti alkolik, swa i ti re dimoun i ti dan drog. Be selman zot, zot pa'n deside pou zot swiv sa semen. Mwan mon pou donn mon siper sa Mosyon ki Onorab Bastienne ki'n ganny demande par Onorab Woodcock.

Mon pou donn mon siper *full* lo la akoz mon panse se ki mou bezwen sov sa zenerasyon, akoz si nou pa sov zot demen *in the end*, nou pou napa ankor bann zenn ouswa bann dimoun ki pou vin apre nou pou kapab vin bann *leaders* dan nou pei. Mersi Mr Deputy Speaker.

MR DEPUTY SPEAKER

Mersi Onorab Roucou. Prosen entervenan Onorab Samynadin.

HON KELLY SAMYNADIN

Mersi Mr Speaker. Bonn apre midi Mr Speaker. Tou mon koleg Onorab e tou dimoun a lekout.

Mr Speaker en *Juvenile Center* i devret ganny kre avek bi pou gard e reabilit bann zanfan ou adolesan ki'n komet en lofans, e pou en rezon ou en lot i bezwen ganny anmase, akoz i pa *fit* pou li viv lo en baz tanporer dan lasosyete.

Atraver bann letour ki mon'n fer dan mon distrik Au Cap i ti inevitab pou vvar la kantite zanfan ki lo semen apre 6er diswar. Swa zot pe parwaze lo en bisiklet ou en *scooter* kot zot souvandfwa *end-up* viktim en aksidan, swa zot pe marse dan bann gran group ki souvandfwa napa en paran avek zot.

Kestyon ki mon demann mon lekor se oli sa bann paran? Akoz ki nou bann paran i perdi kontrol dan zot zanfan? Koman paran en zenn adolesan, mon fer li mo devwar pou asire ki mon zanfan letan i pa dan lekol mon konnen kote i ete, lekel ki i pe frekante e si pa neseser pou bouze san mon lakonpannyman mon pa fer li.

I pa kestyon ki mon pe priv mon zanfan, me i akoz mon pe azir koman en paran responsab, pour ki mon zanfan pa tonm dan ban move lenfliyans.

Nou bezwen pran kont ki nou bann zanfan i vreman vilnerab, e zot fasilman kapab

ganny manipile pou al komet ban akt ilegal ou kriminel ki pou kapab kout zot e zot fanmir ser.

Dan lepase nou'n temwanny plizyer program reabilitasyon pou bann zanfan inisyé par Gouvernman, ki pa'n reisir akoz swa zot pa'n ganny akorde sa lenportans ki ti merite ; bann formater pa'n ganny ankadre sifizaman e adekwatman, e plis ki sa facilite resours pa'n sifizan ou ti napa ; oubyen i napa swivi apre ki sa bann zanfan in kit sant parey mon koleg Onorab Woodcock in dir oparavan.

Atraver mon leksperyans koman en ansennyan, mon kapab dir ki plizyer zanfan ki'n pas atraver en program reabilitasyon, pa'n reisir dan lavi. Swa zot in vin bann delenkan, zot in tonm dan labi e trafik sibstans, oubyen zot in *end up* dan prizon akoz en mankman direksyon de la par bann ankadrer neseser. E parey mon'n dir i napa swivi pou asire ki sa bann adolesan pa tonm dan en move direksyon.

Mr Speaker mon pa pe dir ki en *Juvenile Center* pa relevan dan nou konteks konmela, o kontrer. Me mon santi ki i nesesit en lorganizasyon ki

stratezik kot tou parti prenon i ganny pran an kont.

Premyerman nou bezwen asire ki dwa sak sa bann zanfan pandan ki zot dan sant reabilitasyon kot sa sant pe ganny respekte. Tou resaman Lasanble Nasional ti ratifye Protokol Konvansyon lo dwa bann zanfan. En Trete miltilateral ki'n ganny *design* pou promot proteksyon bann zanfan dan lemonn antye.

Alors sa lenstitisyon i bezwen asire ki drwa sak sa bann zanfan ki enplike dan sa Protokol, ki enkli drwa pou provizyon, drwa pou proteksyon e drwa partisipasyon. Tou parti prenon ki enkli Gouvernman, Lotorite, piblik e paran i devret asire ki sak sa bann zanfan i zwir zot drwa malgre ki zot pe pey pou lofans ki zot in komet.

Dezyenmman parey nou tou nou konnen, Lartik 33(a) nou Konstitisyon i sertifye ki Leta i rekonnet drwa tou sitwayen a ledikasyon e avek bi po air realizasyon efektiv sa drwa, pou fer provizyon ledikasyon obligatwar e gratwit dan bann lekol Leta ki pa ava pou en peryod mwens ki 10an, parey i kapab ganny preskrir anba Lalwa.

Dan sa ka mon santi ki bann resipyen sa *Juvenile Center* i devret kontinyelman

ganny akse avek zot letid pandan ki zot pe deservi zot letan dan sa fasilitate pour ki zot osi zot pa ava perdi pou reste deryer.

Trwazyenmman, bann fasilitater programm atraver bann diferan partener kle ki enkli Minister Ledikasyon, Lasante eksetera, i bezwen ganny bann lankadreman e formasyon ki neseser pou asire ki bann bezwen kognitif psikologik, sosyal eksetera i ganny zwenn.

E katriyenmman sa fasilitate li menm i bezwen byen ganny ekipe avek tou resours azour e neseser, pou fer sir ki programm li menm pa ganny retarde. Mon pe osi demande ki bann swivi neseser i ganny antreprann, pou fer sir ki ler zanfan i kit sant zot pa deroute e retourne dan sa menm labitud, san kwa sa programm reabilitasyon li menm pa pou konn sikse parey in leka dan lepase.

An konklyzon Mr Speaker mon ti a kontan lans en lapel avek tou paran. Proverb sapit 22 sapit 6 i dir; "ansenny en zanfan dan ladrwatir e letan i ava vin adilt i pa ava elwanny son lekor avek."

Planifikasyon familyal i vin avek etik, ledikasyon i komans dan lakour e atraver sa

bann vale ki nou ban zanfan in akeyir se sanmenm ki zot pou al avek partou.

Se pour sa rezon ki en kantite nou bann adolesan i *end-up* pe komet bann lofans ilegal, lekol napa kontrol lo disiplin e nivo delenkans dan lakominote i ogmante.

Set akoz zot napa direksyon e gidans paran, an rezulta sa i kre en lot kou ekonomik lo Gouvernman e vwala kot ozordi nou pe vwar nou pe demann Gouvernman pou etablir en *Juvenile Center* rezidansyel.

Nou zanfan i pou reste pou nou, nou zanfan i reste nou zanfan tou dilon nou lavi. Granmoun i dir annou pa elve nou zanfan pou nou me pou lasosyete. Pwen refleksyon Mr Speaker. Avek sa mon pe konform mon sipor pou sa Mosyon. Mersi Mr Speaker.

MR DEPUTY SPEAKER

Mersi Onorab Samynadin. Aprezan mon ava apel Onorab George Romain.

HON GEORGE ROMAIN

Mersi Mr Speaker. Bonn apre midi tou Manm koleg Onorab. Bonn apre midi tou dimoun a lekout. Mr Speaker mon pou siport Mosyon anmennen par Onorab Bastienne, akoz mon

santi ti'n plis ki ler pou annan en tel fasilité, kot nou a kapab anmas nou an zanfan ki annan bann move konportman, kot nou pe vwar ozordi paran nepli annan kontrol lo zot e osi bann zanfan ki sibir problem sosyal.

Mr Speaker mon ti ganny sans partisip dan en *forum* ki ti ganny er kot lotel Savoy preski 2 semenn pase pou diskit lo *gender base violence* dan nou pei. Bokou lenformasyon ti ganny donne, me par kont en mankman en *Juvenile Center* ti ganny fer resorti tre for.

Mr Speaker nou ti ganny me dir par en zofisyé Lapolis ki ler zot anmas en zenn ki pe fer move konportman oubyen en zanfan ki'n sibir par problem sosyal zot napa en landrwa ideal pou met sa bann zanfan.

Mr Speaker nou Gouvernman i merit tret sa size vreman serye, akoz si naryen pa ganny fer pou ed zot nou pou kapab vwar plis krim ek problem sosyal dan nou pei dan lavenir.

Mr Speaker parey nou pe vwar lo *social media* kot bann zanfan pa pe konport zot byen, e menm zanfan lekol pa pe respe bann propriete lekol e sa i vreman sagrinan.

Mr Speaker la mon oule fer en lapel avek bann paran pou silvouple koz ek zot zanfan

pou pran zot responsabilite, e pou ede evite zot zanfan i tonm dan sa bann move konportman.

Mr Speaker avan mon terminen mon oule dir avek mon koleg Onorab Bastienne, ki mon pou donn li tou mon sipor pou sa Mosyon akoz en tel fasilité i ava ede pou sov nou zanfan. Mersi Mr Speaker.

MR DEPUTY SPEAKER

Mersi Onorab Romain. Mon ava apel aprezan Onorab Labrosse.

HON RICHARD LABROSSE

Mersi Mr Deputy Speaker. Mon a dir ou bonn apre midi, bon apre midi pou tou bann koleg LDS isi dan Lasanble e osi mon bann koleg ki pe ekout nou from home e tou lezot dimoun an zeneral.

Mr Speaker devan nou i annan en Mosyon anmennen par Manm Lasanble pou Ile Perseverance, ki pe demann Gouvernman pou komans demars pou etablir en *Juvenile Center* rezidansyel avek bi pou reabilit bann zenn anba laz ki sibir ban labi ek fleo sosyal ki byen sir nou'n ganny en lamannman par MNA Grand Anse Praslin.

Mr Speaker Mosyon ki devan nou ozordi i annan merit, dan sa monn modern ki nou pe viv ladan nou pe vwar poudir ki

konportman zenn i sanze de zour an zour. Wi nou aksepte ki lemonn i evolye, latitud dimoun osi byen ki zenn i evolye pou adapte ek bann sanzman. Me sa bann levolisyon dan konportman zenn i pa toultan pozitiv.

Annefe i ariv en staz konmela ki rarman ou tann rapor pozitiv lo zenn, me sa plito bann keksoz negativ ki vin i aplik konversasyon tou le zour e sa i vreman a sagrinan.

En konplent ki mon ganny bokou dan mon distrik Mr Speaker se bann zenn anba laz ki apre 6er diswar ou war zot lo semen, bann konplent i viz sirtou or dan bann *Housing Estate*. Pou en zanfan grandi, i bezwen annan en bon lankadreman e sa i komans prensipalman dan lakour dan form disiplin.

Mr Speaker pou en zanfan kapab konn byen ek mal fodre ek sa paran pe enkilke dan li bann bon valer moral e osi annan sa disiplin. La mon pou lans en lapel avek tou paran, wi lavi pa fasil, lavi i vit, wi nou fatige, wi nou travay, wi nou vvar nou tousel. Me malgre tou sa defi lavi paran nou bezwen realize ki nou priyorite primordyal se nou zanfan.

In plis ki ler pou paran reveye, debout ferm, sirtou fer

sir ki nou annan en kontrol lo zanfan.

Parfwa i annan paran pa tou me ser ten ki ankor les nou zanfan en pti pe tro lib. E sa dan li menm parfwa i anmenn avek li lezot problem sosyal. Mon pa pe dir ki zanfan pa bezwen on laliberte ek son lendepandans, me aprann fodre ki toultan fodre nou en pi pa pli devan ki sa zanfan e war e konn tou son bann devire tournen.

Plizyer nou ensi ki mwan menm Mr Speaker, nou kontan rakonte mannyer vwazen lontan ti reprimann nou oubyen tarde pou al dir nou paran zot in war nou pe fer en tel keksoz e la paran ti pran bann aksyon avek nou. Me Mr Speaker konmela i pa fasil pou en vwazen reprimann en zanfan parey dan lepok lontan.

Akoz konmela ler en adilt pe met en rezonnman ouswa en gidans avek en zanfan, ou vvar en manman avek en papa ouswa la fanmir antye i vini apre, se la kot problem i agrave.

Problem delenkan in vin en fleo e se nou pa pe kapab demanti sa. Lo rezo sosyal e an personn nou vvar bann sityasyon kot bann zanfan pe fer bann aksyon par ler ki pli terib ki adilt.

Mon profit sa lokazyon pou demann Servis Sosyal pou petet revwar la fason travay e lafason ki zot tret bann konplent ek bann ka ki ganny mete a zot latansyon.

Mr Speaker dan mon letan ki mon ti pe grandi, mon rapel ti annan en sant Praslin ki ti apel YRTC, bokou zenn e sa letan nou ti vreman fer sir ki nou fer keksoz sa keksoz negativ ki nou ti rekonnert nou granmoun ti dir nou i pou anvoy nou YRTC.

E sa ti efrey nou e ti osi fer nou vvar keksoz dan en lot fason. Me sa sant osi in fer fas avek bokou defi e finalman in fermen.

I vre ki parfwa paran i santi zot lanmen i anmare apre zot dir ou, ou zanfan i dir zot annan zot drwa. Me zanfan i bezwen realize ki ou drwa i vin avek responsabilite e sak aksyon i annan son konsekans.

Sesel nou annan *Children's Acts* koni koman en Lalwa zanfan, parmi bann diferan provizyon sa Lalwa i koz lo Lakour *Juvenile* e ofer mansyon plizyer penaltı ki avek bann lofans, ki ganny komet anba sa Lalwa e ki laz ki sa bann penaltı i ganny aplike.

Ler ou lir tousala Mr Speaker, konklizyon ki mon fer se ki bokou i depan lo paran.

Responsabilite paran i zwe en rol kle pou ede pou fer sa bann tel aksyon pa arive. Lo sa laliny Mr Speaker mon pou dir ki wi nou bezwen en *Juvenile Center*.

Annou pa pran sa sant koman zis en landrwa kot pou zis anmas sa bann zenn kondannen, me nou devret fer sir ki sa sant i okipe avek bann diferan resours ki ler en zenn ou sa bann zenn i sorti dan sa sant, zot ava osi anmas keksoz ki pou ed zot re etablir zot dan lasosyete.

Mr Speaker en keksoz ki nou bezwen pran kont dan en bon pe ka, ki sa bann zenn i reakte dan en fason koman en form latansyon oubyen sa ki nou dir an Angle *a cry for help*. Alors en *Juvenile Center* i ava donn sa zenn sa koreksyon ki fer an rezulta son aksyon, me osi ed sa zenn fizikman, psikologikman, akademikman e menm spirityelman.

An se moman dan Sesel ozordi kot nou pe koz lo nouvo sant rimann sirtou konmela Mr Speaker, dimoun i vin en pe pli odeganm kot nou pe rod kaso odeganm, nou bezwen fer sir poudir nou egalman annan en facilite apropriye pou nou bann zenn osi.

Avek sa Mr Speaker mon donn sa Mosyon mon *full* sipor. Mersi.

MR DEPUTY SPEAKER

Mersi Onorab Labrosse.

HON NORBERT LOIZEAU

Mersi Mr Deputy. Bonzour tou Manm. Bonzour tou dimoun a lekout.

Mr Speaker pou komanse mon anvi felisit mon ser Desheila Bastienne, Onorab Bastienne pou sa bon linisyativ ki in pran apre sa pti *workshop* ki ti annan Savoy, i pa'n les sa reste dan en tirwar avek lapousyer lo la, parey ti arrive avan, li in pran sa in vin depoz la kot nou pou nou kapab debat lo la.

Mr Speaker mwan ler mon'n ekout Mosyon mon pa pe vin lir Mosyon pou eksplik, pou dir ki annan dan Mosyon, mon krwar nou'n ase tande ki annan dan Mosyon, mwan mon anvi vin koz lo bann *issues* ki relye avek sa Mosyon.

E ler mon pe ekout bann dimoun, bann Onorab ki'n koze, Mr Speaker i annan en ta problemm dan nou pei. Problem i en ta ek en pake dan nou pei. E ler mon pe koz lo la i fer mon mazin ler mon ti pe vizit Praslin, mon i pe konpanny Praslin Onorab Woodcock ti anvoy mon lo blok Amitie.

Ler mon ti lo blok mon ti zwenn en msye, Mr Victor, ou

konnen ki i ti dir mwan? I ti dir mwan "Onorab, en ta problemm i annan dan pei, me selman Gouvernman, sa bann letan mon ti ankor dan Lopozisyon, Gouvernman in pran en pti mouswar in kouver, me selman problemm in depas mouswar ni en dra ou pa pou kapab kouver li avek, akoz in fini flote anba lessyel." Sa parol ki Mr Victor ti dir mwan.

Vre Mr Speaker, ozordi Mosyon in vin devan nou akoz sityasyon ki nou ladan. E tou sa bann problem Mr Speaker se ban problem ki'n ganny vir ledo avek pandan en bon pe letan, akoz problem ti la li, zis selman nou pa'n enterese avek e nou'n vir ledo avek. E ozordi tou keksoz, tou sa bann problem pe pet an fler anba nouvo Gouvernman.

Aprezan i vin nou responsabilite nouveau Gouvernman Mr Speaker pou nou kapab dil avek sa bann problem Mr Speaker ki nou, nou'n erite koman en Gouvernman.

Pourtan konvansyon ti fer parti Konvansyon, *workshop*. Konsiltan parti konsiltan, rekomandasyon ti ganny fer Mr Speaker. I annan rekomandasyon ti ganny fer, dernyen fwa dan sa *workshop* nou'n tande, kote i ete sa bann

rekomandasyon? Nou pa'n war.

Ozordi la ler pei in sanze ki nou al *workshop* nou war rekomandasyon konmsi pe komans sorti, i annan ki pa ti abitye koze, ki ti zis dir wi ozordi zot pe vin devan, nou i war dan sa *workshop*. Ozordi zot ki pe koz plis, pe dir i annan sa, i annan sa, i annan sa!

Pourtan lontan zot pa ti fer. Me sa i en keksoz byen ki'n arive anba nou Gouvernman nou'n kapab donn dimoun sa lavwa pou zot koze e pou ozordi pou nou kapab dil avek bann *issues* ki pe afekte nou.

Mr Speaker ler mon'n ekout bann entervansyon i montre en degradasyon dan nou soryete Seselwa ozordi Mr Speaker. Kot tou sa bann manrmay ... avek napa kontrol lo la. Ozordi i annan in dir manrmay pe mars ek kouto anvil, pou zot parey mon ti dir lot zour pou zot sa i en bolpenn ki zot travay avek.

Seks anba laz ; seks anba laz Mr Speaker, me seks anba laz pa pe ariv zis ek bann marmay an delenkan, bann manrmay ki nou pe koz lo la, i pe ariv ek bann manrmay normal osi ki fanmir pe okip zot byen. Annou pran sa osi kont.

E tousala Mr Speaker sirtou pou lo kote bann marmay

ki an delenkan ki nou pe koz lo la, i annan en ta keksoz ki vin deryer.

E nou koman bann *MNA* dan nou marse dan distrik nou'n rankontre plizyer bann sityasyon ki koz, ki pe fer ki ozordi soryete nou pe ariv dan sa bann sityasyon koumsa. Kot en zenn fiy laz 15an i fer zanfan. Nou'n koz sa. Plizyer sa nou'n koze Mr Deputy ou ava rapel byen.

E ler manman i annan 30 an li i annan 15an papa in kite ek manman, li i ankor zenn li osi i oule welele. I rod en nouveau zonm, e dan lakaz ler sa boper i vini i annan 2 zenn fanm dan lakaz, i annan sa madanm 30an ek son fiy 15an, 16an ki pe monte e ozordi Mr Speaker i annan bann boper ki annan bann diferan kalite *mindset* ozordi, mon pa pou la an detay lo la, zot konpran ki mon pe dir zot.

Be souvandfwa i arive ki sa bann zenn fiy i ganny abize seksyelman, pa zis manman ki ek boper, me zenn fiy osi pe ganny met presyon lo la. E souvandfwa ou war sa bann zenn fiy zot, zot sove, zot sove akoz sa presyon boper i bokou e zot *end-up* dan *street*. Dan *street* zot *end-up* dan tou sort kalite keksoz ki nou konnen i annan la deor.

Me souvandfwa osi sa bann manrmay, mwan mon pe dir zot manrmay akoz mwan en grannwanr, en vye grannwanr. Se zot ki tonm dan drog, se zot ki tonm dan drog avek prostitisyon. Se zot ki antre dan bann keksoz en pe delenkan ki fer ki zot *end-up* souvandfwa prizon.

E naryen pa ganny fer pou ed sa bann manrmay. E tou sa bann manrmay ki'n ganny kit ater Mr Speaker, pou zot sa kalite lavi i vin *ok* zot, akoz personn pa pe anmas zot. Personn pa pe soutenir zot, napa en landrwa pou anmas zot e sey diriz zot en pe. Alors pou zot lavi i *ok*.

I annan sa *Juvenile Center* avek sa sant rezyonal ki nou pe koz lo la, la lo Mosyon. Zot kapab anmas sa bann manrmay. Nou pou kapab donn zot vre direksyon lavi. Akoz tou sa bann manrmay konmsi Kreol konmela, tou sa bann manrmay in perdi vre, zot in perdi tou sans viv, zot napa en direksyon.

E ozordi Mr Deputy ou zwenn sa bann manrmay souvandfwa, mwan mon frekant anvil mon mars anvil byen. Souvandfwa i annan i vini, zot vin koz ek ou serten keksoz. Me ler ou dir zot fer, ser sanze, lanmor ki pou tir ou,

ouswa ou pou al simityer *or* mon pa konnen - arete sa kalite lavi. Ozordi si ou dir en boug aret frekant o bor semen sa lavi asize vey en bout bwar, vey en bout drog la en lavi.

Mr Speaker sa i ganny gete koman en lensilt parmi nou annan zenn ozordi, mwan mon ganny sa problem mwan, zot dir ou pe ensilte zot, kan saler Mr Speaker ou pe met en direksyon, ou pe met direksyon. E ozordi i annan tro bokou zot la deor, bann ki frekant anvil, mwan mon pas Lari Bazar mon war. Desann zot a trouve, enn fiy 16an, 17an, 14an pe pase ek en pri baba.

E souvandfwa Mr Speaker ki enteresan, ozordi bokou zot sa bann manrmay ki'n perdi sa direksyon la, zot tonm ansent, zot fer zanfan apre zot kit lopital zot ale. La ler mon pe koz lo laz, i fer mon mazin en zanmi mon fek sorti kot li Sanmdi. Ki li in pran en pti baba ki enn sa bann manrmay ki nou pe koz lo la in fer e li in kit lopital li, e li in anvi en garson pou ed li pli tar lo son laferm.

E son laferm i en later ki'n zis mont lo la e pe sey demann Gouvernman pou *lease* li la, in pran sa zanfan e apre 3an ki li i trouve, ki zot trouve ki sa zanfan i otiz, zanfan pa koze, zanfan zis i la konmsi i pa la. In

dir mwan be li in pran sa Mr Speaker, in pran sa zanfan in aksepte pou pran preznan in war sa kondisyon, i napa lot swa i bezwen mor ek son boul, ler i war sa zanfan i koumsa.

Konbyen Mr Speaker lezot pti zanfan parey ki pe ne ozordi Lopital Sesel avek bann kondisyon parey? En kantite bann zanfan ki pe ne ek lefe eroin. Dernyen fwa mon ti pe konpanny Perseverance mon ti pas kot en madanm i ti montre mwan karakter sa bann manrmay, i fer lapenn Mr Speaker, i fer lapenn.

Pa fini Mr Speaker e ler ou annan sa bann zanfan *juvenile* pe vin an delenkan, e toulstan i annan bann predater la deor ki kontan sa bann zafer Mr Speaker, pa krwar en. Nou, nou pe debat lo la nou anvi dil ek sa bann keksoz, la deor i annan dimoun i kontan sa! I annan dimoun pe servi sa bann manrmay ki napa en landrwa ki'n ganny zete pou travay koman *sex workers*.

Mwan mon pa anvi dir *sex workers* mwan, selman konmela avek novo form par si ou dir, si mon servi sa lot term zot pou dir i pa zoli sirman ma servi *sex workers*. I annan tousala Mr Speaker pe deroule. I annan ki *end-up* lo *ghetto* pe vey tou sa bout drog e si nou ti

an sa landrwa ki nou ti kapab anmas zot, petet ti kapab en fason pou nou kapab diriz zot.

Mr Speaker akoz Sesel, Sesel i tro pti pou tou sa bann keksoz. Mon krwar zot pou dakor ek mwan. Mwan toulezour mon anvil ennler mon pa se mon gete mon fer mon lespri travay e mon demann mon lekor, eski sanmenm sa Sesel ki mon anvi mon zanfan grandi ladan? Pa sa, sa Sesel Mr Speaker. Sa Sesel in sanze.

Dernyen fwa, yer mon krwar Mr Speaker mon ti pe ekout en programm lo radyo. Yer swar en pe dan bann 7er edmi, 8er ler mon ti pe desann ti annan bann *social workers*, ti annan Lapolis, i annan enn de dimoun lo sa *panel* ki ti pe koze e sa size ti monte.

Responsabilite ti pe monte. E sa bann dimoun ti menm dir bann paran i bezwen pran responsabilite en paran ler son zanfan i bon, manman i met dan en plato, zour son zanfan i konmans donn li en pe latet fermal Mr Deputy i dir ou sa problemm Lapolis.

Sa problemm *social workers*, akoz, sa piti i en latet fermal. Me selman ler i pe fer byen dan plato, i en Senyer manman i mars avek partou. Me akoz ou pa fer parey ek sa enn ki pe donn ou lenfirmite,

sey ed li koman sa paran i ou devwar, akoz se ou ki'n met li la, i pa ti anvi vin la li, ou ki'n met li la.

Mr Speaker sa deba lo radyo yer ti vreman enteresan, mon ti pe desann pou mwan al fer legzersis, mon ti'n bezwen asize dan transpor *park*, ekoute. Kot se sa ki mon pe dir relevans Mosyon Onorab Desheila Bastienne, akoz pa sis nou isi la annan ki annan sa konsern, me lezot dimoun deor zot osi zot konsernen.

Mr Speaker avek sa detrwa pti mo, Onorab Desheila pe dir mwan *wrap-up* akoz ler, Me selman mwan, mon pa anvi *wrap-up*. Selman mon ava *wrap-up*.

Mr Speaker mon anvi dir ek Desheila Bastienne mon pou siport sa Mosyon ek lamannman ki in anmennen par Onorab Woodcock an partisipasyon ek Onorab Naddy Zialor.

Mon anvi dir li mon pou siport sa Mosyon e mon anvi dir Gouvernman get dan sa Mosyon byen, mon konnen ki nou dan en leta difisil pei, me selman annan en lizye lo la.

Mon konnen sa pa pou ganny fer deswit, me selman nou pe *voice* sa la pou nou met sa *awareness* lo zot anler laba dan L'Egzekitiv, pou gete dan

en possibilite pou nou fer sa arive. Mersi m Speaker.

MR DEPUTY SPEAKER

Mersi Onorab Loizeau. Mersi pou *wrap-up* zis 3er edmi. Donk i ava donn nou letan pou nou pran en *break* e nou ava retournen 4er.

(BREAK)

MR DEPUTY SPEAKER

Bonn apre midi ankor enn fwa tou bann Manm.

Nou pou kontinyen avek nou deba lo Mosyon prezante par Manm Elekte pou distrik Ile Perseverance Onorab Desheila Bastienne, Mosyon ki dir Lasanble i aprouve pou demann Gouvernman pou komans demars pou etablir en *Juvenile Detention Center* pou zanfan ki fer lofans e en Sant Reabilitasyon Rezidansyel avek bi reabilit bann zenn anba laz ki viktim labi e fleo sosyal.

Prosen entervenan lo lalis, Onorab Sandy Arissol.

HON SANDY ARISSOL

Mersi Mr Speaker. Bonn apre midi tou bann Manm. Mr Speaker nou annan en Mosyon enteresan anmennen par Onorab Desheila Bastienne. Premyerman mon ti a kontan profite ozordi ankor enn fwa,

felisit Caucus bann madanm dan Lasanble Nasyonal pou sa sesyon travay ki zot ti organize avek ou bann lezot Lazans pandan 2 zour, 2 semenn pase.

E dan sa sesyon travay ti annan differan Lazans ek differan responsabilite e nou ti osi annan bann *PS* e osi Minis. E sa i ti pli enteresan sete prezans Prezidan Larepublik k ti la. E mon rapel tre byen i ti fer en zoli diskour an relasyon avek programm travay sa zour.

Be mon'n komans koumsa an dizon ki Prezidan ti prezan parske, si Prezidan ti la e in fer en zoli diskour an relasyon avek sesyon travay, savedir Prezidan ti pe montre lenportans sa 2 zour sesyon travay ki i ganny organize par *Caucus Lasanble Nasyonal* bann Madanm, pou Manm Lasanble Nasyonal avek lezot sekter ki zisteman deroul travay avek size ki nou pe koz lo la.

Mon'n komans koumsa parske parey tou dimoun i konnen Mosyon pa *binding* lo Gouvernman, e si Prezidan ti la dan sa 2 sezour, 2 sesyon travay mon asire ki Prezidan i met lenportans lo tou bann lezot keksoz diskisyon ki pas, Mosyon ki ganny anmennen dan Lasanble Nasyonal.

E mwan mon santi poudir sa enn ki la osi i pou ganny

latansyon Prezidan e pou ganny latansyon Gouvernman pou nou zisteman kapab asire ki s Mosyon i tonm dan bon lanmen, e en keksoz i ganny arive avek.

Dezyenmman Mr Speaker letan mon ti dan sa sesyon travay, mon rapel letan ti'n ariv dezyenm zou kot nou ti ganny bann enteraksyon avek tou bann Lazans, bann diskisyon ti monte e ti annan propozisyon ki sa sesyon travay pa zis fini, lanmenm antre nou, me i annan ban aksyon kont ki ganny pran.

Ozordi atraver sa Mosyon anmenn par Onorab Desheila Bastienne en Manm *Caucus* bann Madanm ki ti ede avek sa sesyon travay, in anmenn en Mosyon zisteman an relasyon avek bann rekomandasyon ki ti ganny fer pandan sa 2 zour travay.

Pour ki en sant pou nou ban enn avek difikilte swa disiplin, swa lezot problem, nou kapab anmas zot ankadre zot, pou nou kapab gid zot pou le fitir.

E Onorab Bastienne in fer sa alor ankor enn fwa felisitasyon e i annan en travay swivi an relasyon avek sa bann sesyon travay ki nou fer.

Be Mr Speaker nou pe koz en topik enteresan, se zanfan.

Kisia zanfan? Lontan ler nou, nou ti zanfan nou paran ti donn nou bann pti non gate, nou ti apel sa bann pti non barok ki nou ti gannyen kot lakour.

E souvandfwa non ki ou annan lo ou kart idantite, i pa ti neseserman sa non ki ou paran ti kriy ou kot lakour, oubyen sa non ki ou vwazen ti konn ou dan zanmerant. Me annou get en kou bann non ozordi dan 2022 dan en latmosfer modern, teknolozi avanse, get bann non ki nou, nou donn nou zanfan ozordi. I en

“gran fou bet”, nou apel li
“piti”, nou dir li,

“i en “yonyon”,
souvandfwa nou apel li
“manrmay” oubyen nou
kriy li

“e ou la”, nou apel li
“alo”, nou dir li i en
“gran nigo”, oubyen nou
refer li koman

“en” san servi son non ki nou'n pran letan pou nou al avec kot *Civil Status* pou nou deklar li, pou nou donn li nou sinyatir pou nou asire poudir i en zanfan responsab.

Annou get en kou Mr Speaker bann priyorite ki zanfan i gannyen ozordi avec zot paran letan nou lo tou sa bann problem. Ozordi i priyorite en paran pou don son

zanfan en *play station* R7mil ekek.

Me selman sa zanfan ler i al lekol i napa en *calculator* pou li kapab fe serten kalkil an relasyon avek son lesion. Priyrite en zanfan ozordi se nou donn li en *smart phone* R12mil a R13mil, selman i napa en *proper bag* pou li met son file, son liv, son bann dokiman lekol pou pa mouye ek lapli.

Priyrite en zanfan ozordi par nou paran, se pey en lasirans lavi pou li pour ki letan i ganny 18an i annan en sonm larzan ki sipoze vin pou sa zanfan. Be selman sa zanfan ki annan en sonm larzan pou li letan i ariv 18an, souvandfwa i ganny difikilte pou li aste en goute lekol parske son paran pa'n donn li en larzan pou aste en goute. Sa i bann priyrite ozordi.

Mr Speaker mon komans koumsa parske nou annan en problem. Nou annan en gro problem dan nou pei. Me selman nou bezwen rekonneta poudir i an en kantite travay k'in ganny fer an relasyon avek ed nou bann zanfan, ed nou bann zenn, nou bezwen rekonneta sa.

Nou annan en kantite Lazans dan pei ozordi ki'n pa dormi dan aswar, ki souvandfwa zot ganny bann

phone call zot bezwen entervenir, zot bezwen entersepte e zot pe fer en travay e avek nou zanfan. Nou bezwen aksepte. Me difikilte i la e nou bezwen rode ki mannyer nou dil avek sa bann difikilte.

Me parfwa ou asize ou ekout bann santer. Bann santer in fer diferan sanson lo nou bann zanfan. Par egzanp letan ou ekout sanson Patrick Victor ki dir "Donn li en rev."

Letan ou ekout Jany Deletourdie ki sante ki dir ek ou, "ou bezwen pran letan pou ou grandi koman en zanfan.",

Ou pa prese dan lavi, en keksoz ki mon tann plizyer mon bann Manm pe koz lo la. Me parkont Antoinette Dodin li i sant "Pti Tobi i en bon pti garson."

Me kestyon ki nou bezwen demande ozordi 2022, eski nou annan bann bon Pti Tobi ozordi? Letan mon'n ekout Mosyon Onorab Bastienne nou annan en kantite difikilte lavi ki nou bann zenn pe fer fas avek.

E i en problem, par egzanp ozordi pou fer en zanfan ou bezwen 2 dimoun pou fer en anfen. Pou fer grandi en zanfan ou bezwen 2 dimoun pou fer grandi en zanfan, pou elve ou zanfan i bezwen sipor 2 dimoun, parfwa 3 dimoun.

Pou fer elve ou zanfan. Me ozordi la realite lavi i konter nou poudir mazorite bann manman zot tousel. Akoz zot tousel, ozordi nou Sesel mazorite popilasyon nou bann zonm nou annan en pe. Nou vwar zot dan bomaten pe al pran zot *methadone*. Nou lot pe zonm zot Montagne Posee, nou lot pe zonm ki reste swa zot pe mandyan dan kwen laboutik, swa zot menm zot, zot bann delenkan dan vwazinaz pe koup tou rezim bannann dimoun, pe kas ou zavoka, pe fer letour lakaz.

Sa i la realite dan nou pei bann zonm. Finalman nou reste nou avek en poursantaz fanm ki vwar zot, zot tousel, avek zot zanfan pe *survive*, pe rod en lavi.

Alor letan ou annan nou zanfan ki pa an sekirite kot son lakour, manman in al travay e li, li tousel, alor ki arrive? Nou vwar zanfan lo semen. Nou vwar zanfan en pe partou dan la kominote. Me tousala i refoul lo nou pei. E i refoul lo Bidze ki nou annan e i refoul lo bann Lazans ki dil avek bann zanfan.

Me ozordi Mosyon pe demande ki nou fer en keksoz an relasyon avek sa, Mr Speaker. Nou bezwen fer en keksoz e koman en Gouvernman ki serye mon santi

poudir nou bezwen adres sa problemm. E se pour sa rezon ki Onorab Desheila pe rod en siper avek Gouvernman pou nou ansanm avek bann lezot Lazans ki ti la dan sa sesyon travay, pou nou vwar ki mannyer nou kapab ed nou bann zanfan.

Zot a rapel dan lepase nou ti annan YRTC ki'n ganny mansyonn, ki'n ganny koz lo la, in annan plizyer bann landrwa ki'n ganny propoze pou fer bann sant, en sant pou bann zanfan, bann zanfan ki annan problemm. Cap Ternay ti en lokasyon ki ti ganny propoze plizyer fwa. Bonne Espoir i en lot landrwa ki ti ganny propoze plizyer fwa.

Me tousala i bann diskisyon i bann refleksyon ki'n ganny fer e ki enportan pou nou kontinyen koz lo la.

Me ozordi i annan en keksoz enteresan ki pe arive se ki nou annan bokou bann trwazyenm az, bann gran manman, bann gran papa ki pe okip zot pti zanfan, parske swa manman, swa papa i dan drog, swa manman swa papa in mor, e sa i refoul lo bann gran manman. Avek sa pri sekirite sosyal ki i gannyen i vwar li i bezwen annan bann lezot responsabilite an plis ki i gannyen.

Sa osi i vin en problem Mr Speaker e nou bezwen rekonnet e aksepte poudir i annan sa bann problemm. Me le solisyon ki nou bezwen, rezulta ki nou bezwen se pour nou rode ki mannyer nou ede, ede pour ki bann zanfan ki nou'n tann Onorab Desheila ek lezot Manm in koz lo la pa tonm dan bann sityasyon difisil e souvandfwa nou perdi zot.

Mon rapel dan enn nou bann sesyon Lasanble Nasyonal dan sizyem Lasanble, nou ti koz lo en pti garson zenn pti garson, mon pa bezwen mansyonn son non, mon krwar ti dan distrik Onorab Henrie ki ti perdi son lavi tre zenn e i ti ganny dekouver dan en vye lakaz abandonnen dan distrik Mont Buxton. Mon krwar sa i bann sityasyon ki nou pa anvi i arive avek nou bann zenn zanfan.

Be i annan en lager ki mwan mon toultan mon lager e toultan mon demann kestyon lo la. I annan sa zoli *advert* ki fer lo radyo ek televizyon, Sandy Arissol in perdi pa ankor retournen in ale depi Vandredi pase in absant lakour son paran, silvouple sa ki vwar li kontakte kordgard pli pre oubyen telefonn son paran fer konnen.

Anba sa menm lanons i annan en lot bout ki dir lo radyo ek televizyon. Pa blyie en lofans pou ou *harbor* okenn zanfan ki pa pou ou zanfan anba laz kot tel dimoun. Mr Speaker ler sa zanfan i retournen kot son paran, kestyon ki mon anvi demande konbyen dimoun ozordi dan nou pei ki'n ganny pourswiv anba sa menm lofans ki'n ganny dir lo radyo ek televizyon, pou lapenn in gard Sandy kot li anba laz pou 4, 5 zour?

Sa i en kestyon enteresan ki mon pa ankor neseserman ganny en larepons. Se pour sa mon dir i an en kantite travay ankor pou nou fer.

E parey granmoun i dir zanfan, granmoun i dir ek ou si zanfan i dezobeir, bann zanfan dezobeisan souvandfwa zot, mor dan semen. Sa i en parol ki souvandfwa granmoun i dir, si ou dezobeisan ou en zanfan ki mor dan semen. E souvandfwa nou vwar dan nou pei nou vwar en kantite, menm bann ki'n sot laz zanfan me parfwa zot in dezobeir zot paran.

Me parey mon tann Onorab Kelly in servi en vers dan Labib, *Ephesians* osi i fer referans avek en zoli vers dan Labib ki dir
“Enfants, obéissez à vos

parents” parske sa i pli gran komannman e i pou ed ou viv lontan. Me souvandfwa sa i pa ganny arive e i annan sa mankman lobeisans dan bokou bann zanfan ozordi anver bann paran menm oubyen bann gardyen ki responsab zot.

Mr Speaker mon anvi fer en propozisyon avek Onorab Desheila Bastienne e osi an relasyon avek *Caucus* bann Madanm dan Lasanble Nasyonal. Ou konnen nou'n koz lo sant plizer nou, be kestyon ki nou bezwen demande se ki kalite sant nou pe rode?

Eski nou bezwen en sant pou bann manrmay bann zanfan ki'n fer santans, ki'n komet en krim? Eski nou bezwen en sant pou bann zanfan ki annan problem disiplin? Eski nou bezwen en sant pou fiy, en sant ou bann garson, kwa ki nou enkorpor dan sa sant?

Lekel ki pou administre sa sant? Ki Lazans? Sosyal, NCC, Lapolis, Ledikasyon. Dan sa sant ki laz zanfan nou mete, 12an an montan, 12an pli ba, par anba 18an? Tousala i bann refleksyon ki nou bezwen fer koman en Lasanble Nasyonal.

Alors Mr Speaker mon propozisyon se ki fodre par nou Lasanble menm nou'n anmenn en Mosyon se nou ki dikté kote

pou fer, lekel ki nou mete, akoz nou fer la, ki laz, mwan sa ki mon pe fer en propozisyon avek Onorab Desheila Bastienne koman loter Mosyon, e osi avek Caucus bann Madanm dan Lasanble Nasyonal;

Se ki si Mosyon i vote i ganny aprouve par Lasanble Nasyonal *full* mazorite, e Gouvernman i ekout nou, zot donn nou sipor, se la ki mon santi poudir Caucus madanm oubyen Lasanble Nasyonal, nou kapab travay avek bann lezot sekter dan Gouvernman ki relye avek sa sityasyon ki nou pe koz lo la.

Pou nou kapab tonm dakor ansanm koman en pei pou lokasyon, kote sant i ganny sitye, lekel bann Lazans ki travay dan sa sant, ki kalite ledikasyon ki nou donn bann zanfan dan sa sant. Mon krwar sa i pou enportan pou nou travay ansanm kolektivman. Be annou koman pa Lasanble nou dikte sa bann pwen swivan ki mon'n mete Mr Speaker an relasyon avek sa sant.

Mon santi poudir ozordi si Gouvernman in kapab vvar larzan, oubyen donasyon pou li fer nouvo sant rimann ozordi, mon mazinen Gouvernman pou bezwen osi war en larzan, oubyen tap en laport pou nou zisteman ganny sa sant ki

Onorab Desheila Bastienne pe propoze, pe demande pou nou bann zenn.

Zis parey nou'n ganny dir poudir sipoze annan en novo prizon ki pou ganny fer avek led enternasyonal, an relasyon avek prizon, pou nou fer li vin pli modern, fer li vin pli en sekirite. E mon santi poudir i en larzan oubyen i tap laport pou sa bann demann, nou bezwen osi ansanm travay lo menm nivo, lo menm *speed* pou nou kapab osi kre en sant pou nou anmas nou bann zanfan.

Ankadre zot byen, fer zot an sekirite, pour ki nou pa ganny ankor plis zenn a lavenir pou nou met zot dan bann sant rimann, oubyen pou nou ganny zot pou ranpli nou prizon parey mon premye pwen ki mon koz lo la, mon fer referans avek.

Mon krwar poudir Mosyon i en bon Mosyon Onorab Deshiela Bastienne atraver ou Mr Speaker. E mon santi poudir sa premyerman i ava montre bann Lazans ki nou'n travay avek pandan sa 2 zour sesyon travay pou dir Lasanble i serye, nou ti'n fer sertern rekomandasyon e nou la ozordi nou pe anmenn enn dan Lasanble Nasyonal pou rod Gouvernman sipor Gouvernman pour ki en keksoz i ganny fer.

Dezyenmman, an vi ki nou tou nou annan bann sityasyon dan nou distrik an relasyon avek bann zenn e nou tou nou'n deza en zenn e nou tou nou annan zanfan, parey Onorab Loizeau in dir nou ti a kontan ki nou zanfan i grandi dan en latmosfer pozitiv, alor nou Lasanble nou'n santi poudir en tel Mosyon i bezwen ganny anmennen e i bezwen ganny nou sipor.

E trwazyenmman Mr Speaker, parey mon'n dir lo komansman an vi ki Prezidan Larepublik i ti prezant, li la dan prezantasyon dan sa sesyon travay organize par Lasanble Nasyonal, sa ti montre sipor pou sa travay e *Caucus Madam* e osi sa ki ti pe demande.

Mon asire ki Prezidan Larepublik pou donn sipor sa Mosyon pou asire ki vre nou bann zanfan zot viv dan sekirite e zot viv byen, pour ki nou ganny bann zenerasyon lavenir pour ki nou a kapab kit nou pei e asire poudir nou koman bann adilt ozordi, demen dan nou vye zour nou pou dan bon lanmen.

Me nou pa pou antoure avek bann delenkan, me nou pou annan en bann zanfan responsab parey nou tou nou ti ava kontan annan e parey nou tou nou ti ava kontan viv avek o

bor nou e dan nou kominote.

Avek sa detrwa mo Mr Speaker mon ti a kontan dir avek Onorab Desheila Bastienne wi mon pou siport ou Mosyon i fer sans e i annan tou son relevans e parey mon dir ek ou mon swete ki tou Manm i don sipor pour ki Gouvernman osi i a kapab siporte. E asire ki nou bann zenn pe ganny anmase pou en fitir Sesel. Mersi bokou Mr Speaker.

MR DEPUTY SPEAKER

Mersi bokou Onorab Arissol. Dernyen entervenan lo lalis pou ozordi apre midi, Onorab Bernard Georges.

HON BERNARD GEORGES

Meri Mr Speaker. Mr Speaker permet mwan avan ki mon komans mon lantervansyon apre midi fer rapel sirtou pou edik en pe nou popilasyon an deor ki nou apel ou Mr Speaker malgre ki ou Deputy Speaker.

Akoz nou *Standing Orders* i dir anba *Standing Order 6(2)* ki sa dimoun ki pe prezid Lasanble a nenport ki moman son non i Speaker. E mon fer rapel tou bann Manm ki se koumsa ki nou devret adres ou ler ou dan Chair.

Mr Speaker dan katriyem Lasanble dan sa Lasal, mon ti anmenn en

Mosyon ki ti pe demande ki i annan en *Home* ki ganny etabli pou bann dimoun ki nou war zot anvil pe dormi anba en laboutik ou byen pe fouy dan en bin pe manz dan en bwat *take away* ki'n ganny zete eksetera bann dimoun ki napa en landrwa pou al kot zot.

E mon ti fer sa akoz e mon ti fer kler ki sa ki nou ti pe demande sete en lankadreman pou dimoun ki'n napa en dimoun okip zot. Si en dimoun pe fouy dan en bin, oubyen pou manze oubyen pe dormi anba en laboutik, se akoz i napa en fanmir e i napa en lankadreman familyal pou okip li.

Malerezman sa dimoun ki ti pe asiz dan sa sez a sa lepok pa'n konpran e Gouvernman sa lepok, bann Manm Gouvernman sa lepok, ti dir mwan ki mon pa'n konpran lide lespri deryer Gouvernman e sa se pa annan bann lenstitisyon me plito fors plito bann fanmir okip sa bann dimoun ki vilnerab.

E mon war sa koman en, sa in vin koman en sok pou mwan, akoz sete presizeman akoz mon ti konnen ki i annan en kantite dimoun ki vilnerab, akoz zot napa sa lankadreman familyal ki pou siport zot. E se son sa konteks ki nou ti bezwen

organiz bann lenstitisyon pou pran zot an men.

Si tou dimoun ti annan en fanmir stab avek en papa ek en manman ki ti travay, e ki ti al legliz tou le Dimans oubyen *Mosque* tou le Vandredi, e ki i okip zot zanfan e ki tou bann zanfan ti ekout sa ki zot paran ti dir, e ki tou zot paran ti al lekol. E apre lekol zot ti al fer en sport oubyen ou'n en *club* oubyen en keksoz koumsa, nou pei ti pou en paradi.

Me malerezman nou konnen ki sa i pa leka dan okenn pei lemonn e i sertennman pa leka isi kot nou, e se sa mon krwar ki fors nou detanzantan pou anmenn sa bann Mosyon devan Lasamble, e demann avek Gouvernman akoz se nou ki travay dan nou distrik. Se nou ki war sa bann problem tou le zour.

Se nou ki okouran bann defayans dan bann fanmir. Se nou ki lo *frontline* pou ed sa bann dimoun ki napa en lot fason pou ed zot, e ler nou anmenn sa bann Mosyon devan Lasamble parey Onorab *Chief Whip* ki'n koz avan mwan in dir, nou ekspekte ki Gouvernman ni ekout nou e ki Gouvernman i fer son par.

Akoz i senp pou dir, i senp pou dir les paran dil avek problem. Se pa lasosyete ki

devret dil avek sa bann problem, se bann paran, sa bann fanmir se bann lankadreman familyal ki devret dil avek sa bann problem, sa i en *passing the buck*.

Akoz nou konnen parey mon dir ki dan bokou ka napa sa lankadreman familyal, e se sa ki fer bann zenn annan de fwa e bann adilt osi, me ozordi Mosyon i lo bann zenn, mank semen e tonm dan bann problem.

Sakenn nou isi oubyen sakenn dimoun ki pe ekout nou i konn *at least* en garson ki olye al lekol anndan tou son zenes, in prefere al kas mang, in prefere al parwaze *somewhere*, i prefere pa al lekol, e ki kapab en lankadreman familyal pou fors li al lekol, oubyen pou pran li pou anmenn li kot mis oubyen ler mis i kontakte li oubyen ler *social worker* i kontakte son fanmir ki son fanmir i pran li an men.

Nou tou nou konn sa zenn *homme* ki akoz i pa'n swiv sa ki lasosyete in donn li pou li swiv koman i fini lekol oubyen koman i fini son dernyen laklas ki i pa'n ale, i kas en lakaz i fini prizon. Dan tou nou kominote i annan enn sa bann zenn *homme*. Oubyen i annan enn sa bann zenn fiy ki li osi i pa'n swiv la fason ki i devret akoz swa in

tonm dan move frekantasyon oubyen i napa sa gidans familyal e in fer son premye zanfan a laz 14an, son dezyenm 16an e *by the time* ki in arriv 21an in fini annan li en fanmir. San ki i annan en dyob, san ki i annan en lavenir e apre i tonm dan toudsort kalite kalamite.

Mr Speaker sa se nou realite, se la realite nou bann kominote. E si nou pa pran sa an men vitman, e se pour sa rezon ki sak fwa ki mon annan loportinite mon akoz lo travay remarkab ki nou bann *social workers* pe fer, e mon demann ki zot ganny plis sipor dan domenn finansyel, me osi dan tou bann domenn kapasite eksetera.

Akoz zot pe fer en travay remarkab e zot pe fer en travay vreman, vreman, vreman enportan. Sa Mosyon ozordi *as amended* i regard 2 laspe, 2 laspe sa fleo ki nou pe koz lo la, 2 laspe kot fleo sosyete Seselwa in fel. Nou bezwen aksepte ki nou'n fel. E se pa ozordi ki nou'n fel, se pa yer ki nou'n fel, se pa 10an pase ki nou'n fel me nou'n fel pandan en kantite, kantite, kantite letan.

Nou viv dan en pei kot la realite parey entervenan avan mwan in dir kot dan bokou ka en zanfan i grandi avek zis en paran. I napa sa lankadreman

familyal ki i devret annan. Sa dan li menm li i pa en problem.

Onorab Roucou in fer nou konpran ki i pa en problem si sa zanfan i annan kapasite pou li devlop lo son prop lekor, me la realite se ki pou en dimoun ki feb, sa dimoun i annan plis loportinite pou li tonbe ki pou li arriv son destinasyon kit nou ti a kontan i arive.

E nou pa kapab Mr Speaker kontinyen koumsa a *vitam aeternam*, nou bezwen pran sa an men, e fer ki sa zenerasyon ki pe vini. Onorab Roucou in dir nou pou perdi sa zenerasyon. I annan parfetman rezon, si nou pa fer en keksoz pou ki sa zenerasyon ki pe vini ; e bann zenerasyon apre zot i ava vin bann dimoun kapab e bann dimoun ki pou kapab rezilyan e ki pou debout lo zot 2 lipye.

I annan en kantite keksoz ki nou bezwen fer pou sa. Enn se nou bezwen fer bann lozman par egzanp, apropriye nou pa kapab annan dimoun ki pe viv dan bann *overcrowded circumstances* kot sa zenn garson i bezwen esper ziska dernyen dimoun in al dormi, pou li kapab tal son matla devan, dan salon pou li kapab dormi. E antretan i al asiz lo en bor miray deor laboutik e i tonm

dan toudsort kalite lenfliyans. Sa se bann keksoz ki nou bezwen fer.

Me ozordi nou'n ganny demande pou *focus* lo 2 keksoz. Premyerman sa delenkan ki li in fer en lofans e dezyenmman sa enn ki pa ankor fer en lofans me i lo semen pou li fer en lofans ki i pa ankor kapab ganny ankadre.

E sa mon krwar ki i absoliman esansyel pou nou pas sa mesaz avek Gouvernman ozordi, ki si bann ladministrasyon oparavan pa'n pran sa an men, akoz zot ti'n kontant zot lekor pou dir ki sa set en problem fanmir, les fanmir dil avek, nou, nou bezwen montre ki non, sa set en problem lasosyete. E nou bezwen ankadre sa bann zanfan - pa pou pini zot, sa se pa koumsa ki ou edik en pep - Me pou ankadre zot pou montre zot bon semen akoz zot pa'n ganny sa lankadreman dan en lot sirkonstans.

Alors nou pe ganny demande pou met devan Gouvernman posibilite pou annan 2 kalite sant. Enn en *Juvenile Detention Center* akoz i annan en Lakour *Juvenile*. E nou vwar tou le semenn i annan zenn *homme* zenn madanm, zenn fiy par egzanp, eskiz mwan zenn *homme*, zenn fiy ki

al devan sa Lakour e ki annan de fwa otan ki posib ou sey ed zot sa *Juvenile Court* i sey ed zot pou zot pa al an detansyon.

Me i annan serten ki napa lot fason pou dil avek zot apard met zot dan en lenstitisyon, tir zot dan lasosyete pou en pti bout letan, e fer ki pandan ki zot dan sa lenstitisyon zot ganny sa sipor ek sa lankadreman ki zot ti napa avan, pou ki ler zot ava sorti fotespere zot ava vin sa dimoun ki zot in toulstan devret ete.

E lot set en lenstitisyon ki pou pran an men bann ki vilnerab, bann ki in tonm dan en move frekantasyon, me zot ankor annan lespwar ki zot pa pou fer en lofans ki zot pa pou kapab *reform* zot lekor e vin bann dimoun sen dan en lasosyete.

Ki zot ava kapab atraversa programm aprann ki mannyer pou viv, aprann ki mannyer pou vin bann bon sitwayen dan en lasosyete, pou konpran ki i annan ler ou an fas avek 2 semen, enn ki bon e enn ki move e pou fer sir ki zot pran sa enn ki bon.

Alor Mr Speaker avek tou respe ki mon annan pou bann dimoun ki travay sanses dan nou bann kominote - e la mon pe mazin bann ankadrer, bann *Scout Master* par egzanp. Dan

mon distrik nou annan en programm ekstra ordiner, en programm eksitan kot bann paran in zwenn pou ankadre bann zanfan, pou fer sir ki zot pa tonm dan sa bann depi.

Nou'n fatige vwar bann zenn dimoun pe fer laliny kot bis *methadone* tou le bomaten, avan ki zot komans zot zournen.

Nou bezwen kas sa serk visye e mon remersye, mon felisit bann dimoun parey Mis Mary Anne e mon pou repet li ankor ozordi ki pas son letan apre son travay ki sorti Mamelles ki al Anse Boileau, e ki retournen e i travay ek tou bann zenn Les Mamelles pou fer ki zot kapab vin bann dimoun apropriye.

I gou pou dir ki nou ti annan en YRTC, me oli li sa YRTC? Ki'n arive avek? Akoz ki nou ti annan e la ozordi nou nepli annan? Kisisa ki'n arive ki'n fer nou sanz sa *mindset*?

Mwan mon krwar Mr Speaker sa ki'n fer nou sanz sa se sa lide ki sosyete napa en par pou zwe dan lepanouisman en zenn. Les son paran dil avek les lekol dil avek, epi reste trankil. Mon pa krwar ki sa in marse. E se pour sa rezon ki mon felisit Onorab Bastienne e mon felisit Onorab Woodcock pou son

lamannman ki in anmennen a sa Mosyon.

Akoz tou lede in rekonnnet ki nou bezwen fer sa ki nou bezwen fer. E nou bezwen met devan Gouvernman sa leokri ki nou pe tandé, sorti dan nou bann sosyete, sorti dan nou sosyete nou bann kominote pour ki nou annan en lankadreman neseser pou sa 2 group dimoun.

Mon kontan pou dir e ozordi mon ava dir avek Lasanble ki mon konnen ki Gouvernman deza i annan en plan pou en *Juvenile Detention Center*, sa mon konnen deza akoz Gouvernman pe koz lo en *Remand Center*.

E sa nou konnen akoz nou'n ganny dir isi menm dan sa Lasanble e mon krwar ki ansanm avek oubyen an menm tan ki sa pe ganny devlope i annan osi en plan pou fer en *Juvenile Detention Center*.

Me mon kontan ki Onorab Woodcock in anmenn sa lamannman ozordi, akoz nou bezwen met devan Gouvernman ki sa se pa en lide ki devret reste koman en lide, oubyen en keksoz ki nou ti a kontan war a en serten moman.

Me i en nesesite demen, e ki nou devret bouz vit lo la, akoz sak fwa ki nou perdi en zanfan akoz swa nou met li dan en

kaso avek en, avek bann adilt, oubyen nou met li dan en kordgard akoz nou napa en sant apropriye, nou pa pe ede sa zanfan pou li vin meyer. Nou pe o kontrer *consign* li pou li vin en delenkan pli pir ankor demen. Alor i enportan ki nou annan sa sant.

E i osi enportan ki nou retourn lo en lide ki Onorab Bastienne ozordi pe met devan nou, me set en lide ki'n deza la sof ki i pa'n ganny fer dan en fason byen, si mon kapab dir. En mo i mank mwan. Me Minis Francourt ozordi lontan i pe travay avek bann sistenm koumsa.

Lontan i pe met an mars bann pti *camps*. En bann i en bann *day camp*, e n bann i en bann *residential camp*. Avek preske napa mwayen ditou, me *at least* nou'n rekonnnet ki i annan sa nesesite.

E mwan mon konnen akoz mon'n koz avek Minis Francourt, i pa ti Minis sa lepok, e i dir mwan ki i enkrwayab ki mannyer ou kapab sanz en zanfan si ou ankadre li byen e ou montre li son valer. Pa mwan ki dir sa Mr Speaker, mwan mon napa zanfan mwan menm.

Alor mon pa kapab koz *from experience*. Be mon konnen akoz mon'n travay dan

distrik pandan bokou, bokou lannen e mon *interact* avek sa bann keksoz.

E mon konnen ki i vre sa ki i dir, si ou pran en zanfan e ou donn li son valer, e ou donn li en lankadreman e dou montre i bon semen ek move semen, ou annan en sans pou transform sa zanfan e pou fer li vin en dimoun, en dimoun ki pou vin en atou dan nou sosojet.

Alors sa i nou pe demande, se ki sa sistenm ki ti *ad-hoc* si ou permet mwan dir koumsa, vin en sistenm rezidansyel kot i ava annan en landrwa, *call it whatever you want a holiday camp en training camp* nenport kwa en *work camp* nenport pran son non ki ou anvi.

Me fer en met en landrwa kot sa bann dimoun vilnerab, sa zenn garson ki pa al lekol, me ki annan probableman en talan ki fodre ou al pran avek li, fodre ou al rode avek li fodre ou al tire avek li.

E sa zenn fiy ki pa devret pe fer son premye zanfan ler i annan 14an, akoz i annan en lot lavenir pou li - met zot dan sa lenstitisyon rezidansyel, *train* zot pour ki zot a sorti koman en dimoun akseptab e valab dan lasojeté akoz zot napa sa lankadreman zot menm akoz zot napa sa landrwa

sa fasilité, sa dimoun ki pou kapab anmenn zot.

Sosojeté i annan donk en devwar, en gran devwar pou fer sa ki i bezwen fer pour ki napa en zanfan ki pou tonm akote, Pour ki nou pou pran anmenn tou sa bann zanfan, sa bann ki'n komet en lofans. E atraver en sant nou ava ed zot pou zot pa komet en lofans ankor, e sa bann ki vilnerab pou zot pa tonm dan en sityasyon kot zot pou bezwen al dan en *Juvenile Detention Center*.

Alors Mr Speaker mon ti a kontan felisit Onorab Bastienne ankor enn fwa e felisit Onorab Woodcock pou zot linisyativ apre midi. Sa set en keksoz ki lontan, lontan nou ti'n devret aborde e mon kontan ki zot in met sa devan Lasanble ozordi e nou atraver sa Mosyon nou ava anmenn sa a latansyon Gouvernman.

Avek sa detrwa mo Mr Speaker, mon remersye ou pou ou letan e mon dir ou mersi e mon ankor enn fwa felisit sa 2 Manm ki'n anmenn sa Mosyon apre midi. Mersi Mr Speaker.

MR DEPUTY SPEAKER

Mersi Onorab Georges. Mon konnen mon ti'n dir ou dernyen entervenan, me solman i annan en Manm ki'n aport a mon latansyon ki lontan i ti'n lev son

lanmen. E alor mon pou donn li en sans dir detrwa mo a kondisyon ki avek *summing-up* le 2 entervansyon nou pou bezwen fini 5er. *Agree? Very good.* Onorab Rosie Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Mersi tou Onorab, mersi pou donn mon sa pti sans.

Sa Mosyon anmennen par Onorab Bastienne i devret ganny konsidere koman priyrite limero 1 par gouvernman. Mr Speaker mon pou donn en pti apersi avek levidans ki pou kapab vwar leta lasante nou bann zanfan isi Sesel.

Dapre sa rapor i en rapor par Minister Lasante i en performans Minister Lasante ki ti ganny pibliye an 2020. Premyerman lekspektasyon lavi Sesel i 74an. Mortalite pti baba i 11.6 ki nou pa tro byen lo sa nivo pli ba i 1.8 par Marok. Mortalite zanfan anba 5an i 14.2, osi la nou kapab fer pli byen.

Sa bann endikater Sesel ti kapab fer pli byen parey mon dir. Popilasyon Sesel i 98mil.4, ladan 51poursan i zonm e 49poursan i madanm, savedir i annan plis zonm ki madanm Sesel.

Ladan 21poursan i annan laz 15an nesans parmi sa bann zenn fiy.

15 a 19an i annan dan lannen pase ti annan 189poursan pti baba ti ne.

10an a 15an ti annan 4 pti baba ti ne dan sa laz bann zanfan.

Aborsyon total ti annan 504.

15an a 19an ti annan 71 aborsyon. E manrmay ant laz 10 a 14an ti annan 600.

Mr Speaker i annan en lot letid ki ti ganny fer an 2015 ki a donn nou en pti pe leta sosyal nou bann zanfan, sa ti ganny fe par Minister Lasante anba *Global School Student Survey*. Rezulta ti montre *sampling size* ti 2500 zanfan dan S1 avek S5 aze 11an a 17an.

21poursan etidyan ti fimen, zot ti fim plis ki 1 sigaret ouswa detrwa sigaret par zour dan lasemenn,

48poursan etidyan ti konsonm lalkol omwen pandan 30zour,

40poursan etidyan ti fer seks ladan zis 50poursan ki ti servi kapot.

Well 21poursan etidyan ti attempt swisid,

30poursan ti mank laklas san permisyon.

Mr Speaker sa letid i montre nou diferan

konportman e risk nou zanfan, nou ban zanfan Seselwa. La mazorite lansentman isi Sesel bann paran i pa'n zanmen *plan*, la mazorite pa'n *plan*, me laplipar zot in aksepte zot lansentman.

Sityasyon ekonomik sosyal dan nou pei, la pli par bann paran zot travay zot dan lanplwa pandan lazournen ou aswar. Dan lasemenn zanfan i al lekol, laplipar zot retourn kot lakour e paran i ankor pe travay.

Alors i donn lespas bann zanfan fer sa ki zot oule dan vwazinaz. Mr Speaker sityasyon sosyal *housing* sirtou *social housing* i ganny evolye, in ganny evolye isi Sesel, kot la mazorite fanmir Seselwa ordiner pe reste dan bann *flat* Mahe, Praslin ek La Digue.

Sa lanvironnman i permet zanfan melanz avek lezot zanfan ou fanmir dan zalantour avek diferan *background*, diferan mantalite ek diferan fason fer osi.

Mr Speaker sityasyon sosyal isi Sesel parey nou konnen, i annan plis konsonmasyon drog, lalkol, sigaret e sa i kontribye pou met nou bann zanfan a risk pou konsonm sa bann menm sibstans.

E sa bann sirkonstans par ler i pa fer li fasil pou nou bann zanfan grandi dan en lanvironnman, ki'n ganny polye avek sa bann kondisyon ki pa akzeptab sirtou dan ban sityasyon kot nou bann zanfan i ganny ekspoze avek labi.

Mr Speaker diferan tip labi i egziste ki nou bann zanfan i pas atraver, par egzanp nou pou komans avek en labi fizik kot zanfan ant zanfan in lager ek kanmarad parey nou'n war dan lekol lo *Facebook*.

Zanfan i ganny *bully* fizikman par lezot zanfan. Paran pa'n pran zot servi bann gro, gro term pou eksplik zanfan bann pri keksoz senp. Zot menm abiz zot zanfan fizikman, kalot dan latet, kalot dan zorey e baton lo ledo.

I annan ankor en lot labi, labi seksyel kot sa i sirtou dan bann *Housing Estate* swa par boper, ou lezot manm fanmir ou lezot adilt dan lantouraz. Menm lekol i annan labi seksyel par bann *teachers* lo zanfan. Labi seksyel parmi zanfan menm parmi garson ek garson ki pli zenn e nou konnen poudir i annan sirtou bann zanfan dan lakres ki pe fer labi seksyel ek kanmarad.

I annan lezot labi, labi emosyonnel ouswa ou'n negliz ou zanfan, i annan *bullying* kot

lekol. Paran i zour zanfan pli ba ki later avek bann mo *alias* ki parey Onorab Arissol in dir e avek zot zanfan sirtou ler zot ankoler.

Labi emosyonnel i osi arive isi Sesel kot paran i lager ek kanmarad, vyolans domestik kot bann zanfan i temwanny sa e sa i bann aksyon kriminel.

Par kont Mr Speaker avek tou sa bann labi ki nou zanfan i fer fas avek, sirtou kot napa supervizyon paran, sa bann zanfan i trouv zot dan bann sityasyon kot zot rod rekour kot vwazen lo semen, dan drog, dan lakour menm zot in vin bann pti adilt avan ler zot in grandi.

Sa sityasyon i pli grav sirtou ler paran i napa kontrol lo zot zanfan. Sa i ganny demonstre toulezour kot zanfan i pran kontrol preski tou le lafen di mwan sirtou dan vakans, nou tan lanons lo radyo par egzanz ki sorti kot Kordgard Santral.

‘Jeanne Mari aze 12an ek son ser Tasha 15an in kit kot lakour depi Vandredi le 14 Me. In pas plis ki 2 zour Jeanne Marie ek Tasha pa’n ankor retourn kot lakour, dernyen fwa zot ti ganny war ti lo *bus stop* apre lekol. Sa ki krwar zot in war Tasha ek Jeanne Marie silvouple kontakte Kordgard pli pros.’

Sa i bann lanons ki nou tann li en bon pe souvan isi Sesel.

Mr Speaker personn pa konnen kote sa 2 zanfan in ale, ni menm zot okouran ki sa bann zanfan sirtou sa bann paran nou pa konnen kan i retournen, me paran i konnen be nou, nou pa konnen kan i retournen.

Mr Speaker sa i en legzanp kot nou bann zanfan anba laz i ganny abize, menm paran ou Lotorite konsernan pa konnen lekel zot bann abizer. Me Sesel i annan en kantite Lalwa, regilasyon ki protez nou bann zanfan.

Mr Speaker dapre bann prezantasyon e leksplikasyon ki ti fer pandan sa 2 zour ki nou ti fer kot *Savoy* par Manm Lasamble ki ti attend le 15 Mars, ti annan plizyer Lazans Nasyonal kot sa bann zoli Lalwa, zoli regilasyon, zoli striktir ti isi Sesel i annan pou protez nou bann zanfan protez, promot *welfare* tou nou bann zanfan isi Sesel anba *Children’s Act*.

Sa bann Lalwa ti *comme* swivan; nou ti annan sirtou nou ti annan Lofis Attorney Zeneral ki ti koz lo Lalwa Zeneral pou siport bann zanfan. Lazans Lafanmir Tribunal, Lalwa pou dil avek aksyon domestik sirtou

e zot ti pran konsiderasyon pou *custody* sa bann zanfan e *maintenance*, dapre leksplikasyon ki zot ti donnent.

Lapolis osi ti zwe en gran rol dan sa diskisyon en bann labi zanfan e osi vvolans domestik kot zanfan i a risk pou ganny vvolans domestik e fizik, bann gard ti la toultan pou siport zot. Servis Sosyal osi ti annan en gran rol pou zwe kot Minister ti enformen ki stati legal avek responsabilite pou promot, prezerv *welfare* tou zanfan Sesel.

Se sa lenstitisyon ki responsab pou enplimant tou sa bann stratezi Nasyonal sirtou kot i konsern *Children's Act*. Minister Ledikasyon osi ti la e i ti responsab pou zer bann Lalwa, pa zis dan bann Lalwa Ledikasyon lo kote akademik, me osi ti asire pou konportman bann zanfan i azour avek Kod Kondwir e disiplin bann zanfan.

Mr Speaker dapre odit Nasyonal i annan ankor lezot lasans ki promot proteksyon zanfan parey *NCC, IECD*, e lezot ankor.

Me sa ki nou trouve se ki menm si sa bann Lazans i an plas nou annan en bon pe ki pa pe ed nou bann zanfan. E i annan en kantite zanfan ki'n ganny koule dan sa lasenn akoz zot tre vilnerab.

Loter sa Mosyon in demande pou met bann striktir an plas, pou atrap sa bann zanfan ki vilnerab akoz anba *Children's Act* 1992 ki ti ganny repeal an 2016, sa *Act* osi ti dir ki *Juvenile Court* ki annan provizyon ki okenn zanfan pa devret ganny prosekte pou okenn lofans apard ki *murder* me par lord Lakour.

Me okenn zanfan par anba 14an pa pou ganny kondannen prizon.

Sa provizyon osi ti fer bann zanfan ki fer lofans anba 14an zot pou ganny reabilitasyon dan en *Juvenile Center*. Alors Mr Speaker loter sa Mosyon pe demande ki Gouvernman i etablir sa sant rezidansyel pou bann zanfan, ou adolesan ki pli vilnerab ou ki'n vin viktим fleo Sosyal dan nou pei Sesel.

Mr Speaker akoz tou sa letan se sa bann striktir pa'n ganny met an plas? I annan striktir ki'n ganny ouver, apre in mor an nesans. Sa i agrav sityasyon kot zanfan pe ganny abize e nou pe les deryer enn bann viktим avek fleo sosyal.

Sa Mosyon se pour asire ki Seselwa pa kit okenn nou zanfan deryer, me an menm tan nou sipoze donn sipor sa ban paran pou zot kapab siport zot

zanfan pou fer zot vin en bon sitwayen Seselwa.

Alors Mr Speaker mon swete ki Gouvernman i ava pran sa Mosyon koman en *top* priyrite lo son lalis azanda.

Mon remersi loter Mosyon pou anmenn sa Mosyon tre konpreansiv e ki nou kapab get en pe dan sitasyon nou bann zanfan Sesel. Mersi.

MR DEPUTY SPEAKER

Mersi. Onorab Bistoquet. Aprezan mon ava envit loter Mosyon pou prezant son *summing-up*. Onorab Bastienne.

HON DESHEILA BASTIENNE

Mersi Mr Speaker. Mr Speaker apre ki mon'n ekout tou mon bann koleg *MNA* koz lo sa Mosyon Mr Speaker i keler ki bokou fe, e sizesyon valab e vreman enportan in ganny sorti.

Apre sa lamannman lo sa Mosyon pou en *Juvenile Detention Center* e en sant reabilitasyon separe, sa i montre ki i annan en irzans pou nou anmenn en tel facilite pou abilit nou bann zenn ki bezwen ganny sove dan sa kalite *lifestyle* ki zot in plonz ladan.

Mr Speaker ansanm avek sipor bann *MNA* dan sa Lasanble mon pou enplor

Gouvernman pou fer sa facilite vin en realite akoz annan bokou lenstans dan lepase kot bann tel size parey in vin devan. Legzanp; en *halfway home*, e parey mon bann koleg *MNA* in fer sorti dan *Forum Gender Based Violence* 2 semenn pase i ti ganny fer resorti lenportans annan en tel facilite.

Mr Speaker ozordi nou pe koz menm langaz, e nou pe rekomande ki sa facilite i ganny met an plas kot ava annan bon *counselling* e avek bann travayer ki ek diferan ekspertiz, ki pou kapab ed nou bann zanfan dan bann domenn apropriye, ki i a fer ki nou ava kapab arive sov nou fitir zenerasyon.

Mr Speaker nou'n swiv e osi partisip dan diferan programm parti programm, me naryen pa'n arive. O kontrer sitasyon in vin pli grave. Zanfan pe vin pli danzere ki adilt, e keksoz ki zot fer ouswa pe arive avek zot i vreman fer lapenn.

Mr Speaker ozordi mon pe demann Gouvernman pou donn latansyon serye lo sa Mosyon, e mon swete ki aksyon pozitiv i a ganny pran. Dapre lenformasyon Departman Sosyal, Zafer Sosyal i annan en sonm larzan pou konmans konstrir sa proze.

Mon ti ava apresye ki Gouvernman pa tarde pou idantifye en bout later pou sa proze parey mon bann lezot koleg *MNA* in propoze. Nou konpran kontrent Bidze me omwen par fer sa premye pa i a pou sa proze pou realize a lafen.

Mr Speaker bann fanmir i oule war zot zanfan ganny geri e ki bann sitwayen responsab. Nou pei i bezwen son bann zenn pou pran la relev. Popilasyon pe vyei e sa group zenn la deor se zot ki pou vin nou fitir Gouvernman.

Ki sa facilite i vin en siper pou nou ban zenn e bann fanmir in tonbe e i a donn zot lespwar pou releve. Mersi Mr Speaker e mersi tou *MNA* pou zot kontribisyon anver sa Mosyon tre valab. Aprezan Mr Speaker mon met Mosyon devan Lasanble pou nou vot lo la. Mersi.

(APPLAUSE)

MR DEPUTY SPEAKER

Mersi Onorab Bastienne e aprezan nou pou met sa kestyon avek Lasanble pou vot lo la.

Mosyon i lir koumsa; Lasanble i aprouve (Mosyon amande) Lasanble i aprouve pou demann Gouvernman pou

komans demar pou etablir en *Juvenile Detention Center* pou zanfan ki fer lofans e en Sant Reabilitasyon Rezidansyel separe avek bi reabilit bann zenn anba laz ki'n viktim labi e fleo sosyal.

Donk nou ava demann tou Manm ki an faver pou endike? Mersi. Okenn Manm ki kont? Donk Mosyon prezante par Onorab Bastienne in ganny aprouve par Lasanble Nasyonal. 20 Manm in vot an faver, okenn Manm pa'n vot kont e okenn Manm pa'n *abstain*, donk sa Mosyon in ganny aprouve.

Sa ti osi nou dernyen *item* lo azanda pou ozordi. Nou pou termin nou sesyon travay pou ozordi. Nou pou rezwenn Mardi prosen 9er bomaten.

(ADJOURNMENT)